

萬 有 文 庫

第 二 集 七 百 種

王 雲 五 主 編

宋 詩 紀 事

(八)

厲 鶚 馬 日 瑄 輯

商 務 印 書 館 發 行

東



宋 詩 紀 事

(八)

屬 鶚 馬 日 瑄 輯

國 學 基 本 叢 書

萬有文庫

第二集七百種

總編者

王雲五

商務印書館發行

宋詩紀事卷四十七

錢唐 厲鶚 緝
吳 毛德基 勘定

楊由義

由義字宜之。開封人。避地鹽官。與漕薦不第。以父奉直恩。補右階。監贍南軍庫。隆興初。以閤門祇候使金。不屈而還。孝宗嘉歎。累遷太府卿。兼刑部侍郎。徽國朱文公曾受業焉。

弔王忠肅

名稟。靖康時。堅守太原城。陷。父子同赴水死。

太原城下屹行宮。雲樹龍蔥掩碧空。鐵馬無聲汾水急。滿天風雨泣英雄。

海寧縣志。

李浩

浩字德遠。臨川人。紹興十二年進士。孝宗朝。歷官直寶謨閣。知靖江府。召還擢權吏部侍郎。旋予祠。除祕閣修撰。帥夔部。卒。贈集英殿修撰。

東西船行

東船得風帆。席高千里。瞬息輕鴻毛。西船見笑苦遲鈍。汗流撐折百張篙。明日風翻波浪異。西笑東船卻如此。東西相笑無已時。我但行藏任天理。

合璧事類外集。

述陂

在臨川縣。

數椽臨蒼波。我目得以寓。長溪山根來。澄潭一固互。萬象森可掬。脩脩澹清素。草短牛羊飢。沙暖鳧鷖聚。枯槎自斷岸。孤艇橫野渡。荒寒何代城。隱翳尙門戶。昔時歌舞地。今日採樵路。回薄萬古心。斜陽在烟樹。

出疎山

忙中安得此身閑。杖策西風自往還。今日已償雲水債。籃輿帶雨下疎山。

以上撫州府志。

陳知柔

知柔字體仁。號休齋。永春人。紹興十二年進士。知循州。徙賀州。

萬年寺

古寺來投宿。雲巖第幾層。有詩堪供佛。無事且依僧。小閣泉喧枕。修廊雨暗燈。好峯看未足。幽夢幾回登。

天台山志。

九日宴蓮花峯

多病登臺今古情。菊花搖動午涼生。山前木落石巖出。海上潮來秋渚平。野興已隨芳草遠。歸鞭更傍落霞明。媿無十丈開花句。獨臥禪房心自清。

南安縣志。

魏杞

杞字南夫。壽春人。徙居鄞。紹興十二年進士。孝宗朝。累遷宗正少卿。拜參知政事。尙書右僕射。兼樞密使。出知平江府。卒。贈特進。諡文節。有山房集。

送左彥武歸鄉

折桂歸來日。西風萬里秋。錦衣天上客。紅葉渡頭舟。把酒難爲別。題詩更欲留。明朝山水隔。何日是重遊。
寧國府志。

李庚

庚字子長。臨海人。紹興十二年進士。歷官監察御史。知袁州。有集號論癡符。

樓大防序云。海邦貨魚于市者。夸詡其美。謂之鮪魚。字書以爲銜銜實也。顧黃門之推家訓曰。吾見世人至無才思。自謂清華。流布醜拙。亦已衆矣。江南號爲誇癡符公之意。蓋出于此。特謙詞耳。

畫扇

睡起小樓春又殘。半垂雲袖傍闌干。楊花飛過秋千索。一陣東風作曉寒。
前賢小集拾遺。

劉琪

琪字共父。忠顯公幹孫。忠定公子羽之子。紹興十二年進士。孝宗朝。累官同知樞密院事。知建康府。江東安撫使。行宮留守。進觀文殿學士。卒。贈光祿大夫。諡忠肅。

帥潭日勸駕詩

十載湘江守。重來白髮垂。初無下車教。再賦食苹詩。天闊搏鵬翼。春融長桂枝。功名儻來事。大節要堅持。
詩人玉屑

送元晦

翩翩雙黃鶴。結巢相因依。一爲天風便。矯翮西北飛。歲華及晚晚。霜露侵征衣。此行亦良苦。千里以爲期。

堂上元髮親，榮祿當及茲。人生會有役，不復情淒而。徘徊都門道，欲語行且遲。念子抱孤桐，窈窕弦古詞。清商奮逸響，激烈有餘悲。不辭彈者勞，正恐知音稀。知音何足貴，我顧不可追。翰墨大全

留正

正字仲至，泉州永春人。居惠州。紹興十二年進士。孝宗朝，拜右丞相。光宗卽位，進左丞相。寧宗朝，終少保觀文殿大學士，封魏國公。卒，贈太師，諡忠宣。

中興編年慶元僞學之禁，凡五十九人。宰執四人：趙汝愚、留正、王蔭、周必大。待制以上十三人：朱熹、徐誼、彭龜年、陳傅良、薛叔似、章穎、鄭澁、樛輪、林大中、黃由、黃黼、何異、孫逢吉、餘官三十一人。劉光祖、呂祖儉、葉適、楊方、項安世、李應、沈有開、曾三聘、游仲鴻、吳獵、李祥、楊簡、趙汝談、汝諧、陳峴、范仲黼、汪遠、孫元卿、袁燮、陳武、田澹、黃度、張體仁、蔡幼學、黃灝、周南、吳柔勝、王厚之、孟浩、趙釗、白炎、震武、臣三人。皇甫斌、范仲任、張志遠、士人八人：楊宏中、周端朝、張道、林仲麟、蔣傅、徐範、蔡元定、呂祖泰。

朝野類要：初入仕，必具鄉貫。三代名銜，謂之脚色。崇觀閒當書云：不係元祐黨籍。紹興閒卽云：不係童蒙。蔡、朱、王等親屬，慶元閒加不是僞學，方與銓除。

羅浮天漢橋

霏霏細雨溼芝田，短短桃花照水妍。可惜洞門關不盡，彩虹天外著飛泉。惠州府志。

史浩

浩字直翁，鄞縣人。紹興十五年進士。孝宗朝，累擢中書舍人、翰林院學士、知制誥。歷右丞相，封魏國公，進太師。卒，追封會稽郡王。諡文惠。嘉定中，改諡忠定，封越王。配享孝宗廟庭。有鄧峯真隱漫

錄。

淳熙丁酉九月丙辰。宣召錫宴澄碧殿。抵暮。送以金蓮燭。宿玉堂直廬。應制古詩三十韻。

季秋中澣日。淳熙降四禩。朝回攬轡閒。中使俄傳旨。少頃日轉申。宣詔陪燕喜。預令婦玉堂。深夜備棲止。悚懼跪承命。鳴騶亟穿市。絳闕聳皇居。非煙常靡靡。入自東華門。熊羆森爪士。詔許乘肩輿。安徐無跛倚。復古距選德。相望幾數里。脩廊接雲漢。岩峴璨珠藜。中途敝金屏。恍若蓬壺裏。羣山擁蒼壁。四顧環弱水。山旣日夕佳。水亦湛無滓。冰簾映綺疏。瓊殿中央峙。澄碧耀宸奎。龍神爭守視。蹈舞上丹墀。天威不遠咫。奉觴祈萬壽。時蒙一啟齒。餘波丐鼠腹。酒行不知幾。徘徊下瑤席。緩步煩玉趾。從遊至清激。錫坐談名理。泉聲韻琴瑟。一洗箏笛耳。皇云萬機暇。觀書每來此。論道及帝王。直欲齊其軌。堯舜禹湯文。前身無乃是。臣言匪獻諛。道實由心起。旣然明是心。要在力行爾。登橋酬餘疊。餘興未容已。金蓮引雙燭。再拜離階屐。玉音寵諭臣。此會宜有紀。歸途感恩榮。占寫忘骫骳。

青櫺子

羽幘新從帝所回。餘歡未盡玳筵開。醉拋青子香泥上。留與仙家取次栽。

恭和御製翠寒堂詩

禁籞蔥蔥擁瑞雲。雄樓傑閣環金碧。花光草色媚芳辰。鳳輦春容惟所適。中有虛堂玉作楹。冰雪玲瓏周四壁。不知跬步是瑤臺。何須八駿殷勤覓。青松萬箇拱簷牙。生香不減芝蘭室。更欲相看飽歲寒。疎梅瘦竹爲三益。吾皇土木未嘗興。爲詢此景從何得。神運元從德壽來。天成豈假人工役。

進明堂慶成詩

六閔淳熙禋。秋高日仲辛。大君敷渙號。重屋薦明禋。玉輅興清廟。龍旂旦紫宸。雲陰連夜解。霽色一朝新。周禮樽壘備。虞韶樂舞陳。合宮天地並。侑席祖宗均。峻城登三獻。脩楹秩百神。肅祇申睿意。肸鬻降高旻。宣室宜膺福。慈闈亟拱宸。蓂花馳萬騎。歸胙見雙親。釐事超隆古。年齡肇億春。蓼蕭覃有馥。成命播無垠。惠餽盼羣后。恩波逮老臣。祝堯非健筆。徒學華封人。

江倅出家樂

沈沈春酌話綢繆。花月行船看拍浮。手束柔荑調雁柱。袖翻紋錦出香毬。未攀青子猶如豆。欲膾頰鱗始上鉤。蓬島古來無覓處。我曹今此得真游。

游雨花臺

試扶鳩策上煙霞。尙想當年天雨花。潮熟野航歸別浦。雪乾宿鷺點晴沙。高連西竺三千界。俯眺南陽十萬家。更欲雲開窮遠目。鬱蔥起處認中華。以上鄧峯真隱漫錄。

王淮

淮字季海。金華人。紹興十五年進士。累官翰林學士。孝宗朝。拜右丞相兼樞密事。薨。贈少師。諡文定。

題福祐王廟

在蘭溪苕峯之巔。祀楚亞父范增。

關中失鹿人爭逐。一去鴻門不可尋。千古英雄死遺恨。封侯廟食亦何心。湧幢小品。

莫濟

濟字子齊。吳興人。紹興十五年進士。甲戌中宏詞科。官祕書監。

次韻梁尉秦碑并序

秦會稽石刻。唐人如張守節、司馬貞皆嘗援以證史記。紹興初。舅氏姚令威刪定。登山弔古。見碑石猶存。後二十餘年。分教是邦。以語簽判王龜齡。勉邑尉梁君求之。則石已缺。字不可見矣。以詩記其事。龜齡既廣之。以濟首發其端。書以示濟。按會稽秦頌德碑。凡二百九十六字。視秦世泰山之朶諸刻。獨此碑字爲最多。唐李嗣真云。斯小篆之精。古今妙絕。秦望諸山。及皇帝玉璽。猶千鈞強弩。萬石洪鐘。豈徒後學之宗匠。亦是傳國之遺寶。周越法書苑。獨載封禪碑十字而已。至歐陽公、趙德父。集錄天下金石遺文。殆盡。亦不復有秦望山碑。姚令威紀鵝鼻山頂石屋所插一碑。今石屋故在。碑蓋無有。梁次張所模片紙。指爲秦碑。乃在何山。其去鵝鼻尤爲隔絕。盡記本末。以俟後之君子。

六王失國。四海歸秦。皇東刻南巡碑。法因史籀。有增減。名與蒼頡爭飛馳。自言功德可歌頌。黔首箇箇愚無知。海神何故獨拒命。風濤塞路蟠蛟螭。羣臣諂佞仙藥遠。死生治亂分兩歧。山靈不可守碑記。片段應作龜牀支。陵谷雖存。世代異。耳目雙被誕者欺。只餘紙本落人世。千古遺臭東南崖。我聞秦望最高峻。城域所見非昔時。何山距縣四十里。符合傳記壯且奇。衆峯乃是子孫行。古木幾換蛟龍枝。指東作西未足怪。父老流傳從小兒。政如塗山玉帛會。漫不可考歲久之。梁君吏隱年甚少。鬱鬱寸角初解麋。裹糧挈榼訪古跡。氣味蕭散如分司。忽聞片石在絕頂。小篆無乃斯翁爲。手披荆棘訶虎兇。拄杖直叩山頭皮。糝糊

豈復有字畫。此物及見秦亂離。當時威勢振天下。不言慘毒民嗟咨。乘輿所至爲刀鋸。方嶽何暇安禮儀。關中履弃百二險。歷數浪指億萬期。君臣乃爾自賢聖。鯁論不復相瑕疵。陳迹安知百世後。樵夫牧子笑脫頤。興亡俄頃三嘆息。撫掌重閱太史辭。假使玉筯餘筆畫。文過其實世所嗤。早知金石不可恃。相君應悔燔書詩。雲門志略。

鄧耕老

耕老莆田人。紹興十五年進士。國子監簿。分教四明。

句

閑懷溪一曲。養拙屋三閒。題木蘭溪書堂。興化府志。

湯思退

思退字進之。青田人。紹興十五年中宏詞科。歷相兩朝。官至特進觀文殿大學士左僕射。封岐國公。隆興初。責居永州卒。

詠石僧

雲作袈裟石作身。巖前獨立幾經春。有人若問西來意。默默無言總是真。

湖海新聞。宋高宗一日坐寢殿。湯丞相思退侍立。上曰。卿家處州有何異迹。思退曰。臣鄉有石僧題詠云云。遂大稱旨。本無此詩。徹夜遣人歸。刻石石僧之旁。

句

虞妃從梧野。啟母耐稽山。

二老堂詩話。湯岐公顯仁皇后挽詩云。顯仁初以賢妃從徽宗北狩。其後耐葬徽宗永祜陵。虞妃爲徽宗也。啟母爲高宗也。用事可謂的切。

林仰

仰字少瞻。侯官人。紹興十五年進士。終朝奉郎。

桃源洞

深樹冥冥一徑風。溪流應與十洲通。仙家日月無人識。只愛桃花三月紅。天台山志。

鄒定

定字應可。奉新人。紹興十五年進士。官奉議。

楊誠齋云。定詩上邇。

山谷以入少陵戶牖。

過杜工部祠

疇昔哦詩憶未陽。茲因奉檄過祠堂。一生忠義孤吟裏。千載淒涼古道旁。自是風霜侵病骨。非干牛酒澆詩腸。明朝解纜秋江上。問訊先生一瓣香。詩人玉屑。

汪大猷

大猷字仲嘉。思溫之子。紹興十五年進士。官至吏部侍郎。兼權尙書。慶元中。進敷文閣學士。與甥

陳居仁、樓鑰、並居翰苑。人稱舅甥三學士。有適齋存稿。

和姜梅山

投分雖深迹卻疎。君居東婺我西湖。兒曹方喜承毛檄。父執應容教鯉趨。慨念舊遊多宿草。舊同官六十餘人。今惟大猷與公獨存。僅餘二老見霜鬚。詩來喚起相思夢。又向梅山得楷模。鄞縣志。

楊 偁

偁字子寬。嵎縣人。居臨安。和王存中之子。紹興十五年進士。仕至權工部侍郎。

紹興己巳遊洞霄

青山九鎖隔凡緣。福地潛通小有天。古洞落花春寂寂。空山亂石水涓涓。金丹翠箬藏千歲。芝草琅玕定幾年。惆悵何時謝塵事。山中長作地行仙。洞霄詩集。

王剛中

剛中字時亨。樂平人。紹興十五年進士。孝宗朝。累官禮部尚書。端明殿學士。同知樞密院事。卒贈光祿大夫。諡恭簡。有東溪集。

彌牟鎮八陣圖

我稽八陣圖。規模載方冊。竭來鎮西川。夔門觀壘石。賦詩數百字。字字究來歷。進涉漢川西。彌牟鎮之北。平原列堆阜。灘石同一式。細思作者意。孔明有深策。高岸或爲谷。灘石存遺跡。滄海變桑田。平原猶可覓。故令兩處存。千載必一得。再歌遂成篇。當有智者識。成都文類。

楊汝南

汝南字彥侯。龍溪人。紹興十五年進士。初調贛州教。以薦知古田縣。

夜宿龍頭

江流如箭路如梯。夜泊龍頭煙靄迷。兩角孤雲天一握。曉光不覺玉繩低。漳州府志。

黃徹

徹字常明。莆田人。紹興十五年進士。官辰州。有碧溪詩話。

句

但遣一枝居巧婦。不殊大廈供嘉賓。

碧溪詩話。予題友人居云。蓋用爾雅。

注鷓鴣俗呼巧婦。炙穀子雀一名嘉賓。

圓冠思得多于鯽。刻木惟宜少似彪。

碧溪詩話。北夢瑣言載江陵在唐世。號衣冠蔽澤。琵琶多如飯甑。措大多如鯽魚。退之酬崔少府伊陽詩云。下言人吏稀。惟足彪與鯽。余官辰溪時。士人皆可喜而不多得。近城人虎雜居。戲爲對云。

鄭伯熊

伯熊字景望。永嘉人。紹興十五年進士。累授太子侍讀宗正少卿。謚文肅。有集。

赤城志。鄭伯熊爲黃巖尉。人呼爲石。

蓮縣尉以其年少而堅不可磷也。

枕上

飄風不崇朝。驟雨不終日。清寒入絺綌。御袷有餘鬱。天時不能調。人事那可必。清燈耿孤窗。萬籟助颼颼。憂愁從中來。起坐髮屢櫛。丈夫屬有念。功名乃餘物。突兀萬閒屋。此意何時畢。長吟答寒螿。四壁轉蕭瑟。

東甌詩集。

周麟之

麟之字茂振。海陵人。紹興十五年進士。中宏詞科。擢知制誥。翰林學士。終于知樞密院事。有海陵集。

金瀾酒

金瀾酒。皓月委波光。入牖。冰臺避暑壓瓊艘。火炕敵寒揮玉斗。追歡長是秉燭遊。日高未放傳杯手。生平飲血狐兔場。釀麩爲酒甑爲裳。猶存故事設茶食。金剛大錫胡麻香。五辛盈杓雁粉黑。豈解玉食羅雲漿。南使來時北風冽。冰山峨峨千里雪。休嗟北酒不醉人。別有班觴下層闕。或言此酒名金瀾。金數欲盡天意闌。醉魂未醒醴未覆。會看骨肉爭相殘。一雙寶榼雲龍翥。明日朝辭倒壺去。只留餘瀝醅昭臺。帝鄉自有蒸薇露。

海陵集。予醜燕京會同館。有梁大使者。先朝內侍官也。入館傳旨。賜金瀾酒二瓶。銀魚。牛魚二盤。瓶盤皆金銀爲之。升龍交錯。形製甚精。古且並令留之。古樂府曰。月穆穆以金波。金瀾之名。其取諸此乎。然金瀾金運。其將闌也。銀魚。長尺餘。比南方者尤。

大牛魚出混同江。其大如牛。或云可與牛同價。故名。又燕中暑。月于冰窖造御酒。甚清冽。使至嘗。被賜女真人多釀。麴爲酒。醉則殺人。盛饌以雁粉爲貴。以木杵貯之。其瀋黑色。以生蔥蒜韭之屬置于上。臭不可近。又俗重茶食。阿姑打開國之初。尤尚此品。若中州餅餌之類。多至數十種。用大盤累釘高數尺。所至供客。賜宴亦用焉。一種名金剛燭。最大。

二老堂雜志。周樞密麟之。充金哀謝使。金主愛之。享以所釣牛魚。非舊例也。樞密糟其首。歸獻于朝。同館王龜齡目爲魚頭公。聞金人甚貴此魚。一尾之直與牛同。

董德元

德元字體仁。永豐人。少魁鄉舉。累試禮部。不第。就特奏名。補文學。初任寧遠簿。復預漕司薦。紹興戊辰。試禮部合格。遂爲第一。秦檜援引至。參知政事。檜死。以言章罷歸。廬陵。

登第報家人

御筆封題墨未乾。君恩重許拜金鑾。故鄉若問登科事。便是當初老榜官。

獨醒雜志。廬陵之俗。謂特奏名爲老榜。初體仁既預漕舉。謁一達官。干東上之資。達官語坐客有老榜之語。體仁頗不能平。故其詩及之。

尤表

表字延之。無錫人。紹興十八年進士。累遷樞密院正。兼左諭德。孝宗朝。進權禮部侍郎。直學士院。光宗朝。除禮部尚書。卒諡文簡。嘗取孫綽遂初賦以自號。光宗書扁賜之。有遂初小稿。梁溪集。

方萬里跋宋中興來言詩必曰尤楊范陸誠齋時出奇峭放翁善爲悲壯公與石湖冠冕佩玉度臚婉雅

落梅

清溪西畔小橋東。落月紛紛水映紅。一夜客愁花片裏。一年春事角聲中。歌殘玉樹人何在。舞破山香曲未終。卻憶孤山醉歸路。馬蹄香雪襯東風。

劉屯田墓壯節亭劉名渙字凝之

西澗當年卜考槃。便于神武挂衣冠。後生無復知前輩。故老猶能說長官。三尺荒墳埋玉冷。百年壯節倚天寒。表章賴有羣賢力。誰把生芻奠一餐。

玉簪花一名鷺鷥

一種幽花迥出塵。孤高恥逐豔陽辰。瑤枝巧插青鸞扇。玉蘂斜敲白鷺巾。難與松筠爭歲晚。也同葵藿趁時新。西風昨夜驚庭綠。滿院清香惱殺人。

送吳待制守襄陽待制名環吳瑀之弟高宗吳后之姪

方持紫橐侍西清。忽領雄藩向外行。誰謂風流貴公子。甘爲辛苦一書生。詞源筆下三千牘。武庫胸中十萬兵。從此君王寬北顧。山南東道得長城。以上梁溪遺藁

淮民謠

東府買舟船。西府買器械。問儂欲何爲。團結山水寨。寨長過我廬。意氣甚雄麤。青衫兩承局。暮夜連句呼。

句呼且未已。椎剝到雞豕。供應稍不如。向前受笞箠。驅東復驅西。棄卻鉏與犂。無錢買刀劍。典盡渾家衣。去年江南荒。趁熟過江北。江北不可往。江南歸未得。父母生我時。教我學耕桑。不識官府嚴。安能事戎行。執槍不解刺。執弓不能射。團結我何爲。徒勞定無益。流離重流離。忍凍復忍飢。誰謂天地寬。一身無所依。淮南喪亂後。安集亦未久。死者積如麻。生者能幾口。荒村日西斜。破屋兩三家。撫摩力不給。將奈此擾何。

三朝北盟會編。紹興三十一年。金主亮傾國入寇。嘗以

淮南置山水寨。擾民。秦興縣令尤袤竊哀之。作淮民謠。

庚子歲除前一日遊茅山

犯寒出行邁。值此歲云除。剛風駕颿輪。送我遊清都。華陽第八天。仙聖之所居。洞房劣容人。中寬如室廬。橫前大谿水。于焉限塵區。其右萬石林。錯落空翠圖。茅菴著深秀。細路緣崎嶇。幽泉見客喜。頗亦類逃虛。山深日易曛。捷徑趨元符。琳宮照金碧。天籟鳴笙竽。側睨白雲峯。前瞻赤沙湖。金壇聳百丈。陰洞通七塗。俯視人閒世。擾擾眞蟲蛆。早以卑陋質。忝分赤城符。豈悟夙昔緣。復造神霄墟。平生夢寐處。恍若登華胥。歸來拜綠章。足力尙有餘。珍館十六所。安能徧遨娛。窮探恨不盡。太息仍躊躇。茅山志。

遊張公洞并序

舟次湖汊。侍季父伯兄遊洞靈。步行五里。夾道皆喬木參天。鶴巢其上。若欸澗水。漑漑鳴聲甚悲。殆不類人間也。入洞靈宮。覽前賢留題。徘徊久之。由石徑里許。達于洞深數十丈。磴道險絕。俯僂僅可下。下寬廣容數百人。大石離立。或下聳欲落。若劍盾矛戟相撐拄。或臺連峯起而不斷。若虎豹蹲伏俯踞而

挈擢中有小門持炬乃得入丹竈井白在焉由石罅而上皆亂石怪形無窮其狀旁行屈曲益深遠不可到其陽有懸崖滴乳水水流澗谷乍細乍大自成宮商橫澗得小閣可憩朱藤纏絡崖上丹花簌簌下墜芬芳襲人毛髮凜然欲少留而大風作遂歸余遊名山多矣茲游最可紀因成五百字貽我同志以備他日觀覽焉

吾聞荆溪南有地仙所宅十年勞夢想今日著腳歷扁舟下湖洑水漲投沙磧結纜小橋旁杖藜從此適平岡面陂陀疊嶂堆巖積行行兩三里夾道喬木植其大幾合抱其高乃千尺風生萬壑響日照四山赤時搖樹林杪忽見屋宇脊宮門何崢嶸古道頗脩直長廊景曠曠崩殿人寂寂寥落昔賢題摩挲壁閒墨捫蘿上層巔俯瞰得深窟危梯交枝撐鳥道穿詰屈投身乍寬閑跼步仍偪窄攀援愁顛躋傲睨驚險僻懸崖朶頰頰亂石拱劍戟白雲何時橫乳溢或自滴正中空瀆洞了不見天隙冥行迷近遠僂僂猶擿埴巖巖豈人工隱軫入地脈窗幽或篝火俯跪僅容席仙壇尙故處丹竈儼遺跡山蟲鳴啾啾野鼠聲噴噴傳聞老父語以往真莫測中有白玉堂橫絕巨石塞傍連洞庭野欲去不可極潛窺目先旋縱走膝無力迢迢步仄徑突兀出峭壁樅風高枝膠藤蔓青陰羃芳草何芊綿丹花亦狼藉躊躇古亭上頽仰幽澗碧丁當下流水磊砢欲落石雖云培塿高氣與嵩華敵其南有空穴澹瀨般幽黑陰風訝谷吐冷氣森噴逼蛟龍久伏藏金玉闕簡冊靈蹤信茫昧幻怪紛慘戚將無神物守欲與世壤隔平生丘壑志早歲泉石癖豈不思三山所恨無六翮樂哉茲晨遊逸興潛有激仙翁在何許綠髮尙如昔髣髴笙簫聲徘徊鸞鶴翼俗緣磨不盡塵境坐形役何當築衡茅幽討窮日夕風雨西北起天地忽改色倉皇促歸旆造物豈戲劇

良遊易乖忤，眞賞難再得。寄語山中人，重來儻相識。荆溪外紀。

重登斗野亭在江都邵伯鎮梵行院之側。

野色涵空闊，平蕪接渺瀰。江淮天設險，星斗地分維。喬木千年意，滄波萬古悲。老僧猶好事，見客索題詩。
揚州府志。

題米元暉瀟湘圖

萬里江天杳靄，一村煙樹微茫。只欠孤篷聽雨，恍如身在瀟湘。
淡淡曉山橫霧，茫茫遠水平沙。安得綠蓑青笠，往來泛宅浮家。郁氏書畫題跋記。

句

去年江南荒，趁逐過江北。江北不可往，江南歸未得。無題。胸中襞積千般事，到得相逢一語無。寄友人送客漸稀人漸遠，歸途應減兩三程。台州秩滿歸後村詩話。

雍有容

有容，字德裕，資川盤石縣人。紹興十八年進士。

富樂山在巴西縣東。劉備自荊州入蜀，劉璋延之于此山望見蜀之全盛，飲酒樂甚，故得名。

當時四海一劉備，至此已堪悲失腳。出語翻爲樂國想，是人止可偏方著。大漢曾封隆準翁，聞道山河錦繡中。安能鬱鬱久居此，睥睨三秦日欲東。方輿勝覽。

陳天麟

天麟字季陵。宣城人。紹興十八年進士。累官集賢殿修撰。歷知饒州。襄陽。贛州。鎮江。有櫻寧居士集。

登上嶺遊黃山

朝陽滉漾水朦朧。曉煙橫抹天微風。三十六峯不著色。點綴淡墨排秋空。小山連延大山倨。林深無人但雲樹。平生愛山真成癖。我以意行本無住。黃山之路何岐危。黃山之溪何漣漪。登山度水亦勞止。正要行役發吾詩。仙家與世不相遠。徑入桃源亦良便。向來父老亦嘗行。竹籜桃花大于扇。黃山志。

石壁道中

雲山疊疊石齒齒。山色溪聲三十里。霜餘木葉半丹青。道上松風雜宮徵。捨車而徒度險艱。邇來跼足愁躋攀。官閑無祿與王事。不妨拄杖對潺湲。

旌陽道中

山邑無郵傳。農夫半甲兵。石樓橫斷岸。草徑入荒城。聞道甘泉駕。將臨細柳營。風塵何日靜。留眼看昇平。

勝因寺

山行詰曲到禪林。臺殿丹青歲月深。薄晚春寒生几席。逼人空翠撲衣襟。客塵冉冉凌清思。俗狀紛紛費苦吟。若得一丘容我老。便攜藜杖事幽尋。

風玉亭

夜聞騷屑此君語。晨起急登風玉亭。一笑相逢珍重別。不隨人改舊時青。以上寧國府志。

呂城舟行晚晴

楊柳隄長月一灣。芙蓉花小蓼初斑。孤帆白鳥無邊水。殘日斷雲何處山。遠客自應歸興動。新詩都在晚晴閒。功名有底催人去。只合漁樵作往還。宛雅。

葉衡

衡字夢錫。婺州金華人。紹興十八年進士。孝宗朝。拜右丞相兼樞密使。責授安德軍節度使。郴州安置。復官與祠。

句

水花分塹弱。山木抱雲稠。更宿招提境。還同惠遠遊。鹿田寺集杜。謝翱金華遊錄。

石才孺

才孺字伯元。鄭州管城人。紹興十八年進士。

青陽驛在順政縣東。

幸蜀奔波為祿兒。聞鈴夜雨有餘悲。青陽一夕難高寢。黼幄千官減盛儀。方輿勝覽。

莫汲

汲字子及。吳興人。濟弟。紹興十八年進士。為學官。以言獲罪。南遷石龍。

談鑰吳興志。莫礪字彥輔。君陳之子。有子曰伯鎔。字器之年。五十即歸休。以迎師教子。為事子三人。曰濟。曰汲。曰沖。皆有峻聲。擢進士第。時號三莫。後濟。沖。又中博學宏詞科。

石龍泛海作

一颿點破碧落界。八面展盡虛無天。柁樓長嘯海波闊。今夕何夕吾其仙。

齊東野語。石龍地並海。子及素負邁往之氣。暇日具大舟。招一時賓友之豪。泛海以自快。將至北洋。海之尤大處也。舟人畏不敢進。子及大怒。脅之以劍。不得已從之。及至四顧無際。浪涌舟掀。簾如桔槔。見三魚皆長十餘丈。浮弄日光。衆皆戰慄不能出。語子及命大白連弱。賦詩數絕。興盡乃返。

芮 暉

暉字國器。一字仲蒙。烏程人。紹興十八年進士。歷官御史。司業。祭酒。卒。呂東萊再娶。乃其女也。

董斯張吳興備志。芮國器官左從郎。仁和縣尉。嘗和沈長卿牡丹詩云。寧知漢社稷。變作莽乾坤。奉檜惡之。坐貶化州。檜死始召還。

從沈文伯乞娑羅樹碑

楚州淮陰娑羅樹。霜露榮悴今何如。能令草木死不朽。當時爲有北海書。荒碑雨侵澀苔蘚。尙想墨本傳東吳。睿齋四筆。

題爲花亭

人言多技亦多窮。隨意文章要底工。淮海秦郎天下士。一生懷抱百憂中。

後村詩話。李少遊常謫廬州。後人植柳。

邊沙外詞中語。爲鶯花亭。題詠甚多。

羅浮寶積寺

木落天寒山氣沈。年華客意共蕭森。偶于佳處發深省。其實宦遊非本心。紅日坐移鐘閣影。白雲閑度石樓陰。還家莫話神仙事。老不寬人雪滿簷。瀛奎律髓

芮輝

輝字國瑞。國器弟。同登紹興十八年進士。仕至尙書。

更戴溪亭爲興盡亭。仍賦詩。

溪山之興無時盡。興盡名亭意可知。出岫孤雲含細雨。投林宿鳥愛深枝。風流已是千年事。公案今成七字詩。短棹悠然隨所適。人生出處要如斯。剡錄

宋詩紀事卷四十八

錢唐 厲鶚 緝
歙 方輔 勘定

朱子

諱熹字元晦。一字仲晦。世爲徽州婺源人。父韋齋先生松。宦遊建陽之考亭。遂家焉。紹興十八年。中王佐榜進士。寧宗朝。歷官寶文閣待制。僞學禁起。落職奉祠卒。累贈寶謨閣直學士。謚曰文理宗朝。贈太師。追封徽國公。從祀孔子廟庭。曾結草堂于建陽蘆峯之雲谷。扁以晦菴。亦號雲谷老人。旣又創竹林精舍。更號滄洲病叟。最後因筮遇遯之同人。更名遯翁。有文集。

齋居感興二十首并序 存十首

余讀陳子昂感寓詩。愛其詞旨幽邃。音節豪宕。非當世詞人所及。如丹砂空青金膏水碧。雖近乏世用。而實物外難得自然之奇寶。欲效其體。作數十篇。顧以思致平凡。筆力萎弱。竟不能就。然亦恨其不精于理。而自託于仙佛之間。以爲高也。齋居無事。偶書所見得二十篇。雖不能探微索眇。追迹前言。然皆切于日用之實。故言亦近而易知。旣以自警。且以貽諸同志云。

峴崙大無外。旁薄下深廣。陰陽無停機。寒暑自來往。皇犧古神聖。妙契一俯仰。不待窺馬圖。人文已宣朗。渾然一理貫。昭晰非象罔。珍重無極翁。爲我重指掌。

人心妙不測。出入乘氣機。凝冰亦焦火。淵淪復天飛。至人秉元化。動靜體無違。珠藏澤自媚。玉韞山含暉。神光燭九垓。懸思徹萬微。塵編將寥落。歎息將安歸。靜觀靈臺妙。萬化此從出。云胡自蕪穢。反受衆形役。厚味紛朵頤。妍姿坐傾國。崩奔不自悟。馳騖靡終畢。君看穆天子。萬里窮轍跡。不有祈招詩。徐方御宸極。

涇舟膠楚澤。周綱已陵夷。況復王風降。故宮黍離離。元聖作春秋。哀傷實在茲。祥麟一以踣。反袂空漣洏。漂淪又百年。僭侯荷爵珪。王章久已喪。何復嗟歎爲。馬公述孔業。託始有餘悲。拳拳信忠厚。無乃迷先幾。東京失其御。刑臣弄天綱。西園植姦穢。五族沈忠良。青青千里草。乘時起陸梁。當塗轉凶悖。炎精遂無光。桓桓左將軍。仗鉞西南疆。伏龍一奮躍。鳳雛亦飛翔。祀漢配彼天。出師驚四方。天意竟莫回。王圖不偏昌。晉史自帝魏。後賢盍更張。世無魯連子。千載徒悲傷。晉陽啓唐祚。王明紹巢封。乘統已如此。繼體宜昏風。塵聚瀆天倫。牝晨司禍凶。乾綱一以墜。天樞遂崇崇。淫毒穢宸極。虐焰燔蒼穹。向非狄張徒。誰辦取日功。云何歐陽子。秉筆迷至公。唐經亂周紀。凡例孰此容。侃侃范太史。愛說伊川翁。春秋二三策。萬古開羣蒙。放助始欽明。南面亦恭已。大哉精一傳。萬世立人紀。猗歟歎日躋。穆穆歌敬止。戒熒光武烈。待旦起周禮。恭惟千載心。秋月照寒水。魯叟何常師。刪述存聖軌。顏生躬四勿。曾子曰三省。中庸首謹獨。衣錦思尙綱。偉哉鄒孟氏。雄辨極馳騁。操存一言要。爲爾挈裘領。丹青著明法。今古垂煥炳。何事千載餘。無人踐斯境。

飄飄學仙侶。遺世在雲山。盜啓元命祕。竊當生死關。金鼎蟠龍虎。三年養神丹。刀圭一入口。白日生羽翰。我欲往從之。脫屣諒非難。但恐逆天道。偷生詎能安。

西方論緣業。卑卑喻羣愚。流傳世代久。梯接凌空虛。顧盼指心性。名言超有無。捷徑一以開。靡然世爭趨。號空不踐實。躡彼榛棘塗。誰哉繼三聖。爲我焚其書。以上大全集。

贈上封諸老

夜宿上封寺。翛然塵慮清。月明殘雪裏。泉溜隔松聲。楮衲今如許。綈袍那復情。爐紅虛室煖。聊得話平生。

醉下祝融峯

我來萬里駕長風。絕壑層雲許盪胸。濁酒三杯豪氣發。朗吟飛下祝融峯。

路出上背仰見上封寺。遂登絕頂聯句。同張敬夫林擇之。

我尋西園路。徑上上封寺。竹輿不留行。及此秋容霽。磴危霜葉滑。林空山果墜。崇蘭供清芳。深壑遞幽吹。不知山益高。但覺冷侵袂。路回屹陰崖。突兀聳蒼翠。故應祝融尊。羣峯拱而峙。金碧雖在眼。勇往詎容憩。絕頂極遐觀。腳力聊一試。昔遊冰雪中。未盡登臨意。茲來天宇肅。舉目淨纖翳。遠邇無遁形。高低同一視。永惟元化功。清濁分萬類。運行有機緘。浩蕩見根柢。此理復何窮。臨風但三喟。

自上封登祝融峯絕頂聯句

衡岳千仞起。祝融一峯高。羣山畏突兀。奔走如曹逃。我來雪月中。歷覽快所遭。捫天滑青壁。俯壑崩銀濤。所恨無十犢。一掣了六鼇。過歸青蓮宮。坐對白玉毫。重閣一徙倚。霜風利如刀。平生山水心。眞作貨食饕。

明朝更清徹。再往豈憚勞。中宵撫世故。劇如千蝟毛。嬉游亦何益。歲月今滔滔。起望東北雲。茫然首空搔。
以上南岳倡酬集。

寄劉珙胡憲一絕

先生去上芸香閣。胡閣老新峨獬豸冠。
劉除御史 留取幽人臥空谷。一川風雨要人看。
翠屏筆談。

九日登天湖分歸字韻

去歲瀟湘重九時。滿城寒雨客思歸。故山此日還佳節。黃菊清樽更晚暉。短髮無多休落帽。長風不斷且吹衣。相看下視人寰小。祇合從今老翠微。
詩林萬選。

次陸子靜韻

德義風流夙所欽。別離三載更關心。偶扶藜杖過寒谷。又枉籃輿度遠岑。舊學商量加邃密。新知培養轉深沈。只愁說到無言處。不信人間有古今。

庶齋老學叢談。晦菴象山二先生。不惟以書往復辨論無極。鷓湖倡和。尤見旨趣。象山詩云。墟墓生哀宗廟欽。斯人千古最靈心。涓流積至滄溟水。拳石崇成太華岑。簡易工夫終久大。支離事業竟浮沈。欲知自下升高處。真偽先須辨古今。晦菴次韻云。

枕屏秋景

山寒夕颿急。木落洞庭波。幾疊雲屏好。一生秋夢多。

遠遊篇十九歲作

舉坐且停杯。聽我歌遠遊。遠游何所至。咫尺視九州。九州何茫茫。環海以爲疆。上有孤鳳翔。下有神駒驥。孰能不憚遠。爲我遊其方。爲子承尊酒。擊鉢歌慨慷。送子臨大路。寒日爲無光。悲風來遠壑。執手空徊徨。問子何所之。行矣戒關梁。世路百險艱。出門始憂傷。東征憂陽谷。西遊畏羊腸。南轅犯癘毒。北駕風裂裳。願子馳堅車。躡險摧其剛。峨峨旣不支。瑣瑣誰能當。朝登南極道。暮宿臨太行。睥睨卽萬里。超忽凌八荒。無爲蹙蹙者。終日守空堂。

虞帝廟樂歌

皇胡爲兮山之幽。翳長薄兮俯清流。渺冀州兮何有。眷茲土兮淹留。皇之仁兮如在。子我民兮不窮以愛。沛皇澤兮橫流。暢威靈兮無外。潔尊兮肥俎。九歌兮韶舞。嗟莫報兮皇之祐。皇欲下兮儼相羊。烈風雷兮暮雨。以上濂洛風雅。

挽沈菊山

愛菊平生不愛錢。此君原是菊花仙。正當地地下修文日。恰值人間落帽天。生與唐詩同一脈。死隨陶令葬千年。如今忍向西郊哭。東野無兒更可憐。

杭州府志。沈菊山。袁州宜春人。由進士知錢唐。嘗植菊數百。

本以自樂晚節益堅。適以九月九日歿。朱文公挽之云云。

月波臺

潺湲流水注回塘。中作平臺受晚涼。四面不通車馬跡。一樽聊飲芰荷香。韓公無復吟花鳥。楚客何妨賦

藥房少待須臾更清徹。月華零露洗匡牀。

衢州府志。月波臺在開化縣金錢山北。

宋山長江天然建。朱子過訪。作此遺之。

德興縣葉元愷家題

蔥湯麥飯兩相宜。蔥煖丹田麥療飢。莫道儒家風味薄。隔鄰猶有未炊時。大全集補遺。

張 祁

祁字晉彥。烏江人。邵弟。號總得居士。以子安國魁多士。秦檜羅織下獄。檜死獲免。官至淮南漕運判官。

荅人覓茶

內家新賜密雲龍。只到調元六七公。賴有家山供小草。猶堪詩老薦春風。清波雜誌。

渡湘江

春過瀟湘渡。眞觀八景圖。雲藏岳麓寺。江入洞庭湖。晴日花爭發。豐年酒易沽。長沙十萬戶。游女似京都。瀛奎律髓。

題靈仙觀

樓殿起山巔。無塵地自偏。松廊暗雲霧。粉壁豔神仙。名姓藏丹府。衣冠訪洞天。幼輿丘壑質。定合老松泉。安慶府志。

田如鼇

如鼇號癡叟。贛州人。紹興中。左宣教郎。知道州。

題司馬端衡米元暉詩意卷

萬頃長江水。接天中有峯巒聳蒼綠。青霄影蘸白蟾蜍。浩浩澄波晃寒玉。少陵詩名冠古今。一生苦吟吟不足。端衡寫作無聲詩。留與拙堂伴幽獨。

郁氏書畫題跋記。如鼇跋云。司馬君實米元章德行文采。皆本朝第一等人。恨余生晚。不見前輩。今觀二公墨妙。追想終日爲之慨然。二公非畫師。何乃精絕。至是。豈鳳雛驥子。其天資超詣。種種自不同乎。紹興十八年九月二十六日。

沈少南

儲福宮玉真公主像

六峯如列屏焉。

儲福宮在蜀天倉峯下。有唐睿宗女玉真公主及明皇像。乃公主修真之地。有天峯閣。望青城山三十

割盡齊封奉魯元。更開沁水占名園。何如帝子空山外。落日騎驢芳草原。方輿勝覽。

胡叔豹

儲福宮

棄形如遺。但養神。阿兄爛醉梨園春。人百撼之耳不聞。何物女子乃獨醒。徑來空山臥白雲。不見漁陽胡馬塵。方輿勝覽。

歐陽鈇

鉄、字伯威。號寓菴。廬陵人。少與周益公同場屋。連戰不利。篤意于詩。有脞辭集。

絕句

戀樹殘紅溼不飛。楊花雪落水生衣。年來百念成灰冷。無語送春春自歸。
桑麻得雨更青蔥。芍藥留春結晚紅。怪得鳥聲如許好。此身還在亂山中。
爲憐紅杏亞枝斜。看到斜陽送亂鴉。又是一春窮不死。天教留眼看鶯花。
篷窗臥聽疎疎雨。卻是芭蕉夜半聲。煙浪蔽天天倚蓋。略容一點白鷗明。

示二子

先君以官貧。我乃遺以安。但願兩兒健。扶持一翁孱。何須待門生。悠然柴桑閒。

游愚堂

聞說名園向脩竹。花壓頽垣筍穿屋。雨痕半掩壁閒題。飢鼠跳梁狐晝啼。前人已爲後人笑。後人更使誰人悼。嗚呼全盛幾時素。衰何古來興廢何其多。以上詩人玉屑

禾山秋興

生計嗟烏有。誰人問子虛。西風五更雨。南雁數行書。衰朽兒童笑。飄流歲月餘。秋深新病起。吾志在吾廬。
夜起集萬感。胡爲淹此留。詩成夔子國。人在仲宣樓。絡緯聲中淚。芭蕉雨裏愁。遙知屢門倚。應念有方游。
以上詩林萬選

句

細雨雙飛鷺。寒蓑獨釣船。誰知花過半。纔與酒相尋。故人驚會面。新恨說從頭。天上張公子。人閒陸士龍。夢回千里外。燈轉一窗深。月白元猿哭。更殘絡緯悲。語離遽如許。話舊復何時。風色似傳花信到。夕陽微放柳梢明。巷南巷北人招飲。一雨一晴花耐看。有客過門湖海士。隔籬呼酒咄嗟閒。夢回金馬玉堂上。文在冰甌雪碗中。青山如故情非故。芳草喚愁詩遣愁。擾擾征人相顧語。蕭蕭落木不勝秋。千里歸來人事改。十年猶幸此身存。

詩人玉屑楊誠齋跋云。鳥啼花落。欣然會

心處。酌大白。喚伯威詩。欲馭風騎氣也。

晁公休

公休、公武之兄。

夏日過莊嚴寺僧索詩。爲留絕句。拉舍弟同賦。

十里溪橋梵宇新。那知陌上漲紅塵。老僧苦要題名姓。不道林泉皆故人。
病起支離倚瘦筇。幅巾芒屨竹陰中。聞蟬未有驚人句。且受禪牀一榻風。
成都文類。

晁公武

公武字子止。鉅野人。冲之之子。秦檜辟爲四川總領財賦司幹辦公事。乾道中。以敷文閣直學士爲臨安府少尹。有郡齋讀書志。昭德文集。

夏日過莊嚴寺僧索詩。爲留絕句。

笑脫塵衫撲軟紅。杖藜徙倚水光中。最憐林葉深深處。遮盡斜陽不礙風。
出門散策煙樓樹。歸路扶輿月蛻雲。十里江村入圖畫。野橋沙路杳難分。成都文類

遊焦山

江勢東傾劇建瓴。中流巖壑隱禪扃。遊僧誰渡降龍鉢。過客爭摸瘞鶴銘。脩竹捎雲凌北固。桃花吹浪漲南溟。上人勸賦斯山境。乞與微吟勒翠屏。京口三山志

登金山

東游尋勝卽登臨。浮玉知名冠古今。萬壑波濤喧海口。千年巖岫據江心。雨篷煙棹征帆遠。曉磬昏鐘佛屋深。詩客分留風景在。憑君一爲發長吟。金山志略

晁公邁

公邁字子西。公武之弟。有嵩山集。

秋江

秋江水清不勝綠。還與漢江顏色同。望中白鳥忽飛去。落日丹楓相映紅。

詠瓶中梅

折得寒香日暮歸。銅瓶添水養橫枝。書窗一夜月初滿。卻似小溪清淺時。

感事

征衣消盡洛陽塵。泣向東風拭淚痕。不及青春歸有信。一年一到樂遊園。

有感

不見罽毼闕。于今已十春。素衣不忍棄。爲有洛陽塵。以上嵩山集。

合江舟中作

雲氣昏江樹。春流沒釣磯。如何連夜漲。似欲送人歸。亂石水聲急。片帆風力微。舟師且停櫓。白鷺正雙飛。
成都文類

吳說

說字傅朋。錢唐人。廣陵王逢原之外孫。官至郎中。

樓大防云。錢唐吳傅

朋游絲字。前無古人。

酬次李辰甫所寄三首

近知盡室入煙霞。兒女甘貧慣食鮭。方外何人差可友。歲闌底處定爲家。江城潮盛漫秋鹵。驛道風高捲
霧沙。子拾墮樵歸未得。能無借地種桃花。
桐花竹實幾時生。桑野秋枯繭未成。肯信飢寒能累道。唯餘寂寞許尋盟。年顏已媿神仙事。江海難忘故
舊情。何日往來同井徑。清談清坐到天明。
扁舟東下初乘興。明月南飛竟失羣。田父語言時近道。世人嘲笑尙論文。九山斂氣橫寒野。一塢朝陽聚
暖雲。勝處借人教暫看。後來何必問靈氛。
見真蹟詩帖

題仙都山

佳處從來說鼎湖。茲游直欲到清都。參天玉筍千尋許。墮地金蓮十丈無。江觀便思眠一柱。海山今喜識方壺。直須買取鵝溪絹。要畫滄洲水墨圖。仙都山志。

吳環

環、高宗吳后姪。以待制帥襄陽。歷少師致仕。贈永安郡王。

句

飽看七寶山頭月。慣聽三茅觀裏鐘。瀛奎律髓。

曾慥

慥字端伯。晉江人。孝寬曾孫。丞相懷之從兄。官尚書郎。直寶文閣。奉祠。閑居銀峯。集百家類說。凡六百二十餘種。自號至游居士。

白帝城

白帝城頭路。透迤一徑遙。高堂臨峽尾。暴水沒山腰。隔岸漁施網。橫江鐵貫橋。神妃翻覆手。願賜雨連宵。全蜀藝文志。

題蘇養直詞翰軸後

元祐文章絕代無。爲主盟者眉山蘇。舊聞宗匠爲詩匠。今見東湖說後湖。原注：徐師川號東湖居士。寂寞香山老居士。浩蕩煙波古釣徒。瀾翻翰墨驚人眼。一段清冰在玉壺。鐵網珊瑚。

郭章

章字仲達。崑山人。少入太學。以守城恩拜官。被知己薦居帥幕。久之官至通直郎。

歸省賦別同舍

菽水年來屬未涯。羞騎款段出京華。漲塵回旋風頭緊。綺照支離日腳斜。掠過短莎驚脫兔。踏翻紅葉鬧歸鴉。不堪回首孤雲外。望斷淮山始近家。

也知隨俗調歸策。卻憶當年重出關。豈是長居戶限上。可能無意馬蹄閒。中原百甓知誰運。今日分陰敢自閑。儻有寸功裨社稷。歸來恰好試衣斑。中吳紀聞

方豐之

豐之字德亨。莆田人。監豐國鎮。及與呂紫薇交游。陸放翁序其詩。

歷崎道中

漠漠春陰接海低。濛濛晚雨傍山飛。半敲古埭無人過。時有村童護鴨歸。後村詩話

章淵

淵字伯淵。惇之後。用蔭入仕不就。卜居長興之若溪。有槁簡贅筆。

子夜吳歌并序

齊梁以來。江南樂府詞。多采方言。用之穩帖。不覺爲俗語。吳中下里之曲。有云。消梨應郎心上冷。甘蔗應郎心上甜。又云。羅裙十二褶。小妻也是妾。皆有類樂府詞。余因爲子夜吳歌二章云。

消梨得能冷。甘蔗復能甜。總應郎心上。爲儂素比纈。
桃根復桃葉。羅裙十二褶。阿郎歡自濃。小妻也是妾。樞簡贅筆

妙庭觀

桃花流水小橋斜。古觀臨溪翠竹遮。聞道雙成有遺跡。欲求金鼎看丹砂。杭州府志

會協

協南豐人肇孫。以詞賦魁胄監。終于知永州。有雲莊集。

芭蕉

炎蒸誰解喚清涼。扇影搖搖上竹窗。準擬小軒添睡美。夢成風雨夜翻江。全芳備祖

康執權

執權官待制奉祠。寓居永嘉。

戲爲妓山氏作

昔日緹縈亦如許。盡道生男不如女。河陽滿縣皆春風。忍使梨花偏帶雨。

庚溪詩話。永嘉籍妓中有山姓者。頗慧麗。康時命之侑尊。一日妓之父以事繫縣。當坐罪。妓涕泣歷求。救于士大夫。康憫之。戲爲一絕云。明日妓詣縣投狀。乞代父罪。且連此詩于狀前。邑宰笑而釋之。

曾季狸

季狸字裘父。號艇齋。南豐人。文定公弟宰之孫。大理司直晦之子。再舉進士不第。師事韓子蒼。呂

居仁。又與朱晦翁、張南軒書問往復。郡守張孝祥、樞密劉珙薦皆不起。有艇齋雜著。

陸放翁序文辭簡遠。讀之者遺聲利冥得喪。如見東郭順子悠然意消。然可傳之作。尚不止此。遺珠棄璧。識者與歎。屬郡博士趙去華訪其遺集以補之。

秦女行并序

靖康閒。有女子爲金人所掠。自稱秦學士女。在道中題詩云。眼前雖有還鄉路。馬上曾無放我情。讀者悽然。余少時常欲紀其事。因循數十年。不克爲之。壬辰歲九月。因讀蔡琰胡笳十八拍。慨然有感于心。乃爲之追賦其事。號秦女行云。

妾家家世居淮海。郎罷聲名傳海內。自從貶死古藤州。門戶凋零三十載。可憐生長深閨裏。耳濡目染知文字。亦嘗強學謝女詩。未敢女中稱博士。年長以來逢世亂。黃頭鮮卑來入漢。妾身亦復墮兵閒。往事不堪回首看。飄然一身逐胡兒。被驅不異犬與雞。奔馳萬里向沙漠。天長地久無還期。北風蕭蕭易水寒。雪花席地經燕山。千杯虜酒安能醉。一曲琵琶不忍彈。吞聲飲恨從誰訴。偶然信口題詩句。眼前有路可還鄉。馬上無人容我去。詩成吟罷只茫然。豈意漢地能流傳。當時情緒亦可想。至今聞者猶悲酸。憶昔中郎有女子。亦陷虜中垂一紀。暮年不料逢阿瞞。厚幣贖之歸故里。惜哉此女不得如。終竟老死留穹廬。空教詩語傳悽惻。不減胡笳十八拍。梅磻詩話。

金沙寺

古寺同真率。君家更秩筵。酒杯無算飲。橘樹不論錢。勝日攜佳客。曾來是去年。莫嫌頻至此。直爲主人賢。

宿正覺寺

古寺荒涼甚。秋風更颯然。殿焚猶有礎。僧老不知年。但可扶藜至。無因假榻眠。鐘魚久寂寞。誰施一囊錢。

疎山道中

在金谿縣西南。

村深谷鳥近人鳴。暮靄收時雨又晴。極目春山隨處好。笳輿穿盡綠陰行。
江南九月未飛霜。木葉蕭蕭已半黃。行徧疎山山下路。滿山惟有桂花香。

雲谷山

城東三十五里有山曰芙蕖。荀伯子臨川記云。巖內有石人坐盤石上。體摩則風澗則雨。晴則瑩潔。今日東巖嶺。其東南爲靈谷。諸峯連抱如障多石。其上祀三仙。曰隱真觀。有謝靈運墨池。

舊聞伯子記。已得靈谷名。隱然望此州。奇勝稱山靈。懸崖瀉瀑布。如高屋建瓴。喬松數十丈。下有千歲苓。仄足行鳥道。勢欲搏青冥。仙事雖渺茫。幽討未忘情。高秋八月後。擇勝來經行。黃冠三兩人。淡然亦忘形。煙霞到几席。爽氣來戶庭。瘦筇閑指點。老瓦同注傾。慙非換鵝手。不敢臨黃庭。或可聯石鼎。未必讓彌明。重陽無十日。黃菊漸向榮。佳哉此天氣。一笑未易營。但願腳力健。年年此尋盟。以上撫州府志。

韓元吉

元吉字无咎。號南澗。許昌人。維四世孫。寓居信州。隆興閒。官吏部尙書。有南澗甲乙稿。

朱子云。韓无咎詩。作者儘和平。

有中原之舊。無南方啾嘶之音。

黃玉林云南澗名家文獻
政事文學爲一代冠冕

玩鞭亭

黃鬚鮮卑勇無策。自馳巴馬來窺賊。賊奴但怪日繞營。起看飛塵已無迹。寶鞭不惜棄道旁。坐令老嫗知興亡。百年社稷有天意。姦鋒逆燄徒鴟張。孤城遺跡森在目。平湖無復春草綠。卻對青山憶謝公。父老猶嫌人姓木。邊兵已重朝士輕。中原有路何由行。柙中虎兕不可制。江左夷吾浪得名。方輿勝覽

雨中聞伯恭至湖上

莫嫌鞭馬踏春泥。茶鼎詩囊偶共攜。山色雨深看亦好。湖光煙接望還迷。連天花絮飛將盡。夾道蒲荷長欲齊。官事得閑須洗眼。蓬壺只在帝城西。

送陸務觀福建提倉

舩船相對百分空。京口追隨似夢中。落紙雲煙君似舊。盈巾霜雪我成翁。春來茗葉還爭白。臘盡梅梢盡放紅。領略溪山須妙語。小迂旌節上凌風。元注僕爲建安宰作凌風亭以上瀛奎律髓

題北齊校書圖并序

齊文宣天保七年詔樊遜校定羣書。供皇太子。遜與諸羣秀高乾和馬敬德許散愁韓同寶傅懷德顧道之季道子鮑長暄景孫及梁王主簿王九元水曹參軍周子深等十一人借邢子才魏收諸家本共刊定祕府紕繆。于是五經諸史殆無遺闕。此圖之所以作也。黃太史所謂士大夫十二員。今范明州謂

逸其半者皆是矣。至唐已隔周隋二代。不知何自得其形容髣髴邪。高氏起索虜。以兵力奮然敦尚儒風。立石經。興黌序。定尚書于涼風堂。質經義于春宮。意當時文士歆豔之。故相傳于圖畫哉。流及後裔。文林之館既興。御覽之書既作。無愁之聲已播于天下。不揅其亡。故余感而賦。

齊高校讎。誰作圖。一時袖書亦名儒。網羅卷軸三千餘。俗傳非真類迂愚。雌黃是正定不無。虛文末學徒區區。豈識治道通唐虞。文林高館希石渠。後來御覽嗟何書。修文偃武事益誣。轉頭鄴城已丘墟。峨冠廣袖長眉鬚。丹青寫此猶不渝。高鬢侍女曳紅裾。兩驩帕鞍立奚奴。罷琴涉筆傾酒壺。蘭臺供擬信樂歟。不知畫手安用摹。無乃逞巧聊自娛。千年視之一歎歎。君不見文皇學士十八人。謀猷事業皆功臣。瀛州舊圖應更真。請君尋觀爲拂塵。硯北雜志。

隆興甲申歲閏月遊焦山

荒村日晴雪猶積。繫纜焦公山下石。江翻斷崖石破碎。瘞鶴千年有遺跡。瘦藤百級躋上方。浮玉南北江中央。橋竿如林出煙浦。酒船遠與帆低昂。老鷗盤風舞江面。殺氣淮南望中見。神龍只合水底眠。爲洗乾坤起雷電。觀音巖前竹十尋。大士不死知此心。醉歸更喚殷七七。賸種好花開鶴林。鎮江府志。

雲洞在信州西

揮策度絕壑。撐空見樓臺。丹崖幾千仞。中有佛寺開。老僧如遠公。膺門走蒿萊。下馬問所適。褰衣指崔嵬。飛闌倚石磴。曠蕩無纖埃。坐久意頗愜。爽氣生樽壘。仙棺是何人。蛻骨藏莓苔。舉酒一酌之。慨然興我懷。丹砂固未就。白鶴何時來。不若生前樂。長嘯銜此杯。廣信府志。

高元之

元之字端叔。武烈王瓊之七世孫。南渡家明州。五上禮部不第。人號萬竹先生。有茶甘甲乙稿。題雪竇飛雪亭。

危亭上拂煙霧光。蒼崖深到蛟螭穴。天河飛來破山翠。寒入疎林風自發。翻珠錯玉無時歇。巖前散作千秋雪。寒聲蕭蕭凜毛髮。白雲朵朵翔空滅。飛流濺沫入毫端。天與一詩爲題絕。延祐四明志。

大小晦山

大晦出小晦。過盡山峯翠。寒雲抱幽谷。枯卉老墻瀨。沿流路偏側。當道屋破碎。卻立重回首。瀑布瀉雲背。甬上書齋集。

句

灑窗蠶食葉。入竹蟹行沙。

娛書堂詩話。四明高端叔。博學能詩。鄉里所推重。嘗有雪詩一聯云。竟坎壈不仕。樓攻媿挽之云。弟子皆藍綬。先生竟白袍。

曾、逮

逮字仲躬。幾季子。仕終敷文閣待制。有習菴集。

清樾軒

在信州廣教寺卽文清所居。

開軒在獨園。繞屋得清樾。不知何年樹。殆爲今日設。窗扉落林影。時復亂風月。喧聲了不聞。幽弄極可悅。

玉溪僧所廬。無似許明潔。頗疑三昧手。斷取從三浙。禪房花木深。此語信佳絕。何以落其成。爐烹薦茗雪。
廣信府志。

王 鈇

鈇字承可。秦檜舅氏王本觀復之子。檜薦于朝。除樞屬。仕至貳卿。

墨梅

前身姑射冰相似。今代潘妃玉不如。坐對眞成在江國。淡煙微雨暗扶疎。
聲畫集。

絕句

津頭短短長長柳。陌上朱朱白白花。一段風煙三百里。杜鵑愁絕客思家。
錦繡萬花谷。

李 牧

牧字子牧。

次韻曾端伯晚過青山

怪底塵勞破青山。在眼中。竹橋低跨水。林磬小鳴風。半嶺暮雲碧。一村霜葉紅。禪枝棲衆鳥。回首意無窮。
前賢小集拾遺。

刁 麟游

麟游。南徐人。失其名。以字傳。

賦竹馬

小兒騎竹作驢。猶是東西意未休。我已童心無一在。十年渾付水東流。

竹坡詩話。南徐刁氏子。字麟游。十歲時作竹

馬詩。後十歲卒。客有志其墓者。以比李長吉。

張堯臣

堯臣、陳留人。入南渡。

寄洞霄道士王竹菴

一笑相逢已隔秋。人間多事苦相留。亂雲有路通仙境。清夢何因訪昔遊。白日無情傷老大。青山此地可藏修。與君宿有誅茅約。爲卜來賢一室幽。洞霄詩集

何 陋

陋號唯齋。

贈竹菴王先生

巾盂肯復聽齋鐘。隱處何妨作退翁。一榻但留詩軸伴。萬緣都付酒杯空。松顛舞月歸巢鶴。竹下敲門探藥童。風定雲眠人不到。倚闌凝目看飛鴻。洞霄詩集

朱謙之

朱買臣廟

貧賤難堪俗眼低。區區何事便雲泥。會稽乞得無他念。祇爲歸來詫故妻。

談載嚴州壽昌縣道旁有朱買臣廟其地有朱池村朱謙之詩云云

姚述堯

述堯錢唐人有蕭臺公餘詞

句

蒹蒹魚鹽喧古市聲聲弦誦徧儒家過青田 方輿勝覽

顧發

發字休文崑山人

待潮顧浦宿耕者張欽舍

海近雲氣昏禹跡開茫茫晴林列障邏什伍屯千岡頃遭七年旱驟見九秋黃腰鎌喜復悲泥水新圃場
縣侯初下教官賦無豐荒錯揮製錦刀戲作編氓創身上催租瘢短褐愁蓋藏課爲五邑最薦飛十剡章
遂巡掌邦計跬步封侯王江淮十萬師待飼正頡吭禾麥今已登婦子戒勿嘗行俟天雨粟飽食均四方

崑山雜詠

宋詩紀事卷四十九

錢唐 厲鶚 緝
錢唐 金肇鐸 勘定

林季仲

季仲字懿成永嘉人南渡時太常少卿守婺州

送會稽虞仲琳虞頗通性理之學

男兒何苦弊羣書學到根源物物無曾子當年多一唯顏淵終日只如愚水流萬折心無競月落千山影自孤執手沙頭休話別與君元不隔江湖

題赤松山皇初平祠

路轉溪回草木香有人荷笠山之陽定知我是金華守笑道牧民如牧羊羽仗霓旌去不還空餘水落人間至今山下無苦旱便是田家九轉丹以上庚溪詩話

劉無降

遊秀峯寺

曉乘輕舸出江城晚上籃輿卻倦行盡日松風響巖谷小窗聽作亂泉聲吳郡志

聞人武子

武子紹興閒人。張綱有閒人武子改官制。

墨梅

隴首人歸信息稀。愁看冰楮破寒枝。瑤姬駐立緣何事。直到霜飛月墮時。聲畫集

王鎬

鎬字從周。永嘉人。仕至忠州守。

移竹後雨

洗紅宰宰烏。蔭雨落紫颺颺。阜角風挂起。北窗聊問訊。新移來竹定惺鬆。詩人玉屑

句

髮爽帶風梳。齒疎和月漱。早行未知真是岳。祇見半爲雲。望岳避喧那厭雨。宜睡不思茶。觀橋寓樓雲學

催詩黑。風仍作誦清。將雨凍雪寒梅雙蠟屐。澄江明月一竿絲。紹師覓詩催租例擾潘邠老。付麥誰憐石

曼卿。送潘文叔山色兩閒供步障。松陰半畝當郵亭。出春陵籍通上界神仙府。身見甘泉侍從臣。上何尙書

以上娛書堂詩話

葉采

采字仲圭。號平巖。

書事

雙雙瓦雀行書案。點點楊花入硯池。閑坐小窗讀周易。不知春去已多時。濂洛風雅

陳光道

光道字不矜南城人。

夢中贈神女蔡箏娘十首存四。

長恐凡材不合仙。喜逢神女熟因緣。雲中隱隱開金鎖。路入麻姑小有天。
海石榴花映綺窗。碧芙蓉朵亞銀塘。青鸞不舞蒼虬臥。滿院春風白日長。
老聃西逝卽浮屠。莫怪窗閒貝葉書。長晒楊妃仙格劣。卻教鸚鵡誦真如。
玉女倚天多喜笑。素娥如月與精神。假饒不許長年住。猶勝人閒不遇人。

夷堅志。

劉士季

次韻何漕司小紅翠亭

少陵遺蹟灑西東。端的高齋在此中。今日花枝弄煙雨。前時蔬甲臥霜風。
翠跗萼輸來別圃。紅收拾陽春無盡藏。夔人端說兩詩翁。全蜀藝文志。

自注。此地舊爲蔬畦。根株移取他山。

劉王孟

題呂先生畫像

短褐長條大布巾。雲霞嘖嗽九天春。可憐世上屠沽子。喚作尋常賣墨人。
聲畫集。

曾揆

揆字舜卿南豐人。

宋詩紀事 卷四十九

一一六三

題資福院平綠軒

終日勤勞雁鷺行。偶然來訪贊公房。扶疎草木四圍合。縈繞溪流一帶長。倚檻豈能成傑句。把杯多是說名方。問師乞取安心法。宴坐蒲團對佛香。至元嘉禾志。

林 歆

吳中寒食

寒食家家蹋曉晴。好風吹我出重城。幾灣野水迎人白。數點家山刮眼明。已有鴿原聯乘樂。何須鷓尾並橈行。山前父老應相笑。爲我頻來學送迎。吳郡志。

朱明之

崑山慧聚寺并序

離常熟至崑山泊慧聚寺。而詩情尤壯。復爲二章。附于五題。蓋山雞自愛其尾。亦欲以多爲貴也。

古寺有遠名。欲遊先夢生。飛猿礮底嘯。靈鳥雲間鳴。影密樓臺衆。香繁草樹榮。何年照佛火。燦燦長光明。
石林高月生。蘇閣疎磬鳴。宿鳥夢難就。定僧魂更清。香風動花影。巖瀑飛玉聲。遙夜坐來短。但餘天外情。
吳郡志。

胡 循

滄浪亭

竄逐本無罪。羈窮向此忘。野煙含悵望。落日滿滄浪。亂草荒來綠。幽蘭死亦香。楚些招不得。秋水似瀟湘。

吳郡志滄浪亭在郡學之南積水彌數十畝旁有小山高下曲折與水相縈帶錢氏時廣陵王元璩池館或云近戚中吳軍節度使孫承祐所作慶歷間蘇舜欽子美得之作亭曰滄浪云

毛 升

升字平仲三衢人友之子仕止宛陵東陽二州卒有樵隱集

泊釣臺

洲渚寒雲薄暮天蕭蕭燈火落帆邊嚴陵灘下孤舟遠一夜歸心聽雨眠釣臺集

蔡 雋

題汀州蒼玉洞

向來曾醉呼猿洞亂石崩雲擁坐隅誰料七閩煙瘴底半巖風物似西湖錦繡萬花谷

鄭子覃

題茗溪道觀壁

紛紛紅雨入蒼苔密蔭新成鶯友來擬逐幽人夢蓬島一聲裂竹故驚回茗溪漁隱叢話

周仲卿

月泉

石罅玉爲髓月梭金作棧蒼苔誰鑿破白雪自堅凝穿豈太山雷清于萬壑冰此中無六月門外氣如蒸

湖州府志。月泉在德清縣慈相寺。出石罅間。形如半月。呂東萊疏云。斷崖吐月。纔出半規。古斲涵星。尙懷全璧。久矣寶險之廢。時哉玉斧之修。護此清寒。祓其氛翳。名高詩社。再傳和仲之符。價重帝城。復值文饒之運。周仲卿有詩。

王審

審字德升。新淦人。困躓場屋。入玉笥山。依道士潘與齡。獨居白雲齋。十餘年卒。

磬山道中

澗石韻寒泉。依稀言語處。回頭覺無人。又上前溪去。

山樵

山樵竹裏居。略約纔堪度。落日淡平疇。牛羊點寒暮。

獨醒雜誌。語意蕭散。非

遠外聲利者不能也。

許志仁

志仁字信叔。

寄衣曲

貂裘雖云溫。非妾手中迹。唯此萬里衣。一鍼三歎息。歎息恐人聞。縫時常避人。開緘勿嫌澆。中有雙淚痕。江南十月雁初飛。邊地纔秋塞草衰。衣成妾手君寧見。寒到君邊妾自知。寄書問征夫。好在何當還。西風吹妾夢。夜度魯陽關。

和姚令威春晚卽事

臥看遊絲媚遠天。起尋幽徑卻茫然。句成落絮飛花裏。心在殘霞夕照邊。無復雙魚傳尺素。空餘寶瑟思華年。年來情味人應笑。白首傷春祇醉眠。以上前賢小集拾遺。

俞似

似官廣州鈴轄。

題英州金山寺壁

轉食膠膠擾擾閒。林泉高步未容攀。興來尙有平生履。管領東南到處山。

容齋隨筆似妻趙夫人親書此詩于寺壁。字畫徑四寸。道健類薛稷。

王度

度字武臣。豫章新吳人。

句

雲生坐來石。風掩讀殘書。危紅賒晚景。漲綠上平沙。鴉分供餘食。鷓亂著殘棋。樵斧和雲斫。漁蓑帶雪披。

娛書堂詩話。王武臣吟詩有警句。皆清奇可誦。張紫微謝良齋極稱賞之。

宋詩紀事 卷四十九

王棻

梅

不受塵埃半點侵。竹籬茅舍自甘心。祇因誤識林和靖。惹得詩人說到今。西溪叢語。

李樸

樸字德邵。廣陵人。

端硯

巖石凝清粹。端然絕世珍。聲清輕楚玉。色潤勝燕珉。硯箋。

李似權

記夢

碧玉山頭碧玉泉。琮琤聲裏數流年。不知曾與何人到。笑想丹題似昔緣。

石壁蒼苔露未乾。小池射日石團團。弄泉漱玉歸何暮。風捲橫雲細細看。能改齋漫錄。

俞疇

疇字叔惠。南渡初人。

跋山谷書范滂傳帖

貂璫羣雛擅天網。手驅名流入鉤黨。屯雲蔽日日光無。卯金神器春冰上。汝南節士居危邦。志剗蕭艾扶蘭芳。致君生不逮堯舜。死合夷齊俱首陽。千年興廢真暮旦。毀譽詎應加許意。安知後人哀後人。又起者

賢落南歎。宜州老子筆有神。蟬蛻顏楊端逼真。少模龍爪已名世。晚用雞毛亦絕人。平生孟博吾尙友。時事駸駸建寧舊。胸蟠萬卷老蠻鄉。獨感斯文聊運肘。老子書名橫九州。一紙千金不當醜。此書豈但翰墨設。心事恨關百憂人。言老子味禪悅。疾惡視滂寧爾切。須知許國本精忠。不幸爲滂甘伏節。九原莫作令人悲。遺墨敗素皆吾師。從君乞取宜州字。要對崇寧黨籍碑。程史

柴中守

跋山谷書范滂傳帖

小春晝日如春晚。飲罷披圖清興遠。夜光照屋四座驚。金薤銀鉤眞墨本。當年太史謫宜州。腸斷梅花樓戍樓。拾遺不逢東道主。翰林長作夜郎囚。蠻烟瘴雨森鈇鉞。更值韓盧搜兔窟。老色上面歡去心。惟有忠肝懸日月。郡丞嗜好殊世人。投箋乞字傳兒孫。平生孟博是知己。筆下寫出精神騫。興亡萬古同一轍。黨論到頭不堪說。刊章下郡漢道微。清流入河唐祚絕。先朝白晝狐亦鳴。正氣消盡邪氣生。殿門斷碑仆未起。中原戎馬來縱橫。生蛟入手不敢玩。往事淒涼重三歎。蘭亭瘞鶴徒爾爲。好刻此書裨廟算。程史

宗道傳

道傳南渡初人。

伏波巖曰巖按顧氏選本作賈黃中字句小異。

銅柱威聲凜百蠻。肯貪捆載溷溪山。無人爲起文淵問。端的珠還苒惹還。桂勝

馬益

宋詩紀事 卷四十九

一二六九

益、福州通判

奉和蔡公寒食遊二山作

屬吏參陪宴二山。金杯滿沃酒腸寬。公私不禁三朝火。風雨都無一日寒。花引遊蜂香四座。人穿蕭寺景千般。清明休假歡心洽。飽德咸知有上官。淳熙三山志。

蒲瀛

次韻袁升之遊海雲寺鴻慶院山茶之什

山茶兩本上連空。疊葉棲枝占佛宮。雀尾有金輸紺碧。鶴頭無火讓殷紅。優于峽茗稱呼異。劣與梅花氣候同。誰識諸天雨花外。道人宴坐雪霜中。

遊呪土寺西臺

偶到城西寺。人言呪土墳。夕陽臺半出。秋草徑斜分。地下無紅粉。天邊有碧雲。徘徊追往事。風急葉紛紛。以上成都文類。

許尹

尹字覺民。紹興中。處州守。

和吳謹思題仙都山

黃帝得仙從此去。鼎湖傳說幾經年。龍髯墮地成青草。直到如今不上天。仙都山志。

吳謹微

謹微、紹興中縉雲人。

遊仙都山

薄宦驅人畏簡書。金柔暑濁倦征途。歸來有意尋真境。路入仙都不憚迂。
山下霏微雨灑塵。門前嘹唳鶴迎人。遂成一覺仙都夢。更訪遺蹤得隱真。
仙都山志。

楊咸亨

江郊亭新成賦二十三韻

蜀江千里東南傾。峽門橫鎖千丈鯨。吳帆蜀檝過如織。府主四海皆弟兄。
城西門前二十里。客去當送來當迎。藤梢橘刺密無路。短亭四壁荒榛荆。
春風淡沲酌客處。我陪後乘同郊行。碧油紅旆駐沙尾。連宵急雨鼓不鳴。
元戎玉皇香案吏。俛仰茅屋無乃輕。擘山鞭石相原隰。釘頭瓦縫粟縷盈。
偉哉幻出此奇觀。丹楹畫棟光嶢嶸。山長波迴目力短。空濛宜雨高宜晴。
危嵐滴翠染窗戶。空江倒影翻簷甍。天長地久設相待。更爲佳處題佳名。
梁閒橫陳大手筆。龍蛇飛動神鬼驚。高齋百篇子美唱。峴首千載羊公情。
試呼小隊訪新館。壯遊始與勝概并。披雲喚月星斗動。放舟聞鶴天水明。
練光渺渺風力壯。疊鼓西上帆東征。舳艫冠蓋兩歎息。謹謠畫亂通樵聲。
元戎故是活國手。山河指顧風塵清。淒涼三峽小遊戲。樸斲丹黝安足程。
明堂梁棟要杞梓。天關一柱須公擎。紛紛故吏萬里外。燕雀行慶大廈成。
賦詩抵掌者誰子。夜郎野老楊咸亨。
全蜀藝文志。

沈東

東、字元敝。崑山人。

遊滄浪亭

草蔓花枝與世新。登臨空復想清塵。只今唯有亭前水。曾識春風載酒人。中吳紀聞。

沈長卿

長卿、字文伯。湖州人。爲常州倅。忤秦檜貶化州。

句

翠蛾環坐憶洲錢。

至元嘉禾志。洲錢市在崇德縣西北二十七里。宋南渡初。士大夫來寓者殆二十家。贈申國趙公不求父子。寓論一紀。慶公善應。字彥遠。詩翰尤妙。蘇計屬師德仁。仲呂顯謨正已。仲發。迭主詩盟。卽祇園精舍爲簪盞之所。詩人沈文伯有句云。

柴、王

援、嘗爲小吏。自言周室之裔。頗能詩。

寄遠

別時指我堂前柳。柳色青時望子時。今日柳綿吹欲盡。尙憑書去說相思。

客舍

隻影寄空館。蕭然飢鶴姿。秋風北窗來。問我歸何時。以上卻掃編。

張頤

清淮樓在濠州。

觀魚惠子臺蕪沒。夢蝶莊生冢木秋。唯有清淮供四望。年年依舊背城流。方輿勝覽。

邵稽仲

龍州

峭壁陰森古木稠。亂山深處指龍州。猿啼鴉噪溪雲暮。不是愁人亦自愁。方輿勝覽。

許表

項王廟在烏江。號靈惠廟。

千載興亡莫浪愁。漢家功業亦荒丘。空餘原上虞姬草。舞盡春風未肯休。方輿勝覽。

史幹

題鵝鼻山

龍泉五盞張帆去。鵝鼻三杯衣錦歸。寄與長泉後來者。年年盛事莫相違。

方輿勝覽。山在眉州青神縣長泉北。長泉土人每登科而歸鄉人迓之。于此三酌。史幹有詩。

宋詩紀事卷五十

陸永仲

永仲字維之。一名凝之。字子才。餘杭人。隱大滌洞天。之石室。因以石室稱之。有石室集。

四朝聞見錄。光堯嘗幸大滌。憲聖亦侍進。主觀者。問以山中詩客。以維之對。進其行卷。光堯讀之。太息曰。布衣入翰林可也。憲聖曰。山林隱士。不要人知。要他出山。卻是苦他。遂止。

西湖志餘。永仲少與計偕入汴。羣法徒邀令雜坐。命道人相之。道人指永仲曰。秀才問以科第。曰。且還山。及別。道人以粒丹授之。曰。緩急用之。永仲下第。循汴而歸。怒濤大作。以丹投之。風浪恬息。岸有呼永仲姓名者。則道人也。遂出家。隱大滌山。

洞霄宮

天柱峯前古洞霄。我生來此避塵囂。半牀明月琴三弄。四座青山酒一瓢。當戶老松如對立。隔花啼鳥似相招。斷金一去無消息。唯有寒梅共寂寥。洞霄詩集

絕筆

岳南之館白雲端。鳳笛龍簫徹廣寒。一鶴曉飛沖碧落。羣仙笑倚玉闌干。咸淳臨安志

駱適正

西園席上記事

花隨春盡覓無痕。尙續餘歡侑素尊。一曲未終人已去。西園燈火欲黃昏。

清波雜誌。輝居建康。春晚赴張德。共會於西園。呼數輩。侑酒。酒酣。忽有傳府呼其人。時張安國開府方兩日。其人臨去。求自解之說。衆但以實告。況社中二客不至。必留鈴齋。翌日詢之。如所料焉。歌者既去。坐客駭適。正卽席賦詩云云。

劉博文

博文字元素。宣城人。

柳眼

青眼初垂已可知。精神渾在豔陽時。只因嫁得東君後。兩淚相看是別離。

竹坡詩話。元素內子朱賢。善事其夫。一日。元素與客飲。分韻得柳眼。詩成。坐客皆不悅。後數日而其妻亡。蓋詩讖也。

劉棐

棐字仲忱。

咸陽

父老壺漿迓義旗。秦亡誰復爲秦悲。不曾被虐曾蒙德。十二金人各淚垂。玉殿珠樓二世中。楚人一炬逐煙空。卻緣火是秦人火。只與焚書一樣紅。

墨莊漫錄。詩律殊有風致。
類唐人題詠。他詩亦稱是。

劉敬

觀滄浪亭石感而有作

蘇君在朝人不知。蘇君既沒人悲之。流風遺書見稱道。高文大句爭提撕。壁閒草隸亦不置。剝苔椎土無棄遺。乃知死不與人共利害。而後不爲時所疑。滄浪亭空卉木老。古石蒼蒼顏色好。無脛猶疑千里來。致身忽在都門道。帝都王侯好事多。相看自悔取不早。君不見吳興長史春欄衫。閉門抱恨長枯槁。吳郡志

薛揚祖

揚祖字元祖。鄞人。歷知漳州。召爲大理丞。

與張樞密話舊作

羸軀苦善病。日與藥裏親。藉彼參苓功。扶此憂患身。思君若飢渴。相憐同病人。余身本蒲柳。寧堪秋風晨。君誠松柏姿。何患不長春。容面一若丹。鬢髮一若銀。來日安可期。往事曷足陳。不能罄君壘。奚以浣我塵。吹笙將鼓瑟。慚余非嘉賓。甬上耆舊集

薛居實

居實字去華。鄞人。朋龜子。歷官淮東安撫使。直祕閣。有集。

皇太后挽歌

夾日光先業。寒星聚夜臺。慈名千古重。哀詔九天來。地底雞人少。雲中鶴使催。宮門芳草徧。從此不須開。

老妓自稱汴京宮人泣而贈之

薄粧自敝老深宮。一曲悲歌聽不終。黑髮尙霑梁苑雪。素衣還帶上林風。殘春柳葉蕭條綠。破國桃花冷落紅。收拾琵琶蹙眉黛。教人同在淚痕中。以上甬上耆舊集

仲昂

昂字明舉。紹興中廣漢人。

題西門外笮橋下觀音院

雨砌風亭長綠苔。壁閒題字半塵埃。城南蕭寺無人跡。幾度曾因送客來。全蜀藝文志

何錫汝

錫汝紹興閒人。

玉虹泉在羅田縣東五十里。詩刻石上。

百尺雲巖佛閣前。晚鐘疎葉思悠然。岸邊酌酒和清露。石上題詩染翠煙。半領泉鳴通古澗。數峯秋盡隔寒川。西風似欲吹人起。去逐騎鯨汗漫仙。湖廣總志

劉望之

望之蜀人。自號觀堂。

新都驛遠平軒

霜晴木落送歸鞍。袖手微吟此慰顏。賸欲憑欄招白鳥。更煩翦樹出青山。晚悲薄祿非三釜。賴許清詩見

一斑。自注：軒有外氏風。次元帥蜀時詩。看到遠平纔得恨，我寧僵臥尺椽閒。

沱江

尙勝三年謫，終慙萬里馴。極知行路澀，可忍在家貧。歲晚沱江綠，雲深錦樹新。相思肯如月，夜夜只隨人。

發成都

落拓平生載酒行，如今憔悴鬢絲生。無金得買青樓笑，空負閑愁出錦城。以上成都文類。

紹興中作

一紙盟書換戰塵，萬方呼舞卻霑巾。崇陵訪沈空遺恨，郢國憐懷若有人。收拾金縢煩廟算，安排鐘鼎頌宗臣。小儒何敢知機事，終望君王赦奉春。

程史：紹興中和議成，蜀士劉望之作詩云：時語禁未大嚴，無以爲風者，望之它詩多詔秦檜，所謂奉春不知指何人也。

白麟

合江探梅

艇子飄搖喚不回，半溪清影漾疎梅。有人隔岸頻招手，和月和霜翦取來。成都文類。

任續

續紹興閒人。

還珠洞呈桂林帥呂叔恭

山林自空閒。遊人事幽討。岫幌與雲關。來蹟可堪掃。良離矗孤峯。玉簪倚天杪。桂水流灘碧。洞伏皆縈繞。豁訝巖穴深。蚪龍雙天矯。坤倪露幽祕。造化殫奇巧。勝概絕塵寰。髣髴蓬萊島。悠悠世俗情。是非苦膠擾。水中蟹何罪。徒勞卹心惜。人厄困無妄。礫石埋深窈。風月幾年恨。山光慘蘿蔦。星郎太嶽孫。長城隱南表。戎旃整且暇。高情恣登眺。郊垌擁小隊。一見顏色愜。舊觀俄頃復。洞戶天重曉。傷心日月過。人世幾番老。山川不相似。歲久依然好。呂巖標強名。往事人能道。孟公漫驚坐。子夏冠非小。桃符錄餘慶。邛勝成濮兆。冥數今乃驗。常幸定誰考。哦詩記貞石。則有若樽醪。桂勝

強彥文

彥文、溧陽丞。

句

空有青山自龍虎。可堪荒冢更衣冠。金陵道中。遠山初見疑無路。曲徑徐行漸有村。船中燈火十年話。枕

上江湖萬里心。清波別志

李璣

璣字德劭。江都人。流寓四明。有篋菴集。

樓大防序云。德劭少負雋才。恥從進士舉。後寓四明。蕭散飢餓。以終其身。不娶無子。晚從安智禪師。于言下有省。寫照自題其上。云分明便是龐居士。又卻無人賣罩籬。不可謂無所得。然亦可哀也已。

以二貓送張子賢

家家入雪白於霜。更有敲鞍似鬧裝。便請爐邊叉手坐。從他鼠子自跳梁。
銜蟬毛色白勝酥。搗絮堆綿亦不知。老病毗邪須減口。從今休歎食無魚。墨莊漫錄。

唐 愬

愬字端仲。淮海張邦基之表舅。

賦漢建安時侯印

關中金印豈秦關。想見風流漢已還。大饗似書譙縣石。蘭亭寧數會稽山。空餘此日歸囊裏。曾是當年雜佩環。萬戶況將取如斗。此章何足繫腰閒。

題宗室趙大年橫卷爲張邦基作

聞君新得小山川。畫手來從邵雍賢。不學農夫焉用稼。若爲王子豈知田。我真壠上躬耕客。親見人閒小隱天。始識何年京樣熟。菊籬寧似景龍邊。菊籬景龍門下景也。

墨莊漫錄。米南宮謂大年作畫清麗。雪景類王維。汀渚水鳥有江湖意。予嘗得大年所作橫卷。歸田圖。竹籬茅舍。煙林蔽虧。遙岑遠水。咫尺千里。葭蕪鷗鷺。宛若江鄉。表舅唐端仲題詩云。

裴相如

相如號豹隱。餘杭人。

遊洞霄宮

人閒三十六洞天。各有邃道通神仙。茲山九鎖路曲折。中間五洞棲雲煙。東遊大滌望天柱。西登石室觀飛泉。窮幽討勝足未倦。明月忽墮青崖顛。山中道士借一榻。夜半猿鶴驚人眠。明朝又復出山去。白雲回首空悽然。洞霄詩集

龔明之

明之字熙仲。崑山人。祖母李病且革。明之禱于天。乞減五齡以益李壽。灼頂聞腦中有爆裂聲。不爲動。李病尋愈。竟五年卒。明之以特恩廷試。授高州文學。年老。敕監潭州衡嶽致仕。超授宣教郎。著中吳紀聞。

芝華亭

誰道休詳繫上穹。民心元自與天通。政平訟理爲眞瑞。何必金芝產梵宮。玉峯詩集

蘇籀

籀字仲滋。轍之孫。遲之子。官至監丞。南渡居婺州。有雙溪集。

靡蕪

葉葉秋聲中。霏霏蚤英蕪。介特有如松。繁華匪慙菊。勃蔚襲軒墀。薰霑滿衣服。情人擢纖指。拾蕪動盈匊。靡蕪見離騷。荅蒼入譜錄。

遊鼓山自注孫子安見招

呼船起柁乘潮平。掠窗飄箔疎雨傾。漱石枕流東道主。櫛風沐雨吾曹行。百尋懸瀑瀉紳佩。兩邊喬木翽

斫蕘乞漿滿甌牛乳粥。縱橫下筇駝蹄羹。躋摩頂踵歷磴術。牽挽葛藟披荆榛。荒浪攙差復奄鷲。截嶽最
風仍棲層。嗥煙嘯雨猿鶴宅。絕山航海樵漁能。草衣穴處避世士。木食澗飲安禪僧。芝房雲閣無盡藏。月
屏風幌長明燈。笑看闌闌一蟻垤。揮斥氛祲投蠻藤。經行石竇解滕屨。飲灌匏杓談淄澠。莫嘖踏碎蒼苔
色。莫嫌汲濁陰井清。膏盲泉石有裁鑿。騰蹕巖嶠試股肱。要識石鼓真面目。立置枕几非繪繒。風吹楊葉
此山下。欲問故老知誰應。市朝一夢爭奪際。山海蕭散堪伏膺。

和卷中韓子蒼梅花

先開媚晴昊。孤豔斷魂時。繞樹沈煙度。凌寒檀暈披。參橫明月觀。雪細影娥池。結實冥冥雨。君看雀啣枝。
以上雙溪集。

蘇簡

簡字伯業。籀弟。有山堂集。

次韻張正民遊智者寺

養拙何所詣。白晝門常關。啄剝有好懷。遠郭橫秋山。佛刹在山麓。清淨非人間。曳杖得晤語。幽尋爲歡顏。
寺同喬木古。僧與白雲閑。一鳥不復鳴。流泉自潺湲。山林作勝踐。世事羊腸艱。金華詩粹

吳璋

璋。沈子。

環溪夜坐

江天閑晚已斜陽。靜倚柴門對草堂。葉落轉枝翻鶴影。星飛橫水帶螢光。微風得雋驅殘暑。新月出奇生嫩涼。坐覺秋容轉清爽。一聲漁笛在滄浪。

句

惜別有情空執手。贈行無緒不成章。閑中坐出蜘蛛隱。夢裏逃成燕雀禪。奕棋但以忘憂耳。縱酒無如作病何。以上環溪詩話。

胡仔

仔字元任。舜陟子。仕爲晉陵令。卜居吳興。號苕溪漁隱。著有叢話。

苕溪絕句

三聞水閣賈耘老。一首佳詞沈會宗。無限當時好風月。如今總屬續溪翁。

苕溪漁隱叢話。賈耘老舊有水閣在苕溪之上。景物清曠。東坡作守時。屢過之。題詩畫竹於壁間。沈會宗又爲賦小詞。其後水閣屢易主。今已摧毀久矣。遺址正與予小閣相近。同在一岸。景物悉如會宗之詞。故予嘗有句云云。

春寒

小院春寒閉寂寥。杏花枝上雨瀟瀟。午窗歸夢無人喚。銀葉龍涎香漸消。

苕溪漁隱叢話。西清詩話云。長沙徐仲雅宮詞曰。內人曉起怯春寒。輕揭珠簾看牡丹。一把柳絲收不盡。和風搭在玉闌干。其富貴瀟灑可愛。余嘗作春寒絕句云云。聊效其體也。

對月用促句換韻格

青玻璃色瑩長空。爛銀盤挂屋山東。晚涼徐度一襟風。天分風月相管領。對之技癢誰能忍。吟哦自恨詩才窘。埽寬露坐發興新。浮蛆瑛瑛拋青春。不妨舉醖成三人。

題茗溪漁隱圖

余卜居茗溪上。日以漁釣自適。因自稱曰茗溪漁隱。臨流有屋數椽。亦以此命名。僧了宗善墨戲。落筆頗瀟灑。爲余作茗溪漁隱圖。覽景攄懷。時有鄙句。皆題之左方云。

溪邊短短長長柳。波上來來去去船。鷗鳥近人渾不畏。一雙飛下鏡中天。
秋雲漠漠煙蒼蒼。蘆花初白蓮葉黃。釣船盡日來往處。南村北村秔稻香。
卷起綸竿撇櫂歸。短篷斜掩宿漁磯。日高春睡無人喚。撩亂楊花繞夢飛。

和人七夕

乞巧筵開玉露秋。一鉤涼月挂西樓。人閒百巧方無柰。寄語天孫好罷休。
以上茗溪漁隱叢話。

左鄰

題湘中郵亭壁

疊疊山腰繫冷雲。疎疎雨腳弄黃昏。松聲更帶溪聲急。不是行人也斷魂。
茗溪漁隱叢話。

賴鑄

鑄字成之。號竹莊。

送鄭居之

窗前落葉正蕭蕭。夜雨寒燈共寂寥。君是居人余是客。明朝相候合江橋。

詩家鼎鑪。

龔相

相字聖任。處州遂昌人。兵部侍郎原之孫。知華亭縣。遂家吳中。

濡須塢。在巢縣東南。

南北安危限兩關。迅流一去幾時還。淒涼千古干戈地。春水方生鷗自閑。

方輿勝覽。

邵博

博字公濟。伯溫子。有西山集。

題智永上人瀟湘夜雨圖

曾擬扁舟湘水西。夜窗聽雨數歸期。歸來偶對高人畫。卻憶當年夜雨時。

畫繼。

題相如琴臺

長卿本豪傑。禮外安可處。手彈南風琴。心謂東鄰女。雜身傭保中。初不忌笑侮。大者固已立。下此皆可補。三賦爭日星。一書起今古。其餘不自祕。輒爲人所取。兒曹爾何知。杯酒那可汗。故臺已丘墟。勝絕誰敢據。我來訪遺跡。低回不忍去。詩成欲叫君。雲車隔煙霧。

成都文類。

雲安下巖偶成

輕波颭鴨頭。小艇翔燕尾。風沙三十程。雲水一千里。雪盡晚寒輕。日長春睡美。汀蕪翹碧茅。岸樹裹紅葉。

江浮清鏡。中山入翠屏裏。蜀鳥已驚心。巴猿猶側耳。竹節數名灘。桃花驗新水。谷鶯歌尚慵。樵燕舞何喜。落日浪鎔金。殘花風翦綺。斯遊興最多了。不知行止。全蜀藝文志。

王 汶

汶字希道。一字道原。汝陰人。回之子。有詩集。雪溪王銍序之。

寄韓澗泉

在困多促促。長懷特棲者。崔嵬玉山岑。其誰秣余馬。朝隨澗雲浮。暮逐澗泉瀉。光儀儼神交。晤言冀心寫。食魚不知肥。采菊不盈把。願垂白日影。照我葑屋下。

送應顯夫之上饒

細雨杏花斑。飛飛燕子還。人隨煙櫂去。門對釣磯閑。曉月偏驚夢。春雲不離山。定知多好句。音問盍相關。以上前賢小集拾遺。

張子文

墨梅二絕

筆端喚醒玉梅魂。滿袖春風不見痕。未許卷簾新月上。卻教煙雨惱黃昏。憶昨江湖倒載歸。暗香夾路雨霏微。誰人貌得春風景。遠看如煙近卻非。

次韻秦會之題墨梅

南枝春色弄微溫。記得清香撲酒尊。今日相逢隔煙霧。揚州殘夢足銷魂。以上聲畫集。

陸士規

黃陵廟

東風吹草綠離離。路入黃陵古廟西。帝子不知春又去。亂山無主鷓鴣啼。

鶴林玉露。陸士規布衣工詩。秦檜喜之。嘗挾秦書于臨川守。餽遺不滿意。升堂媢罵。守懼。以書白秦。秦怒。陸甚。陸請見不出。然猶令其子小相者見之。問其近作。陸誦黃陵廟一絕。小相入誦之。秦吟賞再四。即接見待之如初。

周必大

必大。字子充。一字洪道。廬陵人。紹興二十一年進士。中宏詞科。權中書舍人。孝宗朝。歷右丞相。拜少保。進益國公。寧宗朝。以少傅致仕。卒。贈太師。諡文忠。有平園集。鶚按宋史。必大紹興二十年進士。據咸

淳臨安志。紹興二十一年。趙遼榜。無二十年榜。宋史誤也。今訂正。

賞心亭醮會

晉人誇新亭。暇日輒高會。中閒伯仁輩。未免楚囚對。江山猶古昔。人物已曖昧。東郊今保釐。翠華記行在。佳麗壓淮楚。迢遞盛冠蓋。茲樓貫城雉。于邁無小大。令威雖不歸。靈光故無礙。煙雲互明滅。川郭相映帶。當年烏衣遊。此日思勝槩。從容值休沐。登臨多慷慨。幽懷忽軒豁。細故絕芥蒂。已尋詩社盟。更訂飲朋戒。嘉賓滿坐上。好詩來天外。舟移白鷺遠。目送飛鳥快。方種淵明秫。麇免監河貸。一醉儻可期。與君時倒載。遊茅山道中口占須徧遊乃成章

千峯溧陽來。勢若西南奔。遙拱三茅峯。不敢迫至尊。三茅如軒懸。次序儼弟昆。正西闕夷途。羣仙之所門。至今下泊宮。往往弭旗旛。

過池州作

千古風流杜牧之。詩材猶及杜筠兒。向來稍喜唐風集。原注荷鶴詩集名唐風集。今悟樊川是父師。

二老堂詩話。池陽集載牧之守郡時。有妾懷妊而出之。以嫁州人杜筠。後生子即荷鶴也。

高宗皇帝挽詞

社稷興中否。干戈靜四溟。生年同藝祖。慶壽似慈寧。人憶庚庚兆。天傾九九齡。向來懷夏禹。今耐越山青。太極乾元父。清都大帝宮。宴酣忘御駿。仙去任遺弓。晉遏堯仁遠。吳號舜孝隆。孤臣臺閣舊。淚血灑春風。會同年楊謹仲周孟覺賞芍藥嘗櫻桃次謹仲韻

清晨自掃落花廳。小甕新篳竹葉青。簪盞莫辭過陋巷。臚傳相與記彤廷。階翻紅藥曾重見。僕兩直西掖。勅賜朱櫻亦屢經。老去飄零無此夢。詩來吟咏有餘馨。

題九華化成峯

攀蘿度險捷猿猴。石角鉤衣屢盡穿。莫訝遠尋金地藏。也曾徐步玉階前。

贈棲賢寺藏主可昇與子同庚

我比同年百不能。只餘霜鬢媿師兄。殷勤覓句無言說。共撥寒灰聽水聲。以上會齋文稿。

元宵煮浮圓子前輩似未嘗賦此坐閒成四韻

今夕知何夕團圓事事同湯官循舊味竈婢詫新功星燦烏雲裏珠浮濁水中歲時編雜詠附此說家風

訪誠齋

楊監全勝賀監家賜湖豈比賜書華回環自關三三徑頃刻能開七七花門外有田供伏臘望中無處不煙霞卻慙下客非摩詰無畫無詩只謾誇以上平園續稿

鶴林玉露慶元閒周益公以宰相退休誠齋以祕書監退休益公嘗訪誠齋於南溪之上留詩云云誠齋和云相國來臨處士家山閒草木也光華高軒行李能過李小隊尋花到浣花留贈新詩光奪月端令老子氣成霞未論藏去傳詒厥拈向田夫野

老誇好事者

繪以爲圖

蕭德藻

德藻字東夫閩人紹興二十一年進士嘗令烏程後遂家焉所居屏山自號千巖老人有千巖擇

稿楊誠齋序近世詩人若范石湖之清新尤梁溪之平濟陸放翁之敷腴蕭千巖之工致皆余所長也

采蓮曲

清曉去采蓮蓮花帶露鮮溪長須急漿不是趁前船
相隨不覺遠直到暮煙中恐噴歸得晚今日打頭風後村詩話

古梅二首

湘妃危立凍蛟脊。海月冷挂珊瑚枝。醜怪驚人能嫵媚。斷魂只有曉寒知。百千年蘚著枯樹。三兩點春供老枝。絕壁笛聲那得到。只愁斜日凍蜂知。

詠虞美人草

魯公死後一坏荒。誰與竿頭薦一觴。妾願得生墳土上。日翻舞袖向君王。以上全芳備祖。

呂公洞

復此經過三十年。唯應巖谷故依然。城南老樹朽爲土。簷外稚松青拂天。枕上功名祇擾擾。指端變化又元元。刀圭乞與起衰病。稽首秋空一劍仙。賀退錄。

次韻傅惟肖

竹根蟋蟀太多事。喚得秋來籬落閒。又過暑天如許久。未償詩債若爲顏。肝腸與世苦相反。壓壑噴人不早還。八月放船飛樣去。蘆花叢外數青山。

登岳陽樓

不作蒼茫去。真成浪蕩遊。三年夜郎客。一柁洞庭秋。得句鷺飛處。看山天盡頭。猶嫌未奇絕。更上岳陽樓。以上瀟奎律髓。

句

乾坤生長我。貧病怨尤誰。秋浩蕩中遙指點。一螺許是定王城。稚子推窗窺過雁。數峯乘隙入西窗。

秋陽直爲田家計。饒得漁村一抹紅。後村詩話。

查籥

籥字元章。海陵人。紹興辛未進士。乾道中。戶部郎中總領四川財賦司。

題臥龍山

山顛祠貌儼丹青。千載懷人爲一登。隱隱故營連白帝。茫茫恨水向西陵。石根蘭芷香無價。雲頂松杉翠作層。人事天機古難料。詩成試語定中僧。全蜀藝文志。

萬州湖灘寄王夔州十朋

滿目暮山平遠。一池雲錦清酣。忽有鐘聲林際。直疑夢到江南。王梅溪集附。

郭知運

知運字次張。鹽官人。弱冠登紹興二十一年進士。秦檜強與爲姻。知運勿樂。訖停昏焉。仕至荊州守。倦求祿仕。自號息菴老人。卜居雙廟之西。有猥稿。

題雙廟

唐祚中不振。孽胡恣姦驕。君德弗克終。治亂在一朝。渠魁脾神器。四海俱動搖。向來爲厲階。其迹已冰消。中興功孰直。張許冠百僚。堂堂二公烈。千古名不凋。義膽極華岳。忠肝齊斗杓。平生慕節義。卜居祠匪遙。丹青就湮鬱。古屋風蕭蕭。英靈如可問。激懦討僭妖。咸淳臨安志。

林檎

太白五松書院

桷字子長一字景安長溪人紹興二十一年進士秦熺之壻官右司郎中有橫堂小集

翰林最愛五松山嘗說千年未擬還而我抗塵良自媿來遊祇得片時閑

池州府志

方汝疆

汝疆字南夫繁昌人紹興二十一年進士

江上晚行

疎雲薄日冷吳江江色蘆花共渺茫
四五點山烟靄淡兩三枝槳水雲長
遊魚避網驚微浪幽鷺窺汀下
夕陽興罷歸來更回首滿身明月踏溪霜

舟行

平林漠漠暝烟齊竹樹蕭森望眼迷
相喚幾聲何處雁斷霞明處一行低

以上太平府志

陳居仁

居仁字安行莆田人家明州紹興二十一年進士孝宗朝累官中書舍人華文殿直學士提舉太平興國宮卒諡文懿

西湖感舊

蘇公隄畔采蓮船蘸碧樓臺動管弦
山色湖光宛如昔心情不似十年前

咸淳臨安志

史正志

正志字志道江都人紹興二十一年進士累除司農丞孝宗朝仕至右文殿修撰知靖江府歸老姑蘇號吳門老圃

新亭

龍盤虎踞阻江流割據由來起仲謀從此但誇佳麗地不知西北有神州忽枉王人六轡馳新亭有酒便同持坐中不作南冠歎江左夷吾是素期景定建康志

宋翔

翔字子飛建陽人紹興二十一年進士官湖南安撫參議有梅谷集

紹興樂府

時章太后歸慈寧宮

天意回皇母歸戢烽燧敞宮闈朝陽赫奕明鞠衣惟皇之孝惟母之慈陳仙仗薦壽卮從之冢后與庶妃奏之一作以九成與咸池杳珍瑞駢福祺山陬水裔咸熙熙惟天之相與帝之宜千萬年無窮期建陽縣志

程大昌

大昌字泰之休寧人紹興二十一年進士官至權吏部尙書龍圖閣直學士卒諡文簡有集

宿直後出玉堂留詩示周子充

抖擻身章卻冒塵。裹蹠顧影也逡巡。鑾坡寓宿非其地。蓮燭操文自有真。直由來同古語。位高兼復見今人。迎潮有諾無輕爽。季老當年不諉貧。

玉堂雜記。淳熙丙申八月庚辰。德壽宮遣大璫張去爲至都堂傳旨。立翟貴妃爲今上皇后。明日午後。執政奏車。皇后賜姓謝氏。乙酉晚。快行家來宣贊院。是日侍講刑部侍郎程泰之。已宿直。呼馬而出。予至內前。適與之遇。泰之揚鞭云。留詩案上矣。

和劉侍郎夔九日登女郎臺

霜枝凋翠雁橫秋。莫倚危樓動旅愁。菊有清香樽有酒。茱萸不插也風流。能改齊過錄。

次韻陸務觀海棠

喚回殘睡強矜持。淺破朱唇倚笛吹。千古妖妍磨不盡。長隨春色上花枝。海棠譜。

句

戲作風枝斜。再惱玉堂宿。題洪內翰侍兒翠翹畫竹。圖繪寶鑑。

劉知過

知過字與機。天台人。未冠領鄉薦。紹興二十一年中特科。監南嶽廟。與弟知變俱以文名。尤工于詩。參政賀允中題其詩曰。江東天籟。

春日

濃起香塵十里晴。晚來烟雨忽斜橫。花開花落清明候。山北山南杜宇聲。追念舊遊渾似夢。退思良計不如耕。人中喜有彌天釋。時吐清文慰此情。台州府志。

秦熿

熿字伯陽。本檜妻兄。王喚孽子。檜乞養爲後。紹興二十一年進士。累官翰林學士。知樞密院事。進

少師致仕。

齊東野語。燿本王氏子。檜素不悅。檜畏內妾嘗孕。其妻逐之。生子爲仙游林氏子。曰一飛。以檜故。仕至侍郎。兼給事中。曹泳嘗勸檜還一飛。未果而檜死。

送舅氏知湖州

暫別甘泉豹尾中。隼旟仍駐水晶宮。文昌地禁論詩少。燕寢凝香薄領空。可但龔黃宜共理。便應顏謝與同風。飽聞回老榴皮事。試問溪頭鶴髮翁。

雪麓激鈔。說者謂呂仙嘗到湖之東林。訪沈東老留詩。既而登東林寺于壁間。以榴皮自畫其像。人初不知。及秦伯陽送舅氏王亨道知湖州詩。出觀者如堵。

林之奇

之奇字少穎。福州候官人。紹興二十一年進士。尉長汀。召爲校書郎。以病除。大宗正丞。提舉本路市舶。再任本路參議官。終朝奉郎。有拙齋集。

新晴山月。曰瑄按宋文鑑作文同。

高松漏疎月。落影如畫地。徘徊愛其下。夜久不能寐。怯風池荷卷。病雨山果墜。誰伴余苦吟。滿林啼絡緯。

江月圖

冥冥一月輪。不知水與天。獨于顛氣中。仰見素璧圓。超然狂道士。起視清夜闌。自拈白玉笛。吹此江月寒。想當萬籟息。逸響流空烟。我從江海來。形留意先還。何當買漁篷。追此水月仙。

早春偶題

寒風浙瀝鳴枯葦。小鴨熏殘猶未起。更教細雨結輕寒。坐聽蕭蕭打窗紙。石盆春蒲已抽翠。雕斛栽花未
生紫。擁爐閉閣賦幽香。未怕春冰生硯水。以上拙齋集。

黃巨澄

巨澄、餘姚人。紹興二十一年進士。官吏部侍郎。

登四明山

會稽東南秀。四明名更佳。蜿蜒三百里。慘淡青蓮花。伊昔天地初。山川始萌芽。六丁運神斧。斲削如人家。四牖遺古制。玲瓏吐雲霞。側聞劉樊徒。于此鍊丹砂。耕烟種青樗。結實大如瓜。揮手謝衆士。身登鳳凰車。至今石窗底。青天守龍蛇。玉女四五人。綠鬢垂鬢髻。時來聽潺湲。意態靜不譁。我夜闖其旁。月黑星如麻。願慙無靈氣。悵望空咨嗟。姚江逸詩。

宋詩紀事卷五十一

錢唐 厲鶚 緝

錢唐 葉世紀 勘定

張孝祥

孝祥字安國，歷陽烏江人。紹興二十四年廷試第一。孝宗朝，累遷中書舍人、直學士院，領建康留
守。尋以荆南湖北路安撫使請祠，進顯謨閣直學士，致仕卒。有于湖集。

題定山寺 時年十六歲

蹇驢夜入定山寺，古屋貯月松風清。正聲挂塔一鈴語，不見撞鐘千指迎。

題夏氏莊

平湖漠漠雨霏霏，壓水人家燕子飛。欲向湖東問春色，杏花無數點春衣。以上于湖殘稿

賀郊祀慶成

漢統千齡接，虞衡七政齊。德馨天自饗，容備古猶稽。輿衛鉤陳北，衣冠觀闕西。雨先清道蹕，寒避禮神圭。
方士朝仙仗，宮垣挾御隄。廟芝楹疊壁，帝樂字連奎。虛次尤祇慄，懷親極慘悽。珠旒依玉色，蘭炬映璇題。
兩相初扶翼，崇壇六降隋。高靈森欲墮，諸福應如攜。燎夜壇三燭，凌霜甲萬犀。宗燔申寶酌，祕檢護金泥。
奉引星辰爛，旋歸錦繡迷。端門臨五鳳，步輦駐雙霓。日照雲裳委，風含綵笈低。和聲翔四表，嘉澤浸羣黎。

盛事真寥廓。微生荷獎提。侍祠叨執爵。著籍繆通閭。異寵何其報。孤忠誓不睽。裁詩獨愁晚。猶得並鳧鷖。

柳子酒榼

矮胡生南方。託家碧山崖。採擇供貢篚。扶持上天街。媿此愿慙姿。欲售久未諧。道傍麴先生。風味固自佳。逢渠卽傾蓋。輸寫能開懷。刮削出光采。規繩去敲窰。金玉豈足貴。膠漆真吾儕。客來有佳招。二士往必偕。婆娑止坐隅。供饋煩金釵。矮胡雖木強。醇德真無涯。虛心實其腹。居然外形骸。微物幸見用。棄置理則乖。毛穎有封國。陶匏薦禋柴。大藥起世痾。炮燔及根荑。願子自洗濯。勿受塵埃壅。暇日肯相從。醉經坐高齋。

舟行大雨戲作呈張立之及同行諸公

我船千斛初甚遲。上灘下灘風薄之。百夫撐挽纔得過。水淺舟大行無期。同來賓客笑鈍滯。一葉自買如鳧鷖。瞥波急漿亂藻荇。瞬息不見颿車馳。忽然昨夜雷雨作。墨雲頽山風卷壑。龍門春漲魚鼈亂。牛渚宵明鬼神惡。篷翻纜斷泊不得。客只一身無處著。長年叫客強驚起。一浪先掀半船水。囊衣漂盡到巾屨。終夜奔茫沙石裏。我時酣寢殊不覺。但怪颼颼風到耳。起來呼酒自勞苦。水滿涼生差可喜。向來笑者今卻悲。人生淹迷那能知。明朝轉舵我船快。喚客同船莫嫌隘。以上合璧事類外集

贈滕使君

千騎東方白玉鑣。十眉環坐紫檀槽。安南都護來鼇禁。建武將軍握豹韜。瘴雨蠻烟驚鼓角。朔雲邊雪滿旌旄。夕烽不到甘泉殿。尺一徵還近赭袍。

贈甘法曹

北岳仙人汗漫遊。斯文曾到海邊州。誰憐詩禮甘公子。牢落青衫到白頭。以上合璧事類後集

可賦軒在西湖寶林院

光明獵獵上烏巾。不那西湖爛漫春。借我繩牀對脩竹。爲君一洗輦紅塵。咸淳臨安志

東坡

繫船著西日。曳杖到東坡。暗井蛙成部。荒祠鳥作窠。老仙騎鶴去。稚子飯牛歌。興廢何須問。斯文自不磨。
方輿勝覽

玉淵亭

靈源直上與天通。借路來從五老峯。試向闌干敲拄杖。爲君喚起玉淵龍。

方輿勝覽。亭在廬山棲賢寺門外。澗中白石不以數計。如臥羊。故曰玉淵。張安國書二字。仍作詩。

萬杉寺

老榦參天一萬株。廬山佳處著浮圖。祇今買斷山中景。破費神龍百斛珠。

程史。王阮偕張紫微游廬山萬杉寺。紫微大書二章。阮憮然曰。先生氣吞虹霓。今少卑之何也。別去兩旬。而得湖陰之計。紫微于此絕筆。

題蔡濟所募御府米帖

生前官職但執戟。身後一字萬金直。當時雷電下收拾。世閒不復有遺逸。整整十卷字尤溼。光采激射海爲立。平生我亦有書癖。對此懽懽心若失。口吐汗下屢太息。十日把玩不得食。作牋天公拜稽首。乞我此老生時一雙手。爲君痛飲百斛酒。墨池如江筆如帚。一掃萬字不停肘。後村詩話

涪溪中興頌在永州祁陽縣

繡綳兒啼思塞酥。重牀療香驅羣胡。黃君錦鞵無尋處。一夜驚眠搖帳柱。朔方天子神爲謀。三郎歸來長慶樓。樓前拜舞作奇祟。中興之功不贖罪。日光玉潔十丈碑。蛟龍盤拏與天齊。北望神京淚雙落。只今何人老文學。涪溪集

元風洞在桂林七星山。陰風襲人。凜如冰雪。

山入烏蠻連越嶲。天開斗野對珠宮。應憐桂海長炎熱。乞與清涼萬竅風。桂林府志

張 堅

堅、鎮江人。紹興二十四年進士。

鶴廟松聞采茯苓者傷其根。遂枯其半。

誰種飛仙百丈梯。風摧雨折昔人非。憑誰寄語楊員外。留取孫枝待令威。茅山志

虞允文

允文、字彬甫。隆州仁壽人。紹興二十四年進士。累除中書舍人。直學士院。被命犒師。立功采石。乾道中。歷左丞相。同中書門下平章事。兼樞密使。封雍國公。以少保宣撫四川卒。贈太傅。諡忠肅。有

集。鶚按咸淳臨安志。紹興二十四年張孝祥榜。無二十三年榜。宋史誤也。今訂正。

過瀘江亭

映水林巒影顛倒。濟川舟楫勢崢嶸。東行萬里欲乘興。更待一篙春水生。全蜀藝文志

錢良臣

良臣字友魏。華亭人。紹興二十四年進士。孝宗朝。拜參知政事。罷知鎮江。

顧野王讀書堆

伊昔邊烽備不虞。太平移作梵王居。而今江表全無事。借我三椽更讀書。松江府志

梁安世

安世字次張。括蒼人。紹興二十四年進士。淳熙中。桂林轉運使。有遠堂集。

石芥

擷根山石貯瓶罌。桂後緘題見者頽。風味莫嫌無醞藉。杯杓也解作聰明。願言噴嚏傳心事。搔首躊躇散宿醒。最是徂徠明道地。至今姦膽亦魂驚。蘆浦筆記

秦碑一紙并古詩。呈王梅溪太守。

公生博物好奇古。勸我搜求秦望碑。我來稽陰且三載。夢寐絕頂雲俱馳。事非近代問父老。鼻祖已來猶不知。或云其山多虎狼。困湫罅井蟠蛟螭。魍魎木客忌人到。陰霾賊霧迷羊歧。樵夫懸磴懼失勢。一落萬丈誰能支。吾意此如鍾乳穴。民昔畏擾相。壽欺曩時山東之罌石。磅礴入海無津涯。固知秦人游戲餘。非

民之利寧一時。暇日登臨雲門寺。僧曰若耶溪上奇。山曰何山勢最峻。丹鶴夜宿天孫枝。南望天台西錢唐。下視峯岫如羣兒。李斯篆書真刻本。昔人避亂此見之。裹糴遂借墨工往。扳崖貫木如鹿麋。興觴酌酒山之神。千古呵護煩神司。銷鑠僅存三尺許。龜趺就鑿山石爲。剜苔剔蘚隨手剝。而節背角摧霜皮。老龍脫甲蛇解蛻。鋪紙拭墨漫披離。收藏入袖恍若失。遐想往昔還嗟咨。我聞太古功德盛。鋪寫不盡乾坤儀。詩書紙上自不朽。金石還有磨滅期。秦皇不慕仁義業。直謂堯舜猶瑕疵。焚書欲蓋前代美。寧聞伏生傳有頤。後生不廢丞相書。歌頌雖在皆浮辭。惜哉此紙無一畫。欲記存亡人應嗤。他年好事繼追訪。姑願首尾觀吾詩。雲門集

雙溪

春霖漲合兩溪平。雪浪中浮桑柘青。南市喚船撐未到。一番蓑笠滿津亭。金華府志

句

蕃馬步衝青苜蓿。羌兒臥唱白銅鞮。吹劍錄

何異

異字同叔。號月湖。崇仁人。紹興二十四年進士。累擢監察御史。遷右正言。寧宗朝。歷刑部侍郎。權工部尚書。以寶謨閣學士致仕。

一犁春雨圖

負郭先疇二頃餘。飽看雨後著耕夫。輓紅塵裏家山夢。卻就吾家閱畫圖。詩家鼎鑪

東園吟思玉蟾清。園客開門古意生。冰硯雲燈深洞宇。春花秋草舊宮城。人藏密樹尋聲見。鷺下寒池照影驚。三十分司泉石主。馬蹄塵外得聞名。

章少機建小閣用陳伯強韻

樓居草草假三閒。便覺星辰手可攀。最喜坐中先得月。不妨睡處也看山。林疎啼鳥秋彈曲。天闊飛鴻曉捲班。對鏡清吟無限好。典衣舊債幾時還。以上瀛奎律髓

句

天近風轉清。地高日難晚。

賓退錄。何月湖尙書少時登高峯壇。有句云。

云。林黃中侍郎見之。卽知其異。日必貴且壽。

范端臣

端臣字元卿。蘭溪人。浚從子。紹興二十四年進士。累官中書舍人右史。有文集。

題小三洞石磴

短策將我影。照盡山前溪。蚤緣入風磴。歷覽窮攀躋。不須翦梧桐。自倚青冥梯。金華府志

范成大

成大字致能。號石湖居士。吳郡人。紹興二十四年進士。孝宗時累官權吏部尙書。拜參知政事。進

資政殿學士提舉洞霄宮卒諡文穆有石湖集

楊誠齋序大篇決流短章斂芒縹而不釀縮而不儉清新嫵媚奄有鮑謝奔逸雋偉窮追太白求其隻字之陳陳一唱之嗚嗚不可得也

齊東野語文穆范公成大晚歲卜築於吳郡盤門外十里蓋因園閭所築越來溪故城之基隨地高下而爲亭榭所植皆名花而梅尤多別築農圃堂對楞伽山臨石湖蓋太湖之一派范蠡所從入五湖者也孝皇嘗御書石湖二大字以賜之公作上梁文所云吳波萬頃偶維風雨之舟越戊千年因築湖山之觀是也又有北山堂千巖觀鏡閣書櫟堂他亭宇尤多一時名人勝士篇章賦詠莫不極鋪張之美

州橋南望朱雀門北望宣德樓皆御路也

州橋南北是天街父老年年等駕迴忍淚失聲詢使者幾時真有六軍來
市街京師諸市皆荒索僅有人居

梳行訛雜馬行殘藥市蕭騷土市寒惆悵輦紅佳麗地黃沙如雨撲征鞍
金水河在舊封丘門外河中多大石皆長嶽所隕

菜市橋西一水環宮牆衣舊俯清灣誰憐磊磊河中石曾上君王萬歲山
欒城縣極草草伴使怒頓餐不精欲撈縣令跪告移時方免

頽垣破屋古城邊客傳蕭寒爨不烟明府牙緋危受杖欒城風物一凄然

當年玉帛聘遼陽。出塞曾歌此路長。漢節重尋舊車轍。插天猶有萬垂楊。

琉璃河 又名劉李河。在涿州北三十里。極清泚。茂林環之。尤多鴛鴦。千百爲羣。

烟林蔥蒨帶回塘。橋眼驚人入睡鄉。健起褰帷揩病眼。琉璃河上看鴛鴦。
此河大中祥符開路。振乘輶錄。亦謂琉璃河。惟嘉祐中宋敏求入番錄。乃謂之六里河。

灰洞 在涿北燕南之間。兩旁皆高岡。無風而路極狹。塵土壅積。咫尺不辨人物。

塞北風沙漲帽簷。路經灰洞十分添。據鞍莫問塵多少。馬耳冥濛不見尖。

會同館 燕山客館也。授館之明日。守吏微言有議留使人者。

萬里孤臣致命秋。此身何止一漚浮。提攜漢節同生死。休問羝羊解乳不。
遼人館本朝使。已謂之會同館。

挽王提刑彥光

喻蜀三年戍。還吳萬里船。雲歸雙節後。雪白短檣前。百世春秋傳。一墟陽羨田。浮生如此了。何必更凌煙。
日者悲離索。公乎又杳冥。門人辨韓集。子舍得韋經。此去念築室。空來聞過庭。路遙人不見。千古泣松銘。

中吳紀聞。王葆。字彥光。崑山人。擢宣和甲辰第。紹興中。除監察御史。出知漢州。移浙東。提刑歸鄉卒。其學長于春秋。著集傳十五卷。備論兩卷。姪彥嘉。登第。彥光監裁甚精。今參政周公初登第。愛其博洽。納之爲壻。尋卽榮遇。參政范公挽詩云。

丁酉重九藥市呈坐客

莫向登臨怨落暉。自緣羈宦阻歸期。年來厭把三邊酒。此去休哦萬里詩。烏帽不辭敲短髮。黃花終是欠東籬。若無合坐揮毫健。誰嗣西風楚客悲。以上石湖詩集

澄懷錄。范石湖云。淳熙己亥重九。與客自閩門汎舟。徑橫塘。宿霧一白。垂垂欲雨。至綵雲橋。氛翳豁然。晴日滿空。風景閑美。無不與人意會。四郊刈熟。露積如綠。垣田家婦子著新衣。略有節物。挂帆迺越來溪。潦收淵澄。如行玻璃地上。菱花雖瘦。尙可采。擷穠榴石湖。扣柴荆。坐千巖觀下。菊叢中大金錢一種。已爛漫穠香。正午薰入酒杯。不待蠡飲。已有醉意。其傍丹桂二畝。皆盛開。多欒枝芳氣。尤不可耐。攜壺度石梁。登姑蘇後臺。躋攀勇往。謝去巾輿。筇杖石稜草滑。皆若飛步。山頂正平。有坳堂。礧石可列坐。相傳爲吳故宮閑臺別館所在。其前湖光接松陵。獨見孤塔之尖。少北墨點一螺爲崑山。其後西山競秀。縈青叢碧。與洞庭林屋相竇。大約目力踰百里。具登高臨遠之勝。始余使虜。是日過燕山館。嘗賦水調首句云。萬里漢家使。後每自和。桂林云。萬里漢都護。成都云。萬里橋邊客。明年徘徊藥市中。頗歎倦游。不復再賦。但有詩云。今年幸甚。獲歸故園。偕鄰曲二三子。醺酣佳節于鄉山之上。乃復用舊韻首句云。萬里吳船泊。歸訪菊籬秋。

致爽軒在永康軍

夕陽塵外漲郊墟。六六峯頭夢覺餘。竹色喚人來下馬。亂蟬深處有圖書。方輿勝覽

馬大同

大同字會叔。嚴州人。紹興二十四年進士。歷官戶部侍郎。

提刑少卿嚴陵馬大同。以職事循行過九疑。謁舜祠下。而祠宇圯甚。顛蹶旣歎。乃留錢百千。屬邑討

鄒安道爲之繕葺因賦小詩聊序一時之勝云淳熙癸卯冬至前一日

帝德于今祀萬年如何遺像託疎椽憑誰爲假丹青手付與梅仙十萬錢九疑山志

甄龍友

龍友字雲卿永嘉人遷樂清紹興二十四年進士官至國子監簿

觀洞庭

風定澄空氣渾然恍疑太極未分前。祗因有浪知爲水。若遇無風卽是天。舊說君山張帝樂。新聞老木識飛仙。而今大洞黃庭客。又看題詩紀歲年。東甌詩集

徐夢莘

夢莘字商老臨江人紹興二十四年進士紹熙中爲荆湖北路安撫司參議官著三朝北盟會編

除直祕閣

江西鄉人同仕廣右者十有二。李蹊成叔郭有憑充誠潘脩文叔李石鑿玉徐夢莘商老王壘季文張坦明仲蔡詵子羽

陳公瓌師宋魏沐董父王思詠詠之孟浩養正淳熙重光亦奮若仲秋中澣講鄉會于湘南樓過彈子崑

吾儕生江南。遠近且鄰鄉。一官皆爲貧。餬口走四方。遇合良獨難。動如參與商。誰知自有時。朋盍聚炎荒。外臺參計畫。幕府佐紀綱。出宰得壯縣。司教洩郡庠。曹掾勝三語。簿領眞仇香。不止似人喜。頓覺吾輩張。合坐尊序齒。避席敬行觴。崑洞縱登覽。杖屨倍徜徉。棊矢以相娛。嘯歌情意長。舉酒起祝規。愛我藥石良。古人尙植立。君子道其常。平生學忠孝。餘力從文章。臨節不可奪。當官有何強。窮乃見節義。老當志彌剛。

鴻鵠在寥廓。騏驎終騰驤。願言各勉旃。富貴無相忘。桂勝

楊萬里

萬里字廷秀吉水人。紹興二十四年進士。光宗朝。歷祕書監。出爲江東轉運副使。再召皆辭。寧宗朝。以寶謨閣學士致仕。卒諡文節。有誠齋集。

周益公題跋。誠齋大篇短章。七步而成。一字不改。皆掃千軍。倒三峽。穿天心。透月脇之語。至于狀物姿態。寫人情意。則鋪敘纖悉。曲盡其妙。筆端有口。句中有眼。

困學紀聞。誠齋讀貞觀政要云。拔士新豐逆旅中。懷賢鴨綠水波東。酒傾一斗。齋肩客。醋設三杯。羊鼻公。羊鼻公。謂魏鄭公。見龍城錄。

觀太平寺畫水長句

太平古寺劫灰餘。夕陽惟照一塔孤。得得來看還不樂。竹莖荒處破殿虛。偶逢老僧聽僧話。道是壁間留古畫。徐生絕筆今百年。祖師相傳妙天下。壁如雪色一丈許。徐生畫水纔盈堵。橫看側看只麼是。分明是畫不是水。中有清濟一線波。橫貫萬里濁浪之黃河。雷奔電卷儘渠猛。獨清元自不隨他。波痕盡處忽掀怒。攪動一河秋水暮。分明是水不是畫。老眼向來元自誤。佛廬化作金陀樓。銀山雪堆風打頭。是身飄然在中流。奪得太一蓮葉舟。僧言此畫難再覓。官歸江西卻相憶。并州剪刀剪不得。鵝溪匹絹官莫惜。貌取

秋濤懸坐側。

觀梁溪漫志吾州太平寺。鄙人徐友畫清濟貫河一筆。紆遠長數十丈。不斷卻立。而觀濤瀾洶湧。目爲之眩。仰首近之。凜然若飛流之灑于面也。楊誠齋爲太守。爲賦長句。

游豐湖

三處西湖一色秋。錢塘潁水更羅浮。東坡元是西湖長。不到羅浮便得休。

梁溪漫志。杭潁皆有西湖。東坡連鎮二州。故表謝云。入參兩禁。每玷北扉之榮。出典二邦。輒爲西湖之長。晚謫惠州。州有豐湖。亦名西湖。淳熙中。楊祕監使廣東。過之。賦詩云云。

寄陸放翁

君居東浙我江西。鏡裏新添幾縷絲。花落六回疎信息。月明千里兩相思。不應李杜翻鯨海。更羨龔龍集鳳池。道是樊川輕薄殺。猶將萬戶比千詩。

鶴林玉露。放翁晚年爲韓平原作南園記。除從宦。楊誠齋寄詩云云。蓋切磋之也。然南園記唯勉以忠獻之事業。實無諛辭。

題牧牛亭秦太師墓

函關只有一穰侯。瀛館寧無再帝丘。天極八重心未死。台星三點坼方休。只看壁後新亭策。恐作枵中屬國羞。今日牛羊上丘壟。不知丞相更瞋不。
自注。秦暮年起大獄。必殺張德遠。胡邦衡等五十餘人。不知諸公殺盡。將欲何爲。奏垂上而卒。故有新亭之句。然初節似蘇子卿而晚謬。

程史。金陵牧牛亭。秦氏之丘隴在焉。楊誠齋嘗題詩壁間云云。檜墓前隊碑。宸翰在焉。有其額而無其辭。臥一石草間。曰。當時將以求文。莫之肯爲。檜在虜。撻嫺縱之逃歸。不知何以似子卿也。

明發南屏

新晴在在野花香。過雨迢迢沙路長。兩度立朝今結局。一生行客老還鄉。猶嫌數騎傳書札。賸喜千峯入肺腸。到得前頭上船處。莫將白髮照滄浪。以上誠齋集

鶴林玉露。孝宗朝。誠齋爲祕書監。論高宗配享。出守

高安。其去國時詩云。可謂無幾微見于顏面矣。

過楚州淮陰侯廟

鴻溝砥道萬夫雄。雲夢何銷武士功。九死不分天下鼎。一生還負室前鐘。古來犬斃愁無蓋。此後禽空悔作弓。兵火荒餘非舊廟。三閒破屋兩株松。

程史音節悲壯。倫擬抑

揚。偏壁閒殆無繼者。

惠迪

迪字楸吉。宜興人。紹興二十四年進士。官大理司直。改國子博士。

婆餅焦

夢破一聲婆餅焦。吳音未穩帶春嬌。不禁風力遙飛去。卻引餘音過別條。前賢小集拾遺

句

小屋牽蘿補高軒，偃蓋過。

孫觀惠公墓誌云：楸吉少時治一室，讀書其中。予過賦小詩，楸吉和答云云。予讀之驚歎。

王十朋 毛虞卿

十朋字龜齡，樂清人。紹興二十七年進士第一。孝宗朝累遷起居舍人、侍御史、改吏部侍郎。歷四郡守，以龍圖閣學士致仕。卒諡忠文。有梅溪集。

劉珙序云：公平居無所嗜好，顧喜爲詩，渾厚質直，懇惻條暢，如其爲人。

會稽秦頌德碑，丞相李斯篆。世傳在秦望山，莫知所在。教授莫君好奇嗜古，搜訪尤力。有言碑在何山者，莫以語某。何山見于圖經，在秦望東南，疑其真秦望也。某欣然欲往，職有所拘，以告會稽梁尉。慨然而行，登山果見之。碑石僅存，字磨滅已盡，墨片紙而還。作古風長韻，具記始末。因次其韻，且記吾三人好事之癖，亦以示後人也。

姬嬴遺蹟存者稀，世傳石鼓稽山碑。石鼓揄揚得韓子，文與二雅爭驅馳。秦碑誇大頌功德，埋沒草莽無人知。或言山頂石猶在，上有虎豹龍蛇螭。神藏鬼護荆棘蔽，崖懸磴絕登無歧。廣文好奇探禹穴，梅仙好事尋僧支。我贊其行要親覩，勿受世俗流傳欺。望秦秦望兩嶄絕，何山壁立東南涯。豐碑屹植最高處，不

知磨滅從何時。剔苔掃墨了無有。模糊片紙亦足奇。濃雲瀼瀼黯將雨。古木槎枒蟠老枝。歸來走筆出險語。訶叱政斯同小兒。詩成得得寫寄我。辭嚴意偉法退之。我聞秦人滅六國。酷若犬磔臨海廩。先王法爲秦所負。負秦況有秦有司。五經灰飛儒濺血。堯舜周孔何能爲。上蔡獵師妙小篆。奴視俗體徒肥皮。東封泰山南入越。大書深刻光陸離。沙丘風腥人事變。鬼飢族赤誰嗟咨。漢興萬事一掃去。惟有篆刻餘刑儀。磨厓欲作不朽計。其如歷數不及期。蚩尤五兵□漆器。人物美惡能相疵。我雖過秦愛遺畫。南山入望頻支頤。不須嶧陽訪棗刻。不用遷史觀雄辭。虛堂默坐對此紙。閉眼暗想君勿嗤。要知秦碑沒字本。卻類周雅無辭詩。

悼張安國舍人

天上張公子。少年觀國光。高名一枝桂。遺愛六州棠。出世纔成佛。修文遽作郎。長沙屈賈誼。宣室竟淒涼。

悼亡

燕寢焚香老病身。細君相對坐如賓。而今一榻維摩室。唯與無言法喜親。偕老相期未及期。回頭人事已成非。逢春尙擬風光轉。過眼忽驚花片飛。

東屯

少陵別業古東屯。一飯遺忠剛畝存。我輩月叨官九斗。須知粒粒是君恩。

方輿勝覽東屯有青苗陂杜詩云東屯稻田一百頃北有澗水通青苗晴浴狎鷗分處處雨隨神女下朝朝又云東屯復漢西一種住青溪東屯之田可得百許頃稻米爲蜀第一郡給諸官俸廩以高下爲差帥漕月得九斗故王詩云云

初至泉州示七邑宰

九重天子愛民深。令尹宜懷惻隱心。今日黃堂一杯酒。使君端爲庶民斟。

十日同知宗提舶游九日山延福寺

十日同登九日山。山中好處略躋攀。桑田改變松猶在。車馬往來僧自閑。昨日風應吹紫帽。今朝菊已帶衰顏。登臨稍愜南來意。好逐飛飛倦鳥還。

和韻題秦隱君系故居

山中高韻欲逃名。不謂名隨隱處成。鑿石一泓詩數首。也曾攻破五言城。

夜聽雙瀑同劉方叔毛虞卿聯句

夜聽雙瀑喧遙聞。疑雨來澗壑。生清風。襟宇捐纖埃。龜齡飛鳴撼半空。暗想飄瓊瑰。前觀阻步履。側耳成徘徊。虞卿蕭然山館閒。此興何悠哉。子晉不復見。月白空蕭臺。方叔以上梅溪集

王孝子詩

臣子大節孝與忠。父母仇讐天下同。賢哉會稽王孝子。感慨有古烈士風。松楸一夕盜破冢。親獲鼠輩聞之公。有司守法貸其命。孝子銜恨無終窮。誰謂書生膽如許。貌若虺羸中。甚武手斬凶人提髑髏。請死伸冤詣公府。君不見齊襄內行世所羞。春秋賢之緣復讎。又不見子胥鞭屍報父怨。太史爲之作佳傳。君今枕戈志已伸。更須移孝爲忠臣。他年當作傅介子。誓斬樓蘭雪國恥。

梅磻詩話。王公袞吉老。會稽山陰人。紹興甲戌登進士第。仕至左司郎中。盜劫其母墓。成獄盜不死。吉老手殺之。詣州自言。兄宣子請納所居官以贖其罪。時梅溪王公十朋爲叢幕。賦詩以美之。

吳已正

已正。溫州人。

句

舉頭不忍看王十。回面猶欣見李三。

二老堂詩話。紹興二十七年。御筵進士四百二十六人。溫州王十朋爲之首。其鄉人吳已正。纒末特奏狀元之後。則福州李三英例。賜出身。附名正奏之後。已正有詩云。

何德獻

德獻。官饒州提點。

送王龜齡自饒州遷夔州。饒人遮道挽留。公易轎由閒道而去。

斷橋截鐙亦堪憐。始信林閒別有天。微見兵機第一義。朱幡暫席廣文氈。梅溪文集附

趙十朋

十朋。台之黃巖人。紹興閒隱士。

絕句

四枚豚犬教知書。二頃良田儘有餘。魯酒三杯碁一局。客來渾不問親疎。

見王梅溪集後梅溪和之云薄有田園種斗升兩兒
傳授讀書燈客來一局三杯酒王十朋如趙十朋

姜大呂

大呂字渭叟王梅溪之友

懷王龜齡

左原消息杳無聞。令我愁懷似亂雲。多病廢詩兼廢酒。青春孤我亦孤君。要同學問文章樂。無奈東西南
北分。況是一簷殘雨後。落花飛絮雨紛紛。王梅溪集附

劉鎮

鎮字方叔紹興閒人登戊辰科與王梅溪十朋游有待評集梅溪爲序今不傳

書王龜齡述恨詩後

附 山北山南春雨足。漠漠柔桑秀如沃。儂家荆婦幾時歸。西疇獨自驅黃犢。王詩有剩栽桑柘教妻蠶之句 梅溪集

唐立夫

以日者命狀寄王龜齡

試把流年子細看。休將螻屈比鵬搏。渠家大有回天力。不易區區作好官。王梅溪集附

孫 稿

稿字子尙開封人紹興閒家于會稽與王十朋友善

往浙西別王龜齡

中原回首尙胡塵。世事徒驚日月新。羈旅不堪頻作別。壯懷雖在已甘貧。南來求友傳三益。西去論心有幾人。別後夢魂何處是。祇應來往慎江濱。王梅溪文集附

王 桓

桓字嘉叟。安中孫。寓居泉南。紹興閒。官至刑部侍郎。

題王龜齡詹事祠堂

當時孤論偶相同。終始知心每媿公。纔見安車延綺季。遽嗟石室祀文翁。百年公議分明在。一餉紛華究竟空。白髮舊交衰甚矣。尙能留面對高風。自注。始予與龜齡別。嘗謂吾輩會合不可常。但令常留面目。異時可復相見。龜齡再三擊節。後一見必誦此言。貴耳集。

句

柳色知春淺。鐘聲覺寺深。避虎連村靜。分魚一市腥。後村詩話

聞人符

符嘉興人。紹興二十七年進士。餘杭尉。

題清習閣

清曉捲書坐。開簾揖遠峯。膩雲留宿潤。膏雨沐春容。世味生來薄。詩愁晚更濃。溪山看未足。還聽暮樓鐘。咸淳臨安志

劉清之

清之、字子澄、臨江人。紹興二十七年進士。累官知衡州。

洞霄宮

青山鎖斷紅塵路。石柱干霄藏洞府。老蛟據窟不可窺。千古流泉替渠舞。真墟容我輒躋扳。心曠方知白日閑。飛仙一去忽已遠。坐對松梢雲往還。洞霄詩集

洞庭湖

天孫歲晚會湘靈。倒瀉銀河合洞庭。上下天光唯一白。中間山色不多青。荊潭萬里收塵滓。宇宙連宵失晦明。莫家人閒少仙境。詩思酒魄一時醒。岳陽紀勝

遊洪陽洞

朝來拔腳塵埃底。共訪人閒小有天。喚醒幾年朱墨夢。胸中丘壑故依然。袁州府志

李南金

南金、字晉卿。自號三谿冰雪翁。樂平人。紹興二十七年進士。光化軍教授。

江頭吟

兒時盛氣高于山。不信壯士有飢寒。如今一杯零落酒。風雨蝕盡征袍單。側立崑奴面鐵色。楚客不言未吹笛。關山有月無人聲。自是江頭渚花發。渚花春少未得妍。凝立青山圍水天。杜鵑故態不識事。盡情叫入青楓烟。壯士未握邊頭槊。旋頭如月幾時落。如今世界不愛賢。看取清風白雲角。嗚呼一歌兮歌已怨。

壺中無酒可續嘯。

鶴林玉露云。調

旨清婉可愛。

茶聲

砌蟲唧唧萬蟬催。忽有千車捆載來。聽得松風并澗水。急呼縹色綠瓷杯。

登第後畫師以冠裳寫真戲題

落魄江湖十二年。布衫闊袖裹風烟。如今各樣新裝束。典卻清狂賣卻顛。

鶴林玉露云。一時

戲語亦自有味。

喻良能

良能、義烏人。紹興二十七年進士。補廣德尉。累遷工部郎官。出知處州。奉祠歸卒。有香山集。

秋曉野步

幽居邇郊原。出戶目已瞭。閑攜一枝竹。散步及秋曉。寒烟引輕素。澹澹縈木杪。矯首矚層穹。轉盼失飛鳥。野潦淨荒陂。驚颺泛枯篠。世態徒營營。此心殊了了。佳處誰與論。聊用付清醪。

三月二十四日再朝永祐陵

扁舟投曉出重城。春浪初肥綠滿汀。竹裏幾聲泥滑滑。河邊十里草青青。人家桃李驚飛燕。水面楊花入翠萍。漸近昭陵佳氣集。五雲松柏喜重經。以上義烏縣志

謝 諤

諤字昌國、臨江軍新喻人。紹興二十七年進士。孝宗朝、累官監察御史、光宗朝、除御史中丞、權工部尚書、請祠歸卒。初居縣南竹坡、名其燕坐曰良齋、人稱良齋先生。

清常寺

佛廬塵不到。客枕夢頻驚。浙浙山風響。纖纖隙月明。烟雲春漸暖。鐘磬曉逾清。蹤跡奔馳裏。飄浮媿此生。

鼇溪

數板小橋橫晚晴。兩行古木弄春榮。不知多少夜來雨。水到岸頭渾欲平。

玉山觀

微明燈火夜堂幽。聽徹絲桐萬慮休。骨冷魂清眠不得。竹風蕭瑟滿庭秋。以上撫州府志

沈清臣

清臣字正卿、鹽官人。紹興二十七年進士。上書貶封州。放還終祕閣修撰。有晦巖集。

遊道場山

松篁十里綠成谿。短短籃輿入翠微。回首青山已陳迹。隴頭猶見白雲飛。湖州府志

京 鏜

鏜字仲遠，豫章人。紹興二十七年進士。寧宗朝，拜左丞相。卒，贈太保。諡莊定。有松坡集。

曹操疑冢

疑冢多留七十餘。謀身自謂永無虞。不知三馬同槽夢。曾爲兒孫遠慮無。中州題詠集

吳微

微字益恭，初名稱避秀郎諱改名。紹興二十七年第進士。歷朝散郎。廣南西路安撫使。主管台州崇道觀。卒。諡文肅。有竹洲集。

汪叔耕見訪。不數日別去。惡語爲贈。兼簡子用子美二友。

負釁得老窮。埽軌事幽屏。茫然羅雀門。有客頤而整。悲歡十年別。尊酒清夜永。妙句時驚人。盈軸肯傾廩。三日語未休。霜寒夢歸省。臨流分別袂。波光照孤影。重念吾故人。雪屋青燈冷。天晴風日佳。何日過甌徑。石鼎然豆其。冰菹煮湯餅。

寓郡城客舍。熱不可寐。與程彥舉坐語達旦。

淡月微雲對倚樓。無聲河漢自西流。高城忽起梅花弄。散作晴空萬里秋。以上竹洲集

梁克家

克家字叔子，晉江人。紹興三十年進士第一。累遷中書舍人。孝宗朝，拜右丞相，封儀國公。卒，贈少師。諡文靖。知福州時，嘗修三山志。

賦九月梅花

老菊枯殘九月霜。誰將先煖入東堂。不因造物于人厚。肯放南枝特地香。九鼎燮調端有待。百花羞澀敢言芳。看來冰玉輝相應。好取龍吟播樂章。

梅磡詩話。梁鄭公克家未第時。爲湖州揭陽宰館客。寓縣治東齋。齋前有梅一株。忽于九月中盛開。嶺外梅著花。因早于江浙間。必至冬方有之。邑人殊以爲異。邑士多賦詩。往往詔令君。梁公亦賦一篇云。明年廷對魁天下。孝宗朝拜相。

次陳休應烹茗廓然亭見送韻

已行更爲玉泉留。好景煩公傑句收。紫帽峯前雙鷺下。幾多清興滿滄洲。南安縣志

沈瀛

瀛字子壽。湖州人。號竹齋。紹興三十年進士。

葉水心云。子壽少入太學。仕宦四十餘年。繼于王官。再入郡三佐帥幕。其生平業嗜文字。若性命在身。非外物也。

石人在德清縣南戴巷。邑人呼爲石人頭。

檢點行程歲歲同。石人頭畔且從容。向來奉口溪邊月。此夜乾元寺裏鐘。湖州府志

王質

質字景文。號雪山。鄆州人。寓居興國軍。紹興三十年進士。孝宗朝。爲樞密院編修官。出判荆南府。奉祠山居。有雪山集。紹陶錄。

何處難忘酒

何處難忘酒。英雄太屈蟠。時遠聊置畚。連至卽登壇。梁甫吟聲苦。干將寶氣寒。此時無一盞。拍碎玉闌干。
費耳集

東流道中

山高樹多日出遲。食時霧露且雰霏。馬蹄已踏兩郵舍。人家漸開雙竹扉。冬青市地野蜂亂。蕎麥滿園山雀飛。明朝大江載吾去。萬里天風吹客衣。
瀛奎律髓

居句曲山辭通明

林屋兮峨嵋。岱宗羅浮兮繚之。幅員既長兮無極。杳烟壑兮雲陂。谷高雲深兮矧昭陽。穹廬之翻覆。萬春千秋兮句曲。東麓兮南岡。桂椒蕭艾兮同香。湛汧溪兮永碧。岌茵山兮長蒼。
紹陶錄

蓋經

經、字德常。華亭人。紹興三十年進士。官戶部侍郎。

游大滌洞天

暇日尋幽入洞霄。攀蘿捫石自忘勞。地環九鎖仙都闕。山倚一峯天柱高。夜靜仙人吹鳳笛。月明帝子下雲旄。佩環寂寂中庭曉。時有胎禽唳九臯。
洞霄詩集

王信

信、字誠之。處州麗水人。紹興三十年進士。孝宗朝。歷官中書舍人。給事中。出知紹興府。有是齋集。

詠揚州后土祠瓊花

愛奇造物翦瓊瑰，爲鎮靈祠特地栽。事紀揚州千古勝，名傳天下萬花魁。何人折卻依然在，是處移將不肯開。謾說八仙模樣似，八仙那得有香來。處州府志

高文虎

文虎字炳如，餘姚人。紹興三十年進士。寧宗朝，歷中書舍人，翰林學士。

集高亭

山亭十月晏溫朝，倚檻一聲婆餅焦。舌澀力微寒氣早，不成清亮卻成嬌。

入剡詠桂花

溶溶漠漠秋光澹，耿耿寥寥夜色清。不是靈根涵爽氣，如何醞得此香成。以上剡錄

林外

外字豈塵，晉江人。紹興三十年進士。官興化令。有《嬾窠類稿》。

題西湖酒家壁

藥爐丹竈舊生涯，白雲深處是吾家。江城戀酒不歸去，老卻碧桃無限花。

齊東野語：林外詞翰瀟爽，談諧不羈，飲酒無算。在上庠暇日，獨遊西湖，幽寂處，得小旗亭飲焉。外美風姿，角巾羽帽，飄飄然神仙中人也。豫市虎皮錢篋數枚，藏腰間，每出其一入酒家，保傾倒使視其數，酬酒直，卽藏去。酒且盡，復出一篋傾倒如初。逮暮

所飲幾斗餘，不醉而隳中錢。若循環無窮者，肆人皆驚異之。都下直傳其酒家肆有神仙至云。

曰：竊按庚溪詩話亦載此詩，以爲必神仙語，不知爲外詩也。陶宗儀又以爲龍川蓋翁作，只數字不同。西溪叢話則以爲終南仵鑿監青州酒稅題酒樓所作，一詩互異如此。

向豐之

豐之、向后裔。

句

人情甚似吳江冷，世路真如蜀道難。

湖海新聞，豐之才調極高，貧窘則甚，有句云云，誠齋楊少監奇之。

胡澄

和葉樞相芍藥

鷓鴣一聲春已歸，蜨蜂無計戀花時。筆頭挽得春光住，卻是先生芍藥詩。四朝詩

鍾炤之

炤之、字彥昭、樂平人。

句

霖作商巖雨，薰來舜殿風。

夷堅志鍾炤之長子詞賦紹舉已卯春夜讀書窗下聞有哦句于外云至秋試以膏澤爲豐年詩鍾押豐字韻用此兩句入第五聯考官稱歎竟直高第

謝處厚

紀事

誰把杭州曲子謳，荷花十里桂三秋。那知卉木無情物，牽動長江萬里愁。

劉一清錢塘遺事孫何帥錢唐柳耆卿作望海潮詞贈之有三秋桂子十里荷花之句此詞流播金主亮聞之欣然起投鞭渡江之志謝處厚詩云云予謂此詞雖牽動長江之愁然湖山之清麗使士大夫流連于歌舞嬉游之樂遂忘中原是則深可恨耳。

林宋偉

宋偉、字力叟、號橘園。

題忠毅姚公廟

赤心許國自平時，見敵捐軀更不疑。權忌臯庸皆遁走，同時死難只青獅。

青獅乃姚馬名每親飼之若通其語言

時取斗酒投大盆中與馬同飲曰吾與汝同力報國竟與馬同死

農父犁田出寶刀。銅花浸血冷侵毛。神鋒凜凜衝星斗。未許豐城劍氣高。
耕者得姚所用大刀。重六十斤。
歲歲黍嘗九月期。西風笳鼓萬人悲。山邊走馬神旗閃。遙望君侯復下來。
軍民每當重九侯生日。集詞下祭醮。往往見飛騎來逸山。謂太尉來降。

兩日經行舊戰場。卻來祠下謁堂堂。偷生諸將今何在。萬古英靈獨耿光。

梅堯詩話。紹興辛巳之冬。金主亮傾國入寇。如林之族。充塞淮甸。尉子橋之戰。大將王權先遁。統領姚興獨以所部四百騎當虜六十萬。自辰至午。凡十戰。斃數百人。虜相謂曰。使更數人如此。吾曹何可當。權不遣一卒。援部將戴臯亦玩視不救。興竟沒于陣。朝廷憫其忠厚。加恤典。謚以忠毅。立廟淮甸。迨今血食橋園。林宋偉力。叟題四絕于廟。

婁乾德

潺湲閣 在袁州仰山廟右廡下

一派泠泠透檻清。塵襟洗滌自涼生。夜深好夢纔驚破。疑是半天風雨聲。
方輿勝覽

鄒杞

杞廬山人。

游洞霄宮

天柱古名山。形勢友列嶽。神人巢其巔。咳唾半天落。白晝見雲旗。清夜聞笙鶴。花源或流虹。仙禽猶擣藥。

長歌不可見。清風灑寥廓。洞霄詩集

寇元德

登岳陽樓

城頭雲氣壓層樓。城下江聲送客舟。天岳一峯青卓玉。洞庭千頃遠涵秋。繁華今古饒中土。形勢東南有此州。我欲浮家凌浩渺。不妨吟釣伴沙鷗。岳陽樓詩集

劉度

度紹興中祕書省校書郎。

挽郭彥鄒

孝友追前輩。雍容具典刑。人榮老萊服。天隕少微星。玉潤聯三傑。金篋擅一經。平生墊巾操。不媿伯恭醕。石洞遺芳集

陳良祐

良祐紹興中樞密院編修官。

挽郭丈彥鄒

誰起相如疾。空悲武子亡。平生有高志。屬意在諸郎。夢斷駒過隙。風高雁折行。莫陪千乘送。妙選媿東牀。石洞遺芳集

左璵

璵、字次琰、黃巖人、緯子、紹興中特科。

題馬世功豁野堂

歡言赴幽期、作意理烟艇、曳纜松篁陰、未覺心地迴、捨舟登爽塏、微步水雲淨、扶輿登斯堂、遐眺方一騁、開軒納野色、秋思浩千頃、心隨片雲遠、目送孤鴻影、坐久襟宇寬、萬事詎容省、永願陪清游、棲身白鷗境、
黃巖英氣

馮楫

楫、字濟川、紹興中、知邛州、龍門遠禪師法嗣。

自詠

公事餘閑喜坐禪、少曾將脅到牀眠、雖然現出宰官相、長老之名四海傳、五燈會元

陸升之

升之、山陰人。

皇后閣春帖子

內仗朝初退、朝曦滿翠屏、硯池渾不凍、端爲寫蘭亭。

桑世昌蘭亭考、憲聖慈烈吳太后居中宮時、嘗臨蘭

亭、山陰陸升之代劉琪春帖子云、刻石吳璠家。

嵎、字季夷、北海人。紹淳間名士。寓居吳興。陸務觀與之厚善。有北海集。

登更好堂。同景思少卿表丈韻。

萬里同行一瘦筇。撥雲問水有先容。更窮天姥投南路。已過台山第幾重。自此又隨雙澗月。何妨曾聽五峯鐘。卻從更好堂前望。滿眼詩材思不供。吳興藝文補

宋詩紀事卷五十二

呂及之

及之字周輔成都人

梅林分韻得愛字并序

紹興庚辰十二月既望縉雲馮時行從諸朋舊凡十有五人攜酒具出西梅林林本王建梅苑樹老其大可庇一畝中閒風雨剝裂仆地上屈盤如龍孫枝叢生直上尤怪古者凡三四酒行以舊時愛酒陶彭澤今作梅花樹下僧爲韻分題賦詩客既占韻立者倚樹行者環繞仰者承癩頰者拾英吟態不一皆可圖畫是行也余被命造朝行事薄遽重以大府衣冠謁報主人饋勞酬對犇馳形神爲之俱敝諸公導以斯游江流如碧玉平野秀潤竹塢桑疇連延彌望十五五籬落雞犬比閭相親不愁不嗟余散策其閒蓋不知向之疲繭厭苦所在也昔人謀于野則獲閑暇清曠有爽于精神思慮游不可廢如此哉又況所與游皆西州名俊熹事者耶詩成次第不以長少以所得韻之後先聯成軸客有十五韻止十四呂義父別以詩字爲韻又有首眩詩不成者缺樹字一韻余過沈犀樊允南監鎮稅語允南補之諸公又屬時行爲之序十五人者成都楊仲約施子一呂周輔義父智父澤父宇文德濟呂默夫杜

錢唐 厲鶚 輯
仁和 趙世鴻 勘定

少訥、房仕成、楊舜舉、綿竹李無變、潼川于伯永、正法寶印老縉雲、馮當可。

去城十里南郊外，突兀老梅餘十輩。玉雪爲骨冰爲魂，氣象不與凡木對。我來窮冬煙雨晦，把酒從公對公酌。人言此實升廟堂，埋沒荒村今幾歲。清芬不爲無人改，捐棄何如本根在。瑰章妙語今得公，國色天香真有待。歸路從公巾倒戴，俗物污人非所愛。我公行向日邊歸，此段風流入圖繪。成都文類

馮時行

時行字當可，巴縣人。紹興中，官奉禮郎。以斥和議坐廢。隆興初，提點成都刑獄。有縉雲集。

重陽登翠圍亭，亭廢十年。竹柏蒼然，殊蔽遠眼。命寺僧芟除翦伐，屏翳豁開。林巒杳靄，殆丹山之絕勝處也。與同游分韻賦詩，以老杜開林出遠山爲韻，得遠字。

林樾失洗沐，叢灌老偃蹇。坐令軒豁地，雍穆成奧閫。千年李峨眉，孤調絕攀挽。徑欲剗君山，笑看湘水遠。我來此亭上，造化閱舒卷。何堪浩蕩意，鬱鬱仰若俛。蘭蕙生當門，尙爾付錡畚。大材廊廟具，顧此何衰衰。石角礪霜斧，一斬三百本。圖事欲大快，不復計小損。天地英氣歸，川原勝魂返。鏡開水灑灑，龍轉山蜿蜿。臥虹踏歸市，融雲護春墜。晴光蕩芳酌，中筵舞蹲蹲。黃花壓客帽，胡牀秋風穩。萬象競參揖，相見一何晚。通塞有時運，明晦理相反。干戈天地閉，撫事切深悃。痛澆碗磊胸，不復效老阮。

和嘉州通判賈元升見贈

山城烏鵲喜，佳句來春風。洗手三過讀，散我碗磊胸。當年過秦論，千載猶爲雄。今觀妙好辭，蹀躞追前蹤。文章信有種，字字含徵宮。少城初識面，輒語開沖融。秋月耿高懷，春冰瑩清衷。俱墮人事海，煩促難春容。

況乃燕雀卑。未易參鸞鴻。別來邛笮外。一笑誰與同。羨君對賢牧。快飲如渴虹。何當款齋閣。餘濕借衰紅。所幸九河潤。密邇千乘封。臭味譬草木。我輩情所鍾。夢隨沫若水。下與九頂通。更願洗老眼。見君攀翔龍。中秋飲張仁甫家探韻得玉字。

數日及中秋。迎月試新醪。清暉困屏翳。頑陰費驅逐。廣座迷樽俎。高堂燦燈燭。未用卹一告。何妨縱白沃。見人如見月。張家呼小玉。

至日

至日寒無賴。今朝愁奈何。兩宮黃屋遠。二老白頭多。聖主今嘗膽。皇天忍薦瘥。乾坤爲回首。慷慨一悲歌。自行在解維。宿長安闌下。回望天竺諸山。依依在目。微臣去國。撫事感傷。因成此詩。

歸家豈不好。去國意如何。主聖憂思切。時危習俗訛。山高更回首。天闊阻悲歌。一寸丹誠地。餘生感憤多。和子應游萬州岑公洞。

泉細或疑雨。巖深微見天。暫來如可老。長往不難仙。石髓層層落。松聲樹樹傳。欲歸重回首。明月傍船舷。以上籍雲集

梅林分韻得梅字。

霜朝馬蹏無纖埃。錦城城西江之隈。金蘭合沓俱朋來。白沙鱗鱗江水洄。梅花傍江高崔嵬。人言猶是王建栽。豪華過眼浮雲哉。下馬酌酒聊徘徊。飛英送香來酒杯。酒酣疾呼竹籬開。走尋屋角如龍梅。梅龍雖多此其魁。睡龍屈盤肘承胷。風斂雨敲封蒼苔。孫枝迸出誰胚胎。天公撫摩春爲回。慎勿變化隨風雷。年

年開花照尊壘。我欲結茅買芋煨。與梅周旋送衰頹。成都文類

張積

馮先生訪梅于成都西郊。同游十五人。分韻哦詩。而積不與。翊日先生分僧字。屬積出之。

春回九地陽潛升。南枝破臘如酥凝。疎籬度香竹梢短。寒沙倒影溪流澄。魁然老株忽駭目。雪鱗矯矯雙龍騰。天公一叱困仆地。掀髯弄爪高曲肱。長林望斷千百株。奮首直欲青雲凌。黎明太守和羹手。十里往看車呼登。西江破曉郊路淨。盍簪者誰金蘭朋。懽笑藉草飛大白。行廚載酒多于澠。風花飄搖落杯面。漱齒澆胸如嚼冰。湘流之清峴山瘦。千古邂逅一笑興。卻踏東風急回首。侵夜霜月寒生棧。入門未坐亟相詫。曰。今見之生未曾。成都勝事多四蜀。我欲問津雲水僧。先生功成早勾身。未老重來倚醉藤。成都文類

于格

格字伯永。潼川人。

梅林分韻得彭字。

庭柯臥蒼蚪。閱世如聃彭。朔風破檀葉。零露滋玉英。江空人響絕。影落千丈清。今代文章錄。縉雲主齊盟。躍馬覩春色。觴客江上亭。三嗅韻勝華。霜霰飽曾經。及時剝其實。可用佐大烹。幸因轡軒使。錫貢充廣庭。王明儻子燭。和羹登籩鉶。成都文類

施晉卿

晉卿字子一。成都人。紹興進士。

梅林分韻得下字

郊原宿雨餘。雪重雲垂野。春信初動搖。欲往豈無駕。使君早著鞭。問路逢耕者。深尋烟雨村。共作詩酒社。庭荒六老樹。氣象自儼雅。一笑呼酒來。大盆注老瓦。最後看枯株。何意當大廈。天矯待風雲。有年天實假。須知羹鼎調。嘉實係用捨。我欲壽使君。鱗鱗更傾瀉。明朝得楚騷。健甚無屈賈。君今有賜環。詔落九天下。蜀江雪浪來。棹趁船人把。留滯以諸生。斯文要陶冶。惟應郢中歌。倡絕和自寡。更聞督熊兒。夜賦燭餘燧。它年看無雙。聲譽出江夏。卻笑昌黎公。阿買字能寫。成都文類

李流謙

流謙字無變。綿竹人。

梅林分韻得時字

巾冠墮城府。枯棹無停時。胸脾貯黃埃。非復林壑姿。涎流方外勝。秦人望軒羲。萬金買閑日。駕言一舒眉。冒踏衆俊場。更從百代師。食魚得河魴。熊蹯佐其滋。鬢鬢煙雨村。霜條出冰蕤。烏鵲噪寒暝。玉立山差差。置尊扶疎下。老榦蚪蛟馳。落葉不動塵。初無犀駭雞。羞我木石資。鬪公瓊瑤詞。深酌起自勸。滕莒吾封圻。公行對宣溫。雲霧生攀躋。能來玩墟落。正馬卻蓋麾。胸蟠萬蟬竦。區寰眇毫絲。以茲接羣動。白羽坐指攜。笑彼象外者。組紱爲之韉。它年駟馬還。梅花當十圍。識此黃公壚。下車挽客衣。未覺邈山河。一醉也大奇。

成都文類

樊漢廣

漢廣字允南、沈犀監稅。

沈黎使君與客飲王建梅林分韻作詩。過沈犀以詩相示。闕樹字。令漢廣補之。

牆頭冉冉新陽露。忽作玲瓏玉千樹。老蛟偃蹇獨避人。卷回飛雪江臯暮。何處鳴禽來好音。四月枝垂起黃霧。摧折霜餘初不懼。笑看春光等閑度。百年夢幻欲無言。吹落吹開豈風故。時來薦鼎真偶爾。小住疎籬非不遇。我知天地絕茫茫。無爲展轉獨多慮。爲花悽斷卻回頭。爾亦微酸苦難茹。成都文類

楊大光

大光字仲約、成都人。

梅林分韻得陶字。

蟠根寄荒絕。擢榦空櫺櫓。鄉來聞妙語。翦拂到兒曹。垂老猶叵堪。開落幾徒勞。不謂勤杖屨。惠然排蓬蒿。尙能領諸生。相就醉澄醪。真賴旁輝映。併覺標韻高。酒闌興未已。分韻看揮毫。籍湜俱可人。冥搜爭過褒。乃知天地閒。一等爲賢豪。橫飛與陸沈。亦各係所遭。再煩起窮邊。國柄行當操。盡期如此花。曉夕幸甄陶。得備和羹用。寧不出伊咎。百年幾春風。勿令心忉忉。成都文類

呂凝之

凝之字默夫、成都人。

梅林分韻得花字。

出郭豈憚遠。滿城無此花。新枝開玉雪。老樹臥龍蛇。臨水互蔥蒨。傍籬忽橫斜。詩聲寫奇怪。畫本出槎枒。

老子管彭澤，諸公賈長沙。不尋龍李盟，來嗅露霜華。杖屨穿茅舍，壺觴倩酒家。飢餐香馥郁，醉藉影參差。月白雁成字，江清魚可叉。風流一時勝，野意十倍加。祗恐天上去，迹陳錦江涯。歸來馬蹄疾，驚飛滿林鴉。
成都文類

呂商隱

商隱字義父，成都人。

梅林分韻得作字。

一樹知獨秀，十里方出郭。江流浩清冷，露氣凝淒薄。胡爲此行色，疲馬外踴躍。元冥正擅令，植物困搖落。喜見南北枝，粲然秀冰壑。千林色輝映，百畝香旁礴。首破春風荒，獨傲清雪虐。坐令芳信傳，芬菲到羣萼。如一君子信，茹連俱有託。相期飲此意，浩蕩放杯酌。更應護攀折，嘉實須若若。終收調鼎功，傅巖真可作。持問縉雲老，一尊笑相酢。
成都文類

呂宜之

宜之字澤父，成都人。

梅林分韻得詩字。

寒梅如高人，冰雪凜風期。霜威凌萬木，孤芳綴疎枝。古來歲寒心，肯與時節移。家家浣溪南，橫斜映筵籬。老樹更崛奇，矯矯蛟龍姿。中有調鼎味，幾年江之湄。征衫十年寒，霜蹄快追隨。先生羊叔子，到處英名垂。對花有妙語，豪氣無百卮。興來屬湛輩，同出春容詩。
成都文類

題文州安靜堂

峽東秋空一線青，萬山深處長官廳。此堂虛曠無餘物，面面爲開碧玉屏。方輿勝覽

辛棄疾

棄疾，字幼安，號稼軒，濟南歷城人。耿京聚兵山東，節制忠義軍馬，留掌書記。紹興三十二年，令奉表南歸，高宗召見，授承務郎、寧宗朝累官浙東安撫使，加龍圖閣待制，進樞密都承旨。卒，德祐初，以謝枋得請，贈少師，諡忠敏。

歸潛志：黨懷英，辛棄疾少同舍，屬金國初亂，辛率數千騎南渡，顯于宋。黨在北，擢第入翰林。二公皆有榮寵，後辛退閑，有鷓鴣天詞云：壯歲旌旗擁萬夫，錦襦突騎渡江初。燕兵夜捉銀胡象，漢箭朝飛金僕姑。思往事，歎今吾。春風不染白髭鬚。都將萬字平戎策，換得東郊種樹書。

武夷玉女峯

玉女峯前一櫂歌，烟鬟霧鬢動清波。游人去後楓林夜，月滿空山可柰何。方輿勝覽

元日

老病忘時節，空齋曉尚眠。兒童喚翁起，今日是新年。

送別湖南部曲

青衫匹馬萬人呼，幕府當年急急符。媿我明珠成意以，負君赤手縛於菟。觀書到老眼如鏡，論事驚人膽

滿軀萬里雲霄送君去不妨風雨破吾廬

後村詩話

幔亭峯

山上風吹仙鶴聲。山前人望翠雲屏。蓬萊枉覓瑤池路。不道人閒有幔亭。

建寧府志

尹 穉

穉字少稷。兗州人。僑居玉山。紹興三十二年。與陸游同賜進士出身。孝宗朝。累官殿中侍御史。右諫議大夫。以言者劾罷。

後村詩話。少稷及接呂居仁曾吉甫議論。在山中讀書二十年。名論極重。晚爲大坡。因符離之敗。攻張魏公父子。以附和議。遂爲公議所貶。甚可惜也。

庸醫行

南街醫工門如市。爭傳和扁生後世。膏肓可爲死可起。瓦屑蓬根盡珍劑。歲月轉久術轉疎。十醫九死一活無。北市醫工色漸動。大字書牌要驚衆。偏收棄藥與遺方。□□神丹亦無用。實者爲虛。熱爲寒。幾因顛倒能全安。君不見形神枵然臥一室。醫方爭工藥無必。左手檢方右顧金。兩手雖殊皆劒戟。

後村詩話似諷

當時主和戰者

句

景龍只是當時路。不見金錢打著人。靖康元夕異日是非憂史謬。終身寒餓羨錢愚。後村詩話

黃 銖

銖字子厚。號穀城翁。建安人。少師事劉屏山。與朱子爲同門友。有穀城集。其母孫夫人道絢號沖虛居士。能文有詞。

鐵笛亭

一聲蒼壁裂。再奏蛟龍悲。事往迹猶在。山空人不歸。詩家鼎鑪

梅花

玉簫吹徹北樓寒。野月崢嶸動萬山。一夜霜清不成夢。起來春意滿人閒。

秋日

曉日初浮萬里暉。西風搖蕩送秋歸。冥鴻直上三千丈。社燕春鶯不敢飛。以上詩人玉屑

送仲晦

靡靡歲時晏。亂山紅葉稀。端居已無惊。況與親故違。駕言臨廣路。惜此須臾期。祖燕未云洽。雞鳴促再馳。晨裝儼然隊。天澹風淒淒。迺邇征人行。悵惘離言悲。令德本高世。誠思開聖微。虎豹少采異。幾年丹詔垂。眷茲皇華寄。那得淹遐躋。君王久延佇。去矣翔天墀。顧我抱幽獨。已爲清世遺。冥鴻聿高舉。蝸鷲何由追。縈縈西郊道。晻晻朝陽暉。出處自殊迹。操祛胡不怡。明當逐雲月。依舊東岡陂。翰墨大全

楊 杞

杞字元卿廬陵人。

絕句

三開茅屋獨家村。風雨蕭蕭可斷魂。舊日相如猶有壁。如今無壁更無門。

詩人玉屑楊誠齋云。先太中貧嘗作茅屋三間。而未有門扉。于元卿求之。元卿送扉。侑以此詩。

鄭裕

裕紹興間莆田人。

一經堂詩宋進士方萬留意經術。朱文公扁其堂曰一經。在興化郡治東廂。

莆之甲姓。實維大方。紫囊錦帳。閱閱膏粱。有子盈之。乃其最良。心志乎道。視之如忘。博究六藝。并包五常。東家尼父。北窗羲皇。日相討論。兼收並藏。五經在笥。一經名堂。謙以自牧。雖晦而光。實浮于名。雖抑而揚。伊昔孟氏。排墨與楊。斯文羽翼。吾道棟梁。豈特詩書。獨稱其長。諸儒之說。于孟何傷。吾子命名。既擇而詳。通而貫之。輝涵汪洋。剖破藩籬。無門無旁。默契韶濩。能宮能商。正蒙析滯。起廢鍼盲。以一知萬。名實孔彰。人知同好。絺句繪章。元酒太羹。子獨先嘗。經術之門。驥騁康莊。典謨之文。鳳鳴朝陽。學報天子。業纘星郎。以經名家。非子誰當。興化府志

吳曾

曾字虎臣。崇仁人。高宗朝。以獻書得官。累遷至吏部郎中。出知巖州。致仕卒。有得閑文集。能改齋。

漫錄

羅山

兒時聞羅山窟穴居神仙。念之每欲往。終爲俗累牽。茲晨復何夕。風日媚晴暄。偶與二三子。徑來踐前言。崎嶇涉岡澗。峭蒨凌雲烟。崖斷或如瀉。坡平俄若川。有泉自何來。但覺聲涓涓。縈紆若蛇走。往注山腹田。徘徊一濯足。入袖風翩翩。俄登最高嶺。中觀屋數椽。嶙峋老石像。摩挲不記年。桃花破叢菅。一笑爲嫣然。石屏與翠壁。擁從相後先。物色恣觀覽。萬界滿眼前。適問同遊人。茲爲第幾天。不然何秀拔。不與衆峯連。長安在何許。無乃落日邊。十年若搶攘。戰血腥戈鋌。誰知塵外客。一壑能自專。茲遊恐難再。遲留不能旋。如何林閒月。弄影明娟娟。催歸猶恨早。正恐陵谷遷。撫州府志

謝完壁

村景卽事

綠徧山原白滿川。子規聲裏雨如烟。鄉村四月閑人少。纔了蠶桑又插田。西溪謠語

徐珩

珩字公飾

醉歌

得誰釀法乃爾佳。連引數杯極口誇。須臾忘物亦忘我。是非榮辱不可加。兒童相隨拍手笑。阿翁醉也扶歸家。平生故人趙半刺。遣騎折送園中花。插花飲酒不待勸。夜如何其月欲斜。倒著接羅自起舞。笛聲趁

拍鼓三搥。陶陶兀兀。意有得。小姬在傍。雙鬢丫。驅令磨墨具紙筆。滿幅大草飛龍蛇。婦云汝醉當止矣。明日酒醒不媿耶。

和虞智父登金陵青谿閣

葉脫林梢處處秋。壯懷易感更登樓。日斜鐘阜烟凝碧。霜落秦淮水慢流。人似仲宣思故國。詩如杜老到夔州。十年前作金陵夢。重撫闌干說舊遊。以上前賢小集拾遺

陳元老

元老福安人。有城山集。

寒食

至後百五日。春光無火晨。金鈿沾酒妾。羅襪弄毬人。鶯語如留意。花枝不賣貧。東園舊桃李。紅白盡成塵。合璧事類前集

胡清

清崑山士人。

壓雲軒在崑山

誰建危亭壓翠微。畫簷直與暮雲齊。有時一片巖隈起。帶與老僧山下歸。

賦軒旁小柏

栽傍巖隈未足看。謂言斤斧莫無端。他時直入掄材手。不獨青青保歲寒。

中吳紀聞後有一文人作浙漕因到山中見詩大喜尋訪其人厚禮以待之既憐其貧遂給官田胡由此致富

薛循祖

循祖鄞人掌機宜文字有映音

題采藥圖

江上奇峯雨後多千層飛瀑灑青蘿扶筇亦覺溪橋滑尚有幽人采藥過甬上耆舊集

潘矩

矩字方仲會稽人安吉尉

獻沈啓事

昔年單騎赴筠州覓得歌姬共遠遊去日正宜供夜直歸來渾未識春秋禪人尚有香囊媿道士猶懷炭婦羞鐵石心腸延壽藥不風流處也風流

隴元英談載沈啓事持正以坐秦丞相論恢復貶筠州沈方售一妾年十七八攜與俱行處筠州凡七年既歸呼妾父母以女歸之猶處子也時人以比張忠定公詠安吉尉潘矩方仲獻詩云云

厲德斯

德斯字直方餘姚人

送曹泳貶新州

斷尾雄雞不畏犧，憑依掇禍復奚疑。八千里路新州瘴，歸骨中原是幾時。

默齋曹泳侍郎妻碩人厲氏，餘姚大族女。方泳盛時，鄉里奔走恐後。獨碩人之兄厲德斯不然。泳怒，帥越時，德斯爲里正。泳風邑官脅治百端，竟不屈。會之甫殂，乃遣介致書于泳，啓封，乃樹倒猢猻散賦一篇。及泳貶，德斯以詩送之。云云。

耿時舉

時舉字德基，居太學，不第而卒。日瑄按吳郡志作耿元鼎。

賦姑蘇西樓

西樓一曲舊笙歌，千古當樓面翠峩。花發花殘香徑雨，月生月落洞庭波。地雄鼓角秋聲壯，天迴闌干夕照多。四百年來無妙手，要看風物似元和。

中吳紀聞：紹興中，郡守王曉重建郡治西樓，時賦詩者甚衆，獨耿爲擅場。

何元泰

元泰，紹興間人。

祕閣修撰陳少陽先生挽辭

在昔虞庠日，嘗陪陳少陽。詞傾三峽水，忠烈九秋霜。藥石塵丹屐，琅玕寶阜囊。後來門下士，多有紫薇郎。
靈忠錄附

馬 備

備、紹興閒人。

過子美草堂

樓遲九月錦水行。獨過草堂西出城。村樹苒苒秋照白。浪花漪漪江水明。溪邊三重結茅屋。松蘿翳疎晚雨清。往來沾酒且有客。胡爲奔走不自停。四海紛然霾曠多。我憂豈但白馬盟。藜藿未足飽我腹。況又一頃供耕耘。只今騎驢望八極。終日飄飄浪如許。可堪顏色太癯生。憂愁盡入篇章苦。信眉一笑古復作。卻似韓宣適東魯。此生蕩漾胡能留。兩脚風塵奚所休。此道滄浪付一漚。喚之千古與爾謀。吾亦往矣作春秋。成都文類

曾 伋

伋、字彥思、南豐人。紹興末。以大理寺丞出知袁州。慶元閒。居海昌。

題張許雙廟

國憑節義壯洪基。激厲頽風屬聖時。曾屈帝尊親降輦。高宗嘗幸其廟。可因祈福。幸公祠。杭州府志

葉祖義

祖義、字子由、婺州人。登科爲杭州教授。

句

醉來黑漆屏風上。草寫盧仝月蝕詩。

夷堅志。子由少游太學。天資滑稽。嘗曰。世閒有不分曉事。吾一以聯詠之。

木待問

待問。字蘊之。永嘉人。洪容齋之壻。隆興元年進士第一。仕至煥章閣待制。禮部尙書。

千里思

君行千里輕所歷。妾馳千里心匪石。春房酌酒意恁恁。愁不在離愁在憶。鴛鴦瓦上昏無色。鸚鵡杯中塵更積。燈前獨坐製君衣。淚溼剪刀裁不得。

郊寺

紅委牆陰花寂寂。翠滋亭角草纖纖。風翻書葉常交案。雨壓爐烟不過簾。以上東甌詩集

呂祖謙

祖謙。字伯恭。尙書右丞好問之孫。倉部郎大器之子。上世文靖公夷簡。居壽州。至右丞從駕南渡。始居金華。祖謙登隆興元年進士。復中博學宏詞科。累除直祕閣。著作郎。國史院編修卒。理宗朝。賜諡曰成。爵開封伯。從祀孔子廟庭。有東萊太史集。

西興道中

鳧鷖迎船自有情。隨波故起綠鱗鱗。野花照水開無主。誰信春歸一兩旬。

賀車駕幸祕書省

麟臺高柳識瑠璣。共記中興幸省初。黃道再傳天子蹕。青編重入史臣書。需雲下際君恩盛。晨露高張樂節舒。若寫鴻猷參大雅。定非周鼓頌敷漁。

春日

短短菰蒲綠未齊。汀洲水暖雁行低。柳陰小艇無人管。自送流花下別溪。

野步

石梁俯清流。苔髮明可數。茅檐春晝長。寂寂亭陰午。鳥啼花徑深。風絮浩無主。幽人不可覲。棊聲時出戶。

王龜齡詹事挽章

諸老收聲盡。佳城又到公。蒼天那可問。吾道竟成窮。旌卷莆田雨。簫橫浦風。今年襟上淚。三哭萬夫雄。
芮祭酒劉太史皆於今歲下世。

與同館游張氏園分韻得日字

出日厭羈塵。入門倦佔畢。駕言城北園。滯思頓消釋。方池環修篁。廣陌衛行栗。先雪梅已苞。後霜草猶茁。上躋極高明。旁穿復深密。主人真喜事。秀句屢盈帙。招呼文字飲。及此三餘日。山林與鐘鼎。零茂本非匹。斯遊豈偶然。書板記甲乙。

寄章冠之

章侯平生一詩囊。酬風醉月徧四方。浩歌姑孰酒淋浪。醉呼太白同舉觴。遂登浮玉臨淼茫。江濤挾筆益怒張。沙頭倚檣樂未央。興闌忽上秋浦航。門前槐花日夜黃。閉門琢詩聲繞梁。白袍紛紛渠自忙。飄然避

迥非所望。自言久厭世鎖韉。合眼已夢廬山蒼。君材甚碩氣方剛。身雖欲隱文則彰。江湖故人半朝行。左推右挽摩天翔。而我戢翼甘摧藏。不能與俗相迎將。徑當行前掃山房。俟君功成還故鄉。卻駕柴車迎路傍。以上東萊呂太史集

樓 鑰

鑰字大防。鄞人。昇孫。隆興元年進士。累官中書舍人。給事中。寧宗朝。歷翰林學士。同知樞密院事。進參知政事。卒。贈少師。謚宣獻。有攻媿集。

送王仲言倅海陵

遂初陳迹遽淒涼。擊節青箱極薦揚。談笑于儂情易厚。典刑使我意差強。重屏唐畫論中主。古殿遺文話阿章。舊事從今向誰問。尺書時許到淮鄉。

揮塵三錄。明清晚識遂初尤延之先生。一見傾蓋。若平生。權公任文昌。一日忽問云。天臨殿在干何時。邪。明清云。自昔以來。蓋未有之。紹聖初。米元章爲令畿邑之雍丘。遊治下古寺。寺僧指方丈云。頃章幸亳社。千乘萬騎。經從。嘗惕宿于中。元章卽命彩飾建鷗殿。其羽衛。自書榜之曰天臨殿。時呂升卿爲提點開封府縣鎮公事。以謂下邑不自朝廷。擅創殿立名。將按治之。蔡元長作內相。營揀獲免。聞有自製殿贊。恨未見之。尤卽從袖間出文書。乃元章所書贊也。云才方得之。公可謂博物洽聞矣。翊日入省。形言稱道于稠人廣衆中焉。樓大防作夕郎。出示其近得周文槩所畫重屏圖。祐陵親題白樂天詩于上。有衣帽中央而坐者。指以相問云。此何人邪。明清云。頃歲大父牧九江。于廬山圓通寺樵江南李中主像。藏于家。今此繪容卽其人。文槩丹

奇之妙。在當日列神品。蓋畫一時之景也。亟走介往會稽。取舊收李像以呈。其面貌冠服。無毫髮之少異。因爲跋其後。樓深以賞激。繼而明清。巧外得請。以詩送行。後一篇云云。

跋山谷書范滂傳帖

宜人初謂宜于人。菜肚老人竟不振。承天院記顧何罪。一斥致死南海濱。賢哉別駕眷遷客。不恤罪罟深相親。哀哀不容處城圍。夜遣二子從夫君。一日攜紙句奇畫。引筆行墨生烟雲。南方無書可尋問。默寫此傳終全文。補亡三篋比安世。偶熟此卷非張巡。巖巖汝南范孟博。清裁千載無比倫。坡翁侍母曾啓問。百謫九死氣自伸。別駕去官公亦已。身雖旣衰筆有神。我聞此書久欲見。摹本尙爾況其真。輟君清俸登堅珉。可立懦夫羞佞臣。

程史。余著著侔宜州日。因山谷謫居是邦。慨然爲之經理舍館。遂遣二子滋滄從之游。時黨禁甚嚴。士大夫例削札掃迹。惟著著敬遇不怠。率以夜遣二子奉几杖執諸生禮。一日攜紙求書。山谷問以所欲。拱而對曰。先生今日舉動無媿。東都黨綱諸賢。滿篇范孟博一傳。許之。遂默誦大書盡卷。二子相顧愕服。山谷顧曰。漢書固非能盡記也。如此等傳。豈可不熟。聞者敬嘆。若著願秩持歸上饒。家居寶藏之。再世散逸。歸東武周氏。又歸忠定家。其六世孫伯山。僅傳摹本。其子子壽鑄爲四明制屬。搆之笈。

中之
官

白醉閣

陶內翰清異錄。首載開元時高太素隱商山。起六逍遙館。各製一銘。其三曰。冬月初出。銘曰。折膠墮指。夢想炙背。金籬騰空。映簷白醉。余愛其言。取以名閣。陳進道惠示大篇次韻。

處世難獨醒。時作暝檐醉。年少足裘馬。安知老夫味。天梳與日帽。且復供酒事。謫居幸三適。得此更慙媿。向來六道遙。特書見清異。君家老希夷。相求諒同氣。曲身成直身。朝寒俄失記。醉中知其天。不飲乃同意。書生暫奇溫。難語純綿麗。

西山資國寺

野溪清淺度危橋。徑策枯筇上紫霄。曉霧暗蒸山寺雨。松風深隱海門潮。浮杯水漲人何在。洗鉢池清意已消。又上樂亭臺上看。雲山萬疊更逍遙。

題雪竇錦鏡橋亭

兩溪赴壑若奔蚪。此地端能截衆流。三板放開千丈雪。一區照破四山秋。幾年空自存公案。今日重新指路頭。珍重老師成勝事。清名當與此山留。

題蘇文忠武昌西山贈鄧聖求詩蹟次韻

黨論一興誰可回。賢路荆棘爭先栽。竄留多能擅筆墨。囚拘或可爲鹽梅。雪堂先生萬人傑。論議磊落心崔嵬。向來羅織脫一死。至今詩話存烏臺。凭高望遠極宏放。眼界四海空無埃。黃岡蹋徧興未盡。絕江浪破琉璃堆。鄧郎神交信如在。石爲窠尊勝金壘。鄧侯先曾訪遺跡。銘文深刻山之隈。山空地僻分埋沒。二公前後搜莓苔。元祐一洗人間怨。天地清寧公道開。玉堂同念舊游勝。筆端萬物挫欲摧。時哉難得復易。

失弟兄遠過崖與雷。北歸天涯望陽羨。買田不及歸去來。我爲長歌弔此老。慟哭未抵長歌哀。

題楊妃上馬圖

金鞍欲上故徐徐。想見華清被寵初。後日延秋門下路。不應有暇作躊躇。以上攻媿集

林光朝

光朝字謙之。興化軍莆田人。隆興元年進士。累官國子祭酒。兼太子左諭德。除中書舍人。兼侍講。以集英殿修撰。知婺州。卒諡文節。有艾軒集。

奉題游洋張明府流香亭。時以薦章數下。涉秋月馬首且欲西矣。因以寄意云。

封題青李數緋桃。處分園林意自豪。旋出篇章陪樂府。更憑花木續離騷。醪醑架下攜春榼。蔞蔔林中滴夜槽。卻是秋風生馬耳。未應老大笑牛刀。

哭徐刪定德襄

修文巷裏暮春前。欲上旗亭問客船。忽有短牋無寄處。漁梁卻在淚痕邊。以上艾軒集

袁樞

樞字機仲。建安人。隆興元年進士。累官權工部侍郎。國子祭酒。寧宗朝。擢右文殿修撰。知江陵府。

奉祠歸

武夷九詠存五

仁智堂

此身本無累，動靜隨所寓。結廬在巖谷，自適山水趣。朝來挹雲氣，日夕沐風露。坐觀天地心，詎忘仁智慮。
寒棲館

巖前風入松，谷口泉漱石。寫之五弦琴，聲在函丈席。竹閒有餘地，營館招羽客。靜夜絙高弦，待月寒林隙。
晚對亭

落日鬱蒼烟，空山轉寒碧。石屏倚天立，端峭一千尺。無言獨與對，足以終日夕。何用向時流，抵掌恣談劇。
釣磯

投轄出東溟，持竿歸九曲。溪翁來問訊，笑失雙鬢綠。潭邊舊釣石，瑩滑磨青玉。竟日謾垂綸，忘機看鷗浴。
茶竈

摘茗蛻仙巖，汲水潛蚪穴。旋然石上竈，輕汎甌中雪。清風已生腋，芳味猶在舌。何時擢孤舟，來此分餘啜。
武夷山志

鄭伯英

伯英，字景元，伯熊弟。隆興元年進士，擢秀州判官，有歸愚翁集。

和清卿雪溪泛舟晚登華蓋亭

滿江風雨釀清愁，坐嘯煙波一葉舟。目送飛花千里去，身隨空碧一鷗浮。兜羅世界成遊戲，欸乃聲中自
唱酬。設問剡溪回棹客，可能乘興上南樓。
東甌詩集

王阮

阮字南卿，德安人。隆興元年進士，仕至撫州守，歸隱廬山。有義豐集。

劉後村跋義豐詩

高處遜陵陽茶山

廬山萬杉寺

昭陵龍去奎文在，萬歲靈杉守百神。四十二年真雨露，山川草木至今春。

重過萬杉寺題碑陰

碧紗籠底墨才乾，白玉樓中骨已寒。淚盡當時聯騎客，黃花時節獨來看。

樞史王阮嘗從張紫微學詩。紫微罷荊州，偕浮廬山，有萬杉寺。本仁皇所建。奎章在焉。紫微大書二詩，別去兩句。而聞湖陰之訃。阮是時亦自有二十八字。紫微大擊節以爲不及。既而復過是寺，又題碑陰云云。亦紆徐有味。

題四羊圖

三百維羣世不見，乃以四羊爲一圖。人言此圖出韋偃，不知韋偃有意無。巖巖參天一古木，下有輕萋滿郊綠。雪髯隱約黑昏中，沙肋微茫筆端足。昔聞韋侯畫馬工，杜陵長歌歌古松。孰知畫羊更如此，世閒絕藝誰能窮。斬春太守好事者，珍藏有此希世畫。嗟予得此雙眼明，此一轉語久難下。三羊遊戲芳草茵，一羊輒登枯木根。安得添我作牧人，爲公鞭此一敗羣。以上義豐文集

袁說友

說友字起巖。建安人。隆興元年進士。除祕書丞。歷寶文閣學士。嘉泰中。同知樞密院參知政事。爲四川安撫時。輯漢以下迄宋淳熙蜀中詩文釐爲五十卷。目曰成都文類。

巫山十二峯二十五韻

平生磊塊山林姿。一丘一壑貪成癡。寸峯拳石瞥眼過。張皇攫覓惟憂遲。東南佳山多秀麗。就中所欠雄與奇。飽聞巫山冠巴峽。奇峯十二相參差。昔年圖畫嘗一見。欲見此山無路之。扁舟西泝上三峽。千巖萬壑爭追隨。終朝應接已不暇。心目洞駭俱忘疲。驀然鐘鼓高唐上。峯巒二六排旌旗。一峯霞彩迴在望。一峯展翠開屏帷。望霞峯翠屏峯無心出岫雲吐色。偃蓋平巒松並枝。朝雲峯松巒峯仙蹤鶴駕羽衣近。壇石瑤臺閭闔低。集仙峯聚鶴峯淨壇峯上昇峯白雲一起鳳皇下。清泉四合蛟龍嬉。起雲峯聖泉峯栖鳳峯登龍峯羣峯角立

變態異。一大巧乾坤爲。外堪擊拊設聲律。中含造化分四時。天下名山亦多矣。未有列岫奇如茲。九華一景固天巧。惜與江流相背馳。南北兩峯喧衆口。妝抹卻恨同西施。何如此峯何限好。行行列列橫江湄。煙雲漠漠出寸碧。風雨時時橫黛眉。舟人漁子漫回首。騷士墨客勞支頤。我來穿水入天去。貂裘章甫生塵縑。昂頭見此大奇特。躋攀不上空嗟嘻。吾將欲訪三鳥登九嶷。上蓬萊道山之壁。絕秦華終南之帽。飛鳧去鳥嘯滄海。卻來巫峽温前詩。全蜀藝文志

題米敷文瀟湘圖卷

水際天低岸遠。山腰霧卷雲舒。擬喚松江小艇。歸來好趁尊鱸。郁氏書畫題跋記

李嘉謀

次袁尙書巫山十二峯二十五韻

道人愛山出天姿。自謂計黠人嫌癡。獨游名山看不足。每得勝處行爲遲。誰人能知物外賞。世上自有壺中奇。一行作吏困汨沒。便與好景相參差。脫兔投林今適願。窮猿得木吾何之。芒鞋竹杖恣來往。烟蓑雨笠長相隨。青山愈好足力盡。此意未止驚駘疲。路逢行人說大尹。正見諭蜀揚舡旗。好賢招邀每虛席。問俗疾苦時褰帷。才華落落清廟器。詩筆粲粲珊瑚枝。曾吞楚澤八九盡。氣壓巫峽羣山低。大峯連娟爭媚嫵。蒼壁徙倚共游嬉。巴東巴峽古所重。作雲作雨今胡爲。有情飛鳶送迎客。無數棹歌來往時。昔日圖畫曾見者。何意忽此今逢茲。邇來豐碑在人口。已與流水爭東馳。政用中和得大體。智出毫末非全施。不獨英聲流上國。已有詩卷傳江湄。狼煙長閑士鼓腹。耕隴不見愁生眉。都門髣髴記分袂。蜀道脩阻常支頤。持謁見公敢論舊。撫髀顧我清無緇。樽俎頻開閑共語。歌謳聊與民同嘻。忽然晨日在東壁。但見山月來峨眉。行吟何獨壯三峽。在處山靈未乞詩。全蜀藝文志

毋丘恪

次袁尙書巫山十二峯二十五韻

縑素巧貌溪山姿。寶藏昔笑虎頭癡。何人夜半祛篋去。信爲羽化無疑遲。魏明不惜萬夫力。鑿山累土誇神奇。景陽突起芳林苑。穀城文石光參差。葉公好龍廣射虎。大方安能不笑之。至人于物特寓目。遠象過眼心弗隨。我公看山正如此。肯趨無窮脚力疲。胷中五嶽鎮地軸。眼底三辰昭旂旗。擢由漢庭寵分鉞。來撫蜀郡初褰帷。巫山一覽窺妙處。寫入長歌賡竹枝。坐令十二峯增重。已覺氣壓嵩華低。太室少室敢輩

行小孤大孤何兒嬉。岱宗日觀峻徒爾。崑崙天柱高安爲。出雲作雨均有是。泥金鏤玉彼一時。所謂造化一尤物。不在九華真在茲。中山前言恐遂廢。公之妙論已四馳。半語尤在大公正。蟠智經濟看設施。要令利澤均四海。無論山崖與水湄。祇今蒼生方屬望。休戚在公顰伸眉。願公更爲天下重。所養自養觀諸頤。量陂誰復能澄撓。德表居然無磷緇。巖石巍巍具瞻在。孰不歎仰聲噫嘻。又何必東望瀛南望嶷。北有天後之劍嶺。西有雲表之峩峩。與君高名並不朽。配以今日巫山詩。全蜀藝文志

閩丘泳

次袁尙書巫山十二峯二十五韻

舟行觀山無定姿。篷底兀坐眞兒癡。層崖複嶺正雜遝。平岡橫阜俄逶迤。晴嵐參天固競秀。深崖挺石尤多奇。遙岑浮眉綠點點。飛瀑懸劍鋒差差。飽聞巫山妙天下。今誦公詩如見之。蓬仙來應人間世。妙齡便有聲名隨。日談經術輔主聖。久領國計嗤鴛疲。共推經邦濟川楫。暫建分陝元戎旗。百城聽令仰賜履。三邊制勝如籌帷。長江高唐神女峽。萬里崑崙分一枝。峯巒森立入霄漢。塔廟選勝居高低。響山猿啼聲若嘯。迎擢鴉舞來如嬉。金母介畀神靈職。孰云朝暮陽臺爲。琅函蕊笈發天祕。贊禹治水唐虞時。英辭一洗千載陋。寫之琬琰宜自茲。人思傳本快先睹。蔡邕石經車馬馳。北暢威名被沙漠。西奠夷落連黔施。帝遣雲輶鎮南極。祠宮姑寓江之湄。湘君時過鼓瑤瑟。宓妃豈復揚峨眉。金闕已侔坐少廣。丹經孰授踰期頤。野人塵客麇知學。素守亦復涅不緇。竭來乘輶職飛輓。兩見祈穀歌噫嘻。疲民崎嶇上轉粟。舊業荒落南窺疑。勞生屢已度劍棧。清游頗念登峨帽。從今嵩高雅頌手。那數韓子南山詩。全蜀藝文志

黃人傑

人傑字叔萬盱江人

次袁尙書巫山十二峯二十五韻

文昌老仙絕俗姿。愛山成癖非兒癡。胷中況自有丘壑。攬結瑰異常恐遲。坤維謀略出分闢。江山致助爭出奇。尋幽選勝上巫峽。斷崖怪石懸參差。十二峯前弭征棹。枝藤直上窮所之。雲烟變態千萬狀。過眼神動驚天隨。人疑躋攀脚力盡。公自樂此良不疲。瑤華真妃似夙駕。風馬晝下揚旛旗。層巒好處起蒼壁。丹霞望門開赤帷。登壇定可拾瑤翠。卻老未應無玉枝。仰天一笑睨寥廓。俯視培塿丘陵低。頗疑遊龍出飛躍。恍若栖鳳猶娛嬉。喬松跨鶴遠近集。雲雨濟人朝暮爲。壇維野翠有餘潤。泉拖脩帛無窮時。一經盼睽便改觀。陽臺價重當由茲。惜哉牙纛不久駐。鷓首未轉橋烏馳。輕縑素練欲摹寫。畫師難著五色施。筆端機杼始潛運。悠然奇興滄洲湄。章成密簡繡衣使。繡衣翰墨今白眉。珠酬玉唱兩相尙。三歎盡解騷人頤。好刊蒼珉示千古。磨而不磷涅不緇。紛紛我輩小巫耳。健讀數過徒噫嘻。待從兩公奠西極。安南崑收關河百二之險。劖岷峨萬仞之帽。大書有宋中興頌。東還更和巫山詩。全蜀藝文志

項寅賓

寅賓字彥周崑山人與范石湖倡和

和范至能元日

獻歲身留外。思家恨滿中。桃符禳厲鬼。椒酒勸山童。出謁憑羸馬。題詩附去鴻。青春應時節。斗柄夜搖東。

和鄭逢辰元宵韻

憶昔先皇賞路臺。鼇山半影落蓬萊。羣方欲識龍顏喜。雙闔時瞻雉尾開。十里天香漾碧霧。六宮韶樂隱新雷。神仙舊事渾如夢。只有春風每歲催。以上崑山雜詠

鐘孝國

孝國字觀光。崑山人。

千里翁蓄陶酒尊。係以筠籠。形狀勃窣。某酒後以短項翁目之。不謂誤中。遂成佳號。彥平功成二兄。皆有寢詠。可使韓子蒼縮肩短項之句北面矣。某不揆鄙拙。勉強續貂。幸諸丈斤斧之。

少陵先生時不偶。老瓦盆中醉林莽。江湖散人名益窮。魚殼傾尊不論斗。孤風異行同襟期。食鮭未必富。三九凌煙功名舉。世事不直兩公一杯酒。會稽夫子有古心。嗜好眇追千載友。陶尊中產同蒼筠。短項不肯鐘。曩羣章。綬黃篋。羞緇塵。肺腸桑落心。崑崙始知其中殊。陋貌一點不受泥沙渾。時從往古窮元微。坐隅兀側長相隨。送子醉鄉謝膠擾。回頭轉覺人閒小。崑山雜詠

樂備

備字功成。一字順之。其先自淮海徙崑山。與范成大馬先覺結詩社。官至軍器監簿。

比同彥平謁希顏千里。千里留醉。短項翁彥平有作。鄙拙者亦不能已。勉強亂道。幸笑覽。

君不見便腹邊先生。駒駒晝眠貯五經。又不見長頭賈都尉。喋喋問事聒人耳。兩人挾策煩天機。俱亡其牛。迺其理。不如此翁不知書。肩高頤隱形。侏儒胷中無物。祇嗜酒。酒至輒盡。寧留餘。有時花帽賓客前。清

辨傾倒如流泉。不辭伴客竟佳夕。第恐吻燥舌本乾。主人從今莫言窮。有此自足當萬鍾。但令時與聖賢對。勿學鄙士中空空。我昔已自聞其風。向來一笑欣相逢。他時訪戴不必見。竟須麥戶呼此翁。崑山雜詠

姚申之

申之字崧卿。崑山人。隆興元年進士。

寓居全吳江上

一雨通宵翦韭畦。波稜生甲晚菘齊。朝來赤脚語言好。醒酒杯羹有宿齋。

幅巾蕭散一枝筇。身在水雲千頃中。抹野亂山隨意碧。裊林霜葉可憐紅。崑山雜詠

宋詩紀事卷五十三

錢唐 厲鶚 輯

宛平 查爲仁 勘定

陳 讜

讜字仲甫莆田人隆興元年進士累官兵部侍郎乞補外以集英殿修撰知寧國府再乞致仕封清源郡侯

過溪南韓氏宅

曾覽溪南勝重來四十年樹如人老矣山共水依然香玉紛堆案晴虹對跨川吾廬今咫尺乘興且盤旋

莆陽文獻

句

竹密不知雲欲雨山高盡見水朝宗

四朝聞見錄莆陽陳讜文人也刻金字于靈壁石以壽韓侂胄至稱曰我王韓敗遂爲言者所彈陳留題吳山三茅觀梅亭句云云繼是猶未有和者

方有開

有開字躬明淳安人隆興元年進士嘗官淮西運判有溪堂集

方仙翁祠

眞仙祠觀鎖晴嵐。下瞰平疇十里寬。譜牒尙遺唐篆額。風儀仍是漢衣冠。紫芝白兔靈如昨。石碣丹湖事不刊。千載仍孫牛馬走。敬瞻遺像仰高寒。青溪詩集

張良臣

良臣字武子。汴人。避寇來鄞。因家焉。隆興元年進士。官止監左藏庫。有雪窗小集。

樓大防書集後云。武子閉門讀書。室無一物。性嗜詩。不輕作。或終歲無一語。故所作必絕人。

春詞

後主攀香復倚春。潘嬀梳洗最輕盈。南朝破後無詞客。燕子桃花古石城。

曉行

千山萬山星斗落。一聲兩聲鐘磬清。路入小橋和夢過。豆花深處草蟲鳴。

賦

柳暗旗亭不忍看。臨江愁殺晉衣冠。傷心明月揚州路。十里珠簾蕙草寒。

示長蘆仁禪師

叢叢竹雀鬧人家。農事春來漸有涯。品字柴頭煨正煖。不知風雪到梅花。

梅市道中

連雨疎篷不耐關。脩眉如失更晴慳。越王故國無人問。艇子穿花自往還。

西湖晚歸

帖帖平湖印晚天。踏歌遊女臂相牽。鳳城半掩人爭路。猶有胡琴落後船。

留題吳興投老庵

白鷺悠悠去不還。渚雲汀草一生閑。暮年不入西州路。空倚梅花說住山。

九日書呂季慈室

上池入寺見承平。影落南州迹易陳。手把黃花看新雁。風烟愁殺舊京人。

感舊

三十六陂春水綠。四十九年人事非。揚子江頭永嘉後。吳儂蕩槳北人稀。

過西溪

罨畫層波蕙草荒。冷雲客雁兩回皇。梅花到得吹成雪。盡是清愁不是香。

遣家書

家住鄱陽小洞天。經年烹鯉尙茫然。幾回鵲喜無消息。吹殺燈花獨自眠。

小破

小破燕支鈿早梅。雪雲平淡越江遲。青山歲晚行人少。鴨鴨羣飛淺草時。
以上雪窗小集。

上雪竇山奉慈院

迢迢嶺外雪雲明。猶憶塵中見偉人。沙上豈無新到雁。附來莫厭尺書頻。延祐四明志。

長松丹井

九轉丹砂煉得成。飄飄仙袂入青冥。一泓寒水留眞汞。千歲長松產茯苓。雲門志略。

句

客向愁中都老盡。祇留平楚伴銷凝。樓攻媿集跋。

張 縝

縝字季長。蜀之唐安人。隆興元年進士。官大理少卿。

奉陪安撫大卿登八陣臺覽觀忠武侯諸葛公遺像偶成長句。

白帝城西魚復浦。十月江平見津滸。當年累石紛成行。此地臥龍經講武。轅門外建嚴中權。自注。陣有壁壘

一門東出。列陣相承。存後伍。自注。八陣相承。又列數陣于後。何人蛇勢識常山。未數魚麗矜鄭拒。懸知精神貫金

石。尙想號令嚴鉦鼓。老兵料敵應疑生。川后澄波其敢侮。向令赤伏有餘符。下睨皇州眞指取。云何遺跡

司神明。獨靳豐功被寰宇。高城置酒共臨眺。往事興懷增歎撫。巍然王佐三代前。信矣名言照千古。全蜀

藝文志。

題沔州諸葛武侯廟

亦伏終休運。前營落大星。皇王空禮樂。江漢闕英靈。斷壘牛羊入。空山草木青。經時須此牧。清淚灑泉扃。

陝西通志。

黃度

度字文叔，新昌人。隆興元年進士。寧宗朝，累官禮部尚書，以煥章閣學士知隆興府。青溪閣。

江家舊宅枕溪頭，誰向溪灣著小樓。無柰當年亡國恨，潮生潮落幾時休。景定建康志。

楊方

方字子直，長汀人。自號淡軒老叟。隆興元年進士，嘗受學于朱子之門。仕至直寶謨閣、廣西提刑。

趙南唐跋云：公暮年詩。

精清簡遠，與俗異眇。

淳熙辛丑，自武寧丞攝靖安作。

毛竹山頭雲雨昏，靖安橋下小谿渾。高陂約水歸田急，不管湍聲入縣門。堂上官人似野人，村毗相見可相親。開門坐對臨溪樹，故是水邊林下身。對縣誰家數畝園，竹亭茅宇雜花繁。同官不可無兼局，通管溪南水竹村。

題武寧丞廳

暮年叢薄寄鷓鴣，搔首巡簷歲月銷。留與後人還要否，一軒松竹冷蕭蕭。

館中簡張約齋

書生賦分合窮愁，官與休辰不肯休。清曉犯寒開省戶，誰家見雪似瀛洲。

爛銀宮闕雲中見。素柰園林月下遊。說與南湖張祕閣。速來同直道山頭。以上後村詩話。

傅伯壽

伯壽字景仁晉江人。隆興元年進士。紹熙中官浙西提刑。

一段奇軒在西湖淨相院

門外紅塵走利名。庵中白髮任浮生。羨師法窟能深入。厭我詩壇已屢盟。渺渺水光簾萬疊。離離梅影雪三更。何人薦取眞消息。試鼓瑤琴一再行。咸淳臨安志。

一眺石

一眺人間萬事非。海鷗山鳥便忘機。林端髣髴見帆影。知有扁舟天際歸。南安縣志。

張柳

一段奇軒

雲山爛漫本難名。收拾閑情付此生。出處自知無上策。往來聊欲設同盟。門多賢轍人便靜。琴鎖師堂歲幾更。六月岸巾來借榻。頻遊應不禁船行。咸淳臨安志。

傅伯成

伯成字景初。其先濟原人。祖忠肅公察。父自得。避地居泉州。爲晉江人。隆興元年。與兄伯壽同舉進士。理宗朝。官至寶文閣學士。提舉佑神觀。卒。贈開府儀同三司。諡忠簡。有竹隱集。

素馨花。自注。素馨。南漢宮女名。

昔日雲鬢鎖翠屏。祇今煙冢伴荒城。香魂斷絕無人問。空有幽花獨擅名。全芳備祖。

許及之

及之字深甫。温州永嘉人。隆興元年進士。寧宗朝。歷官參知政事。知樞密院事。有北征紀行詩集。
廢冢

石人猶自立蒿萊。拂讀殘碑字字哀。鄰冢已澆寒食酒。野風分送紙錢來。東甌詩集。

孫逢吉

逢吉字從之。龍泉人。隆興元年進士。寧宗朝。歷祕書監。兼吏部侍郎。出知太平州。丐祠。卒諡獻簡。
茅亭在泉州陳洪進宴游之地。今廢。

陳氏當年爲勝概。吾徒今日作良游。時遷代謝皆如此。細雨燈花莫浪愁。方輿勝覽。

程迥

迥字可久。寧陵人。家于沙隨。隆興元年進士。仕爲德興丞。調上饒令。迥深于經學。學者稱沙隨先生。有南齋小集。

題玉真書院在德興縣玉真山麓。邑人吳紹古建。陸九淵有經德堂扁。

吳侯所築居。密近玉真麓。翳蔽祕幽奇。千載空喬木。一朝敞虛境。劃見神仙躅。拄杖步危磴。遠寄千里目。鶴憑子晉笙。鳧舉王喬足。信是隱君子。名入丹青錄。冥搜得佳句。隱然可騷僕。早開雲錦溪。鳴榔到巖谷。寄我輞川圖。居然媚幽獨。何當擢輕舸。飛鳥送遐矚。饒州府志。

自題昞怡齋

乞得膠膠擾擾身。霜筠露菊便相親。
勸君莫厭羹藜藿。違己由來更病人。
六月松風萬籟寒。笙竽頻到枕屏閒。
夜深夢繞匡廬阜。瀑布濺珠過藥闌。
葵花已過菊花開。萬里西風拂面來。
問字今朝幾人至。細看履齒破蒼苔。

困學紀聞。

吳 鎰

鎰字仲權。崇仁人。曾弟。登隆興元年乙科。累官司封郎中。極言罷歸。有雲巖集。

崇仙觀二首

浮丘仙袂風中挹。子晉吹笙月下聞。
翠蓋霓裳君過我。尻輿神馬我從君。
人生塵土不可耐。天上高寒定自嘉。
但約麻姑擘麟脯。莫尋句漏問丹砂。

撫州府志。

送客香山寺

十里香山寺。三年到幾回。
不嫌送客遠。端是愛山來。
老木依山住。閑雲爲我開。
歸鞍意未足。城鼓莫相催。

郴州文志。

陸 游

游字務觀。越州山陰人。佃之孫。宰之子。以蔭補登仕郎。隆興初。賜進士出身。范成大帥蜀。爲參議官。人譏其頽放。因自號放翁。累知嚴州。嘉泰初。詔同修國史兼祕書監。升寶章閣待制。致仕卒。有

渭南集。劍南集。

直齋陳氏云游幼爲曾吉父所賞識詩爲中興之冠他文亦佳而詩最富至萬餘篇古今未有

四朝聞見錄陸公早退居往來雲門若耶韓侂胄固欲其出落致仕除次對公勉爲之出韓喜附已至出所愛四夫人輩阮琴起舞索公爲詞有飛上錦綉紅鸞之語公臨終以詩示其家云王師剋復中原日家祭毋忘告乃翁公之心方暴白于易簣之矣時

臨安春雨初霽

世味年來薄似紗誰令騎馬客京華小樓一夜聽春雨深巷明朝賣杏花矮紙斜行閑作草晴窗細乳戲分茶素衣莫起風塵歎猶及清明可到家

後村詩話放翁少時調官臨安得句云小樓一夜聽春雨深巷明朝賣杏花傳入禁中思陵稱賞由是知名

陳阜卿先生爲兩浙轉運司考試官時秦丞相孫以右文殿修撰來就試直欲首送阜卿得予文卷擢置第一秦氏大怒予明年旣顯黜先生亦幾陷危機偶秦公薨遂已予晚歲料理故篋得先生手帖追感平昔作長句以識其事不知衰涕之集也

冀北當年浩莫分斯人一顧每空羣國家科第與風漢天下英雄惟使君後進何人知大老橫流無地寄斯文自憐衰鈍辜眞賞猶竊虛名海內聞

恩封渭南伯。唐詩人趙嘏爲渭南尉。當時謂之趙渭南。後來將以予爲陸渭南乎。戲作長句。

老向人閒久倦遊。君恩乞與渭川秋。虛名定作陳驚坐。好句真慙趙倚樓。棧豆十年瘡病馬。烟波萬里著浮鷗。就封他日輕裘去。應過三峯處處留。

示兒

死去元知萬事空。但悲不見九州同。王師北定中原日。家祭無忘告乃翁。以上劍南集。

絕句

碧玉當年未破瓜。學成歌舞入侯家。如今顛顛篷窗底。飛上青天妒落花。

懷成都舊游二首

金鞭朱彈憶春游。萬里橋邊罨畫樓。夢倩曉風吹不斷。書憑春雁寄無由。鏡中顏鬢今如此。席上賓朋好在否。篋有吳牋三百箇。擬將細字寫春愁。

裘馬清狂錦水濱。是繁華地作閑人。金壺投箭消長日。紅袖傳杯領好春。幽鳥語隨歌處拍。落花鋪作舞時茵。悠然自適君知否。身與浮名孰重輕。

齊東野語。陸放翁在蜀。日有所盼。嘗賦詩。

云云。出蜀後。每懷舊遊。多見之賦詠云云。

沈園二絕。慶元己未作。

夢斷香銷四十年。沈園柳老不飛綿。此身行作稽山土。猶弔遺蹤一悵然。
城上斜陽畫角哀。沈園無復舊池臺。傷心橋下春波綠。曾是驚鴻照影來。

禹蹟寺南有沈氏小園。四十年前嘗題小詞一闕。壁閒偶復一到。而園已三易主。讀之悵然。
紹熙壬子作。

楓葉初丹。槲葉黃。河陽愁鬢怯新霜。林亭感舊空回首。泉路憑誰說斷腸。壞壁醉題塵漠漠。斷雲幽夢事茫茫。年來妄念消除盡。回向蒲龕一炷香。

歲暮夜夢遊沈氏園兩絕。開禧乙丑作。

路近城南已怕行。沈家園裏更傷情。香穿客袖梅花在。綠蘸寺橋春水生。
城南小陌又逢春。只見梅花不見人。玉骨久成泉下土。墨痕猶鎖壁閒塵。

齊東野語。陸務觀初娶唐氏。于其母夫人爲姑姪。伉儷相得。而弗獲于其姑。既出而未忍絕之。則爲別館。時時往焉。姑知而掩之。雖先知挈去。然事不得隱。竟絕之。唐後改適同郡宗子士程。嘗以春日出遊。相遇于禹蹟寺南之沈氏園。唐以語趙。趙致酒。

餽翁悵然久之。爲賦釵頭鳳一詞。題園壁閒。實紹興乙亥歲也。翁居鑑湖之

三山。晚歲每入城。必登寺眺望。不能勝情。未久唐氏死。嘗作詩共五首云。

紀夢

白首歸修汗簡書。每因囊粟歎侏儒。不知月給千壺酒。得似蓮花博士無。

趙章泉梅課云嘉泰壬戌九月陸放翁夢一故人相語曰我爲蓮花博士鏡湖新置官也我去矣君能暫爲之乎月得酒千壺亦不惡也遂以詩紀之云云

致爽軒在永慶軍

黃塵赤日汗霑裾。竹裏煎茶喜有餘。堪笑放翁窮意巧。就君池館讀君書。方輿勝覽。

感姚將軍事題青城山上清宮壁

造物因豪傑。意將使有爲。功名未足言。或作出世資。姚公勇冠軍。百戰起西陲。天方覆中原。殆非一木支。脫身五十年。世人識公誰。但驚山澤閒。有此熊豹姿。我亦志方外。白頭未逢師。年來幸廢放。儻遂與世辭。從公遊五岳。稽首餐靈芝。金骨換綠髓。歛然雲外飛。

庶齋老學叢談姚將軍靖康初以戰敗亡命建炎中下詔求之不可得後五十年乃從呂洞賓劉高尚往來名山有見之者放翁感其事作詩

感趙宗印事

我夢游太華。雲開千仞青。壁山瀉黃河。萬古仰巨靈。往者禍亂初。氛祲干太寧。豈無臥雲龍。一起奔風霆。時事方錯繆。三秦盡羶腥。山河消王氣。原野失天刑。將軍散髮去。短劍斲茯苓。定知三峯上。爛醉今未醒。

庶齋老學叢談靖康建炎閒關中奇士趙宗印提義兵出戰有衆數千所向輒下敵不敢當會王師敗于富平宗印知事不濟大慟于王景略廟盡以金帛散其下披髮入華山不知所終放翁感其事作詩云云

韓幹馬

唐人畫馬如相馬。□□不在驪與黃。天機入神卽揮灑。氣脫毫素先騰驤。昔年曾畫穆王游八極。八龍之駿雲五色。後來又寫越影超光脫丹碧。後來又寫漢武窮渥洼。復見神駒來漢家。勢走滅沒開風沙。壯哉此馬健且雄。玉花徧身雲滿鬣。首如渴鳥眼如電。皎如疋練橫晴空。使之陷陣當破敵。萬馬不敢先秋風。如何解鞍脫其馭。縱爾俶儻如游龍。君不見四海罷征戰。九夷盡梯航。方將卻爾宛水之西。歸爾華山之陽。幸逢韓供奉寫爾神。杜拾遺歌爾良。贈爾支道林。愛爾神駿懸高堂。珊瑚網

句

積憤有時歌易水。孤忠無路哭昭陵。

娛書堂詩話。唐制有冤者。哭昭陵下。李洞策夜獻籙詩云。公道此時如不得。昭陵痛哭一生休。陸務觀亦有句云云。

虞儔

儔字壽老。寧國人。隆興初入太學。舉進士。以太常少卿使金。累官兵部侍郎。奉祠卒。有尊白堂集。過千秋嶺

輕陰漠漠雨斑斑。嶺上風來一解顏。已是去天纔尺五。卻令緩步有躋攀。飛泉百道縈羅帶。列岫千峯擁翠鬢。應是北堂春正滿。幾迴回首望家山。寧國府志

馬之純

之純、字師文、金華人、隆興進士、慶元閒、主管江東轉運司文字、著金陵百詠、世號野亭先生、孫光祖、有名。

元武湖

萬頃冥茫水拍隄、當時于此習舟師、長江天險雖堪恃、鬪艦人謀可勿施、莫使黑龍離舊窟、且教元武入新詞、如何又作蓬瀛景、時節來遊看水嬉。

東冶亭

舊時祇說東西冶、今日轉爲長短亭、無柰梅花臨水白、可堪柳色向人青、十分潑灑苦難把、三疊淒涼誰忍聽、不道離愁堆滿屋、往來車馬放教停。以上景定建康志。

郭明復

明復、成都人、印子、隆興癸未登科、仕爲宗丞。

題琵琶亭并序。

白樂天流落湓浦、作琵琶行、其放懷適意、視憂患死生禍福得喪爲何物、非深于道者能之乎、賈傅謫長沙、抑鬱致死、陸相竄南賓、屏絕人事、至從狗竇中、度食飲、兩公猶有累乎世、未能如樂天逍遙自得也、予過九江、維舟琵琶亭下、爲賦此章、時淳熙己亥中元日。

香山居士頭欲白、秋風吹作湓城客、眼看世事等虛空、雲夢胸中無一物、舉觴獨醉天爲家、詩成萬象遭梳爬、不管時人皆欲殺、夜深江上聽琵琶、賈胡老婦兒女語、淚溼青衫如著雨、此公豈作少狂夢、與世浮

沈聊爾汝。我來後公三百年。潯陽至今無管弦。自注。公詩有潯陽小處無音樂之句。長安不見遺音寂。依舊康廬翠埽天。

容齋三筆。賈誼自長沙召還。後爲梁王傅。乃卒。前所云少誤矣。

題三峽堂

三峽堂前五月風。吳橋蜀柁古來通。山如肺附重相掩。水似環連去不窮。躍馬孤城憐倔強。臥龍八陣想英雄。憑闌千載興亡事。何異邯鄲一枕中。

大人按部過雲安下巖留題命同賦。

道人昔日來開山。山鬼悔泣門不關。一時梵宇借崑麓。千載絕景歸人閒。松蘿鬱勃樹旌纛。水泉丁東鳴佩環。兩蘇寂寞涪翁死。杖屨誰與同躋攀。以上全蜀藝文志。

陳翊

翊字君正。

甲申仲冬侍親由行在所還毗陵舟泊村渚。

日暮成孤泊。棲遲得小安。雪融沙觜露。雲拂雁翎寒。過櫓冰痕薄。通村水汶寬。詩情如廢井。臆覺起波瀾。前賢小集拾遺。

黃然

然、豫章人。隆興中，官右朝請郎，知台州。

涪翁亭 在蜀嘉陵

清音妙絕東坡老，方響名高太史公。水遠鳥飛談笑外，江連洪雅畫圖中。方輿勝覽。

張維

維，字仲欽，延平人。隆興中，通判建康府事。乾道中，廣西經略安撫使。

留守舍人張公安國，聞維築亭爲題，其榜曰朝陽。旣去而亭成，復爲賦詩次韻。

日邊清切以文鳴，立對朝陽欲問程。筆落春生變寒谷，詩來將喜破愁城。簷前水到乘槎便，天際山橫與檻平。準擬公歸道過此，小留觴詠集簪纓。景定建康志。

題張公洞

年來行樂與民同，探穴追蹤太史公。幽洞初開名易著，蒼崖新刻句難工。風驅俗駕松扉外，雲鎖仙丹石室中。付與山僧司管鑰，勿教勝地草蒙茏。桂勝。

蔡勸

勸，字定夫，莆田人。襄之後。乾道二年進士，除祕書省正字，知江陰軍。

題盱眙

自古東南第一山，于今無異玉門關。亂雲衰草蒼茫外，赤縣神州指顧閒。擊楫何人酬壯志，凭闌終日慘愁顏。中原父老應遺恨，祇見氈車歲往還。錦繡萬花谷。

徐似道

似道字淵子，號竹隱，黃巖人。乾道二年進士，歷官權直學士院，遷祕書少監，終提點江西刑獄。有竹隱集。

貴耳集：淵子嘗爲少蓬朝聞彈疏，坐以小舟，載菖蒲數盆，翩然而去，道間爭望若神仙。

九日

衰容不似秋容好，坐上誰憐老孟嘉。牢裹烏紗莫吹卻，免教白髮見黃花。鶴林玉露

偶題

老去功名不挂懷，高眠之外祇清齋。偶因種竹便多事，風葉掃餘還滿階。詩家鼎鑪

買硯

俸餘擬辦買山錢，卻買端州古硯甄。依舊被渠驅使在，買山之事定何年。

鶴林玉露：劉改之賀徐直院啓云：以載鶴之船載書，入覲之清標如此。移買山之錢買硯，平生之雅好可知。用其詩語也。

廬山得蟹

不到廬山辜負目，不食螃蟹辜負腹。亦知二者古難并，到得九江吾事足。廬山偃蹇坐吾前，螃蟹郭索來酒邊。持螯把酒與山對，世無此樂三百年。時人愛畫陶靖節，菊籬東籬手親折。何如更畫我持螯，共對廬

山作三絕貴耳集

蕁羹

千里蕁絲未下鹽。北遊誰復話江南。可憐一筋秋風味。錯被旁人舌本參。

送春

圓蒲相將結僧夏。荷葉蒲茸綠相亞。浮花浪葉自飄零。小院迴廊正瀟灑。葉如青幄花成茵。細腰起舞來送春。紙光如銀墨如漆。落筆四座驚有神。輕衫短帽付餘子。花前醉倒輸閑人。以上全芳備祖

舟行

大官連檣十萬艘。小官僅得一葉如漁舸。其中何所有。白髮翁媪并兒曹。赤脚婢三後執爨。蒼頭奴子前操篙。元眞筆牀閒茶竈。吏部酒杯兼蟹螯。書緘一箱半魚蠹。詩束百軸成牛腰。平鋪稿牘薦貓犬。賸買棗栗供猿獠。新花鬱屈作菱木。清酒搖蕩成濁醪。篷低日覺巾角折。竈近時聞羹釜輶。高驥正難望鷓首。緩進豈敢爭龍標。全家窟拘歎踈跼。長物屏當隨週遭。桑樞駟馬各是累。人肝薇蕨俱成饜。不須彼此更相笑。未必鬱林之石賢。胡椒。後村詩話

虞仲房司馬遊園約予不赴。因次其韻。

祕書行處有歌鐘。身名名園錦繡叢。試問高吟梁苑雪。何如共快楚臺風。人鷗不去機方息。魚我相忘樂未窮。待得芙蓉濯雲錦。弄花翻水與君同。赤城詩集

自笑

黃昏茅店帶星入。清曉竹輿蒙露行。客路三千年五十。對人猶是說歸耕。東甌詩集

句

胸中着雲夢。皮裏有陽秋。自作先生傳。誰爲故吏碑。挽錢觀。鬲上村坊酒。眉尖野店茶。天寒不知翠袖薄。日煖但覺玉煙生。水仙花。索醉寧傾問字酒。忍飢不取作碑錢。駒入隙來元不礙。蠅穿紙出定何妨。紙閣。北風萬籟自宮徵。寒日一軒真袴襦。以上後村詩話

婁機

機字彥發。嘉興人。乾道二年進士。寧宗朝。累官禮部尙書。兼給事中。權同知樞密院事。兼太子賓客。進參知政事。提舉洞霄宮。

日哦軒

高軒多暇日。宴寢獨怡神。風俗無今古。雲山自主賓。灘平分燕尾。松老半龍鱗。徙倚清陰下。吟懷媿昔人。

杭州府志

羅願

願字端良。號存齋。汝楫子。以蔭補承務郎中。乾道二年進士。守鄂州。有小集。

題興善寺碧玉軒木屋。在新城縣

老照軒前翠已空。忽驚嘉樹碧玲瓏。幽芳自出禪枝外。圓相長標法窟中。過客莫辭三宿戀。道人已費十年功。要須共結團圞坐。賞盡清秋面面風。

送邕州吳使君

題輿纔赴日邊程，便擁油幢鎮列城。地望素高唐五管，人才今似漢三明。時清市駿非無意，歲晏逢花好寄聲。太學英名湖海氣，此行持論要平平。以上鄂州小集。

黃希

希字夢得，宜黃人。乾道二年進士，終永新令。有補注杜詩，未竣而卒。子鶴續成之。

題石碧注見鄒極詩。

誰賦阿房未霽虹，祇誇複道峭凌空。那知海石驅來處，都在巖花晏坐中。鯨背遠衝千嶂雨，鼇頭高占一天風。漫郎更有中興頌，倩把蒼崖仔細礪。撫州府志。

周孚

孚字信道，濟南人。寓家京口。乾道二年進士，終真州教官。辛稼軒刊其集，曰蠹齋鉛刀編。

贈蕭光祖

之子固絕俗，少年甘寂寥。田園一蠹睫，書卷百牛腰。雪徑晴猶凍，烟江晚不潮。箇中勤著語，老耳待聞韶。
宋公佐席上分韻得樓字

誰謂子青眼，不嫌予白頭。共穿康樂屐，來醉仲宣樓。風定江猶怒，雲高雨欲休。西山多爽氣，吾忍賦悲秋。
寄辛幼安

我屋與君室，濟河南北州。相逢楚天晚，卻看蜀江流。老境渾能迴，妖氛竟未收。何時一廛地，歸種故園秋。

次韻朱得裕見贈予病初起

蓋世功名黍一炊。驚心歲月穀雙馳。五漿先饋那須爾。二豎相陵少避之。種種鬢毛吾欲老。翩翩書札子能奇。黃花無語秋將暮。莫惜元談與解頤。以上蘇齋鉛刀編。

薛澄

澄、鄞人。乾道二年進士。

效朱公叔絕交詩

東山有梟不祥其名惡。木是息惡聲是鳴。食不棄腐飲不擇清。宜飛求伏以晦爲明。凶殘滿志嗜欲惟櫻。伸頸招鳳使鳳自驚。豈有鳳口而和梟聲。柰何伊人弗審物情。請從此別各自謀生。甬上書齋集。

許開

開字仲啓丹徒人。乾道二年進士官中奉大夫提舉武夷沖祐觀有志隱類稿。

水仙花

定州紅花瓷。塊石藝靈苗。芳苞苗水仙。厥名爲玉霄。適從閩越來。綠綬擁翠條。十花冒其顛。一一振鷺翹。粉蕤閒黃白。清香從風飄。回首天台山。更識膽瓶蕉。全芳備祖。

洞霄宮

珠宮梁柱太平年。福地從知接洞天。曲檻一峯飛怪石。幽亭三峽迸流泉。驪龍睡重時方早。白鶴歸來客欲仙。殿上紅雲西日暎。此身如在玉皇前。洞霄詩集。

謝深甫

深甫字子肅臨海人。乾道二年進士。累官知樞密院兼參知政事。拜右丞相。以少傅致仕。理宗朝。以孫女爲皇后。追封魯王。諡惠正。有東江集。

天台道中

溪繞青山路繞溪。山長溪曲路高低。晴灘淺澀舟如盪。危磴棱層石作梯。晚照荒村飛鳥入。秋風落葉敗蟬嘶。碧雲四合長天暮。轉使鄉關望眼迷。台州府志。

王 柟

柟字木叔永嘉人。乾道二年進士。累官監進奏院。坐僞學。罷知江陰軍。遷大理丞。歷吏部郎中祕書少監。知贛州。有合齋集。

南康泊舟欲遊廬山值雪

春風浩蕩江湖客。咫尺廬山風雨急。門前老樹最關情。一夜相思頭盡白。東甌詩集。

倪 思

思字正甫歸安人。乾道二年進士。寧宗朝。累官禮部尙書。以寶謨閣直學士。知福州。卒諡文節。有齊齋甲乙稿。翰林前後稿。

延平港灘

長幾巔石三百里。險過瞿唐十八灘。幸有溪旁平穩路。何須欲速冒驚湍。方輿勝覽。

慈感寺東軒

水花風葉暮蕭然，靄靄雲山帶暝煙。竚立東軒未能去，更看明月湧晴天。湖州府志。

周泊

泊字子及，天台人。乾道二年進士，國子監主簿。

拜卞忠貞墓，在金陵冶城。

晉鼎毓晚姦人窺，孰謀國者如兒嬉。陷穽弗設延虎貔，虓闕搏噬嬰者摧。羣公奔潰不敢誰，卞公力疾起督師。謂事迫矣奚生爲，以肉餒虎吁可悲。公則死矣二子隨，偉哉忠孝萃一時。維公忠義天所資，向來謀國如蓍龜。不用吾言至于斯，爲社稷死則死之。治城之麓江之湄，荒冢突兀餘豐碑。半生讀史長歎欷，拜公之墳涕霑頤。死者可作吾誰歸，嗟哉江左固多士。往往所欠惟一死，元規兒輩何足罪。王公偪仄石頭裏，氣息奄奄有如泉下鬼。蘇武之節不如是，視公胡不賴有泚。男子之死一言耳，死而不亡公父子。景定

建康志。

楊甲

甲字鼎卿，乾道二年進士，仕不顯。

遊長松寺宿石門僧舍，以石門霜露白爲韻，得露字。

疾風吹輕衣，駕我雲脊路。人閒一回首，驚絕不敢顧。鳥投虛無底，渺渺不知處。蜂窠蟻丘垤，與世同所驚。試看一蒼莽，誰有不平慮。尙憐野僧屋，佛面荒苔蠹。斷崖劃呀吻，洶洶崩石怒。我來得奇觀，拄杖叩巖樹。

青山有驕色。斯客不能句。平生二三子。慰我一相遇。娟娟松閒月。幽夕亦可度。夜闌更小語。風逼遺響去。酌君無多酒。繼以木蘭露。

登安福浮圖以高標跨蒼穹爲韻得跨字

誰能於虛空。千仞擢修架。層梯高寥寥。可歷不可跨。疑從地上涌。幻手聊一化。飛龍送千柱。雷雨天一借。巍巍大勝妙。突兀此其亞。道人豈澄觀。佛事了閑暇。指揮三百尺。斤斧隨叱咤。當時奮赤手。意闊已遭罵。後來見奇特。世眼一驚詫。塹山作平地。海闊梁可駕。哀哉耳目陋。未信猶疑嚇。凌高更回首。落日在雲罅。蒼蒼野浮樹。漠漠水分汜。悲涼豪傑窟。野冢埋王伯。百年眼前是。俛仰閱榮謝。惟當快飲酒。醉聽風鈴夜。

朱真人祠

一濯巖下溪。再拜巖中庭。清風蕭然來。吹我衣上腥。仙人芙蓉冠。乘月下雲輶。山空雜佩響。夜靜朝百靈。似聞客欲去。小語猶丁寧。肅肅上松柏。急以兩耳聽。寂寥古壇外。但挂斗與星。天明恐是夢。恍惚遺心形。去飲石上水。再讀幽人銘。青山無行迹。霧雨松冥冥。

寒食游學射山

疾風吹沙天茫茫。日落未落原野黃。山空無人石碌碌。路長馬飢石齧足。荒苔古林翳雲族。何人剝豷縛。層屋當時萬騎填。山谷至今拾寶多遺鏃。故國山川愁遠目。人世悲歡風雨速。凌高舉手天爲蹙。手攀崑樹叩雲木。何人唱我淒涼曲。興亡一眼冥冥綠。野水平蕪飛雁鶩。

靈泉山中

野色山圍盡。風煙更可憐。客情牛鐸外。農事藕花前。聚汲松根井。寬愁石底泉。雲安須斗水。詩興亦超然。勝地仙靈宅。微官也謫居。焚香他日夢。隱几向來書。小睡便山雨。長齋稱野蔬。逢人問無恙。滿意說樵漁。
以上成都文類。

曾懷

懷字欽道。晉江人。孝寬曾孫。建炎初。爲金壇簿。知真州。乾道初。賜同進士出身。參知政事。拜右丞相。封魯國公。奉祠卒。

恭和御製玉津園宴射

名園佳氣靄非煙。冠佩朝宗似百川。五品並令陪宴射。四鍤端欲序賓賢。恩涵春意魚翻藻。威入秋聲雁落弦。竣事更容窺典雅。宸章應陋柏梁篇。

夢梁錄。城南玉津園。在嘉會門外四里。紹興四年。北使來賀天中節。遂宴射其中。孝廟常臨幸。命皇太子宰執親王侍從五品以上官及管軍官講宴射禮。孝廟御製詩。宰臣曾懷恭和云云。

鄭僑

僑字惠叔。興化人。乾道五年進士第一。簽書鎮南軍節度判官。光宗朝。權吏部尙書。寧宗朝。拜參知政事。以觀文殿學士致仕。

題夾漈草堂

杪秋尋遠山。幽懷鬱沖沖。草堂跨層崖。夕陽山影空。高人辭天祿。結交杖藜翁。游氛暗九土。歲晚余曷從。

泠泠夾漈水，謾謾長松風。思之不可見，淚落秋雲中。莆陽文獻。

王希呂

希呂字仲行，宿州人。渡江居嘉興。乾道五年登進士，累除中書舍人，給事中，轉吏部尚書，以端明殿學士知紹興府。

入直學士院作

玉堂晝詠暑風微，簌簌飛花落小池。徒倚幽欄憑問訊，夏鶯飛出萬年枝。

玉堂雜紀：學士院東閣窗下鑿小池，久無雨則涸。傍植金沙月桂之屬，又有海棠、郁李、玉繡毯各一株。西偏植金橘，逼城根，枝不能大，花開時香滿院，結實雖小而甘。浙中未易得也。王仲行詩云：

湖山十詠 存四首

瑟瑟輕冰拆御溝，溝邊柳色弄春柔。數聲啼鳥破幽夢，斷送西湖尋舊游。
石罅微泉咽淺沙，沙頭細草換年華。疎籬酒旆管春事，倚馬短檐梅著花。
雨挾東風作嫩寒，短牆圍水柳藏煙。游人不出西湖靜，白鷺飛來在畫船。
露葵抱葉未全開，翠竹陰涼蔽綠苔。貪看青林飛白鳥，丁丁啄木又驚回。咸淳臨安志。

本覺寺三過堂

門外驚風吹細沙，入門水氣湛清華。呼童試向林閒看，巖桂應開第二花。

嘉舉府志。熙寧間。有文長老住寺。
中東坡三過之故名。王希呂有詩。

陸 垞

垞字子高。本高郵人。建炎初。徙海鹽。乾道五年進士。知和州。官至尙書。有益齋集。

醜梨。醜梨出崇德之東。貌雖惡而味絕勝。聞嘗進御因賦。

灰貌疑清古。霜津溢脆甜。面嫌湯後白。心慰邑中黔。美實鍾寒谷。珍嘗近御匳。彼姝徒冠玉。爭得似無鹽。
至元嘉禾志。

曾 丰

丰字幼度。撫州樂安人。乾道五年進士。官德慶太守。恬于仕進。築室曰搏齋。有緣督集。

賀皇太子生日

運轉黃河舊。波澄少海清。菊籬浮喜色。蘭殿沸歡聲。岐嶷親王羨。聰明左右驚。英姿涵玉裕。冊禮建金旌。
入省龍樓曉。歸休鶴禁晴。講筵心會道。賓苑禮通情。誕日愉謠滿。儲庭瑞彩盈。兩宮筵具渥。六佾舞儀輕。
靜念孤蹤遠。曾叨四友榮。尙稽陪角綺。遙祝壽錢鏗。

登滕王閣

故閣崢嶸已劫灰。又看新閣上煙煤。斷碑無日不濃墨。古砌雖秋猶淺苔。江闊鳥疑飛不過。風輕帆敢趁。
先開天高眼迴詩囊小。收拾不多空一來。以上緣督集。

嚴子陵

周家刑不上大夫。法固不足禮有餘。何人不願立朝路。未老誰肯甘田廬。秦阮學士寘勿論。漢嫚大臣眠如奴。逸民不出朝士去。前有兩生後二疏。世祖聰明失之察。待臣少禮多以法。當時祿位列三公。危似千金懸一髮。先生識帝貧賤時。富貴何妨與共之。云胡君房留不住。無乃平日窺其微。龍顏之疎顧豈忍。烏喙所伏那可知。初來高蹈疑矯世。從後逆覩信知幾。退身不勇公孫賀。明泣危機終自墮。先生明甚勇如之。天地萬物莫吾挫。將星羣立客星孤。羣恐難調孤易禍。帝座旁邊睡熟閒。夢魂已在桐江臥。將星耿耿互今明。不比客星明更大。釣臺集

疎山。在金谿縣。

草徑蜿蜒十里閑。雲關若在畫圖看。萬松密翠地無影。一水長清天自寒。撫州府志。

句

不可以風霜後葉。何傷于月雨餘雲。

陳郁話腴曾擢齊遺論歸賦自省詩。中一聯云。託物寄情得坡之意。

王 蘭

蘭字謙仲。廬江人。乾道五年進士。歷官禮部尚書樞密使。卒諡獻肅。有軒山集。

中塔悟空禪院有引

予前年自江西召還。以十二月六日抵修門。雨後微雪。宿接待院。今得罪去國。復以是日雪中來。明日過臯亭。見福公長老。言及相與歎息。因留三絕。紹熙改元。軒山居士王蘭。

重到招提恰兩年。北窗風雪擁衾眠。客來休說邯鄲夢。世事端知不偶然。

富貴危機豈獨今。且從麋鹿逐山林。祇慙莫報君恩重。敢廢惓惓獻畝心。

臯亭回首輓紅塵。晴日僧房暖似春。禪老耽耽如臥虎。相逢一笑問來因。三首見臯亭中塔院石刻。

蕭之敏

之敏。潯陽人。官御史。

滴翠樓并序

乾道五年三月十八日。遇堪村逆旅主人徐季登。飲予小樓之上。且求樓名。予曰亂山滴翠。衣裘溼。此東坡昌化之詩也。請以滴翠名之可乎。季登曰唯唯。賦兩絕以志之。

一溪流水漾殘春。上有高樓碧瓦新。溪路晝陰元不雨。卻愁空翠溼衣巾。咸淳臨安志。

楊簡

簡。字敬仲。慈溪人。乾道五年進士。寧宗朝。累官將作少監。出知溫州。以寶謨閣學士致仕。卒諡文元。學者稱慈湖先生。有慈湖甲稿。

絕句

淨兒橫琴曉寒梅花落在弦閒我欲清吟無句轉煩門外青山。

鶴林玉露云句意

清圓足規其所養

題仙山院默齋

漸漸疎鐘動深深一徑開炎光隔林麓清興遶崔嵬擬作臨流賦應須倩雨催小窗宜挂起且放竹風來。

富陽縣志

黃景說

景說字巖老號白石閩人乾道五年進士嘉定中直祕閣知靜江府有白石丁稿。

鶴林玉露姜白石黃巖老學詩于蕭千巖

巖老亦號白石詩亦工時人號雙白石云

梨嶺遇雨

黑風吹雨又黃昏雞犬數聲何處村身在嶺雲飛處溼不關別淚濺成痕。詩人玉屑

陸九齡

九齡字子壽撫州金谿人乾道五年進士官全州教授卒寶慶中贈朝奉直祕閣賜諡文達。

與僧淨璋

自從相見白雲閒。離別嘗多會聚難。兩度逢迎當汝水。數年隔闊是曹山。客來濯足傍僧怪。病不烹茶侍者閑。不是故人尋舊隱。祇應終日閉禪關。瀛奎律髓

陸九韶

九韶字子美。九齡弟。築室梭山。講學其中。號梭山老圃。有文集。

月石。金谿縣南翠雲山有巖竇。正圓如月。曰月石。

玉兔愛佳泉。飲泉化爲石。規圓立山趾。萬古終不息。應厭舊星躔。盈稀多缺夕。自從寄茲蹤。表表無晦蝕。光彩雖暫埋。體素得不易。神物豈終潛。早晚照九域。

試茗泉。在翠雲山。

邂逅成山行。往往有異景。奇怪爭呈露。獨不見試茗。透迤卽道周。泓澄得幽井。淆之不可濁。凝然如自省。龜蒙於越來。儻亦煮石鼎。豈爲渴者甘。醉夢當一警。以上撫州府志。

陸九淵

九淵字子靜。九韶弟。乾道八年進士。調靖安簿。累官著作丞。光宗卽位。除知荆門軍務。卒諡文安。嘗結精舍于貴溪之象山。學者稱象山先生。有集。

疎山。在金谿西南。

村靜蛙聲幽。林芳鳥語警。山磬分皓葩。隴麥搖青穎。離懷付西江。歸心薄東嶺。忽忘飢歎憂。翻令發深省。

子規

柳院竹亭茅店，雲蕪風樹煙溪。聽徹殘陽月下，不論巴蜀東西。以上象山集。

馬先覺

先覺字少伊，崑山人。乾道初進士，累遷兵部架閣，號得閑居士。有慚筆集。

喜樂功成招范至能入詩社

燕國將軍善主盟，新封詩將一軍驚。范家老子登壇後，鼓出胸中十萬兵。

慧聚寺神濟善醫能知人死生，既享高壽臨終甚了了。作詩哭之。

端的西來了世緣，有身寧肯自謀安。殷勤療病肱三折，去住無心指一彈。貝葉翻餘清磬在，梵香飄斷暮

鐘殘。祗今雙樹婆娑影，空鎖靈山片月寒。崑山雜詠。

王時會

時會，明州奉化人，乾道中進士。

徐鳧巖

絕壑攙空雲與平，橫飛寒瀑萬年聲。杖藜過盡人間險，獨向千山頂上行。雪竇寺志。

陳蒙

游雲門

杖策耶溪寺，風流憶晉唐。門深雲未散，梁古帖猶香。晚翠千峯遠，春深一澗長。徘徊松影下，覓句向斜陽。

雲門志略

范 偃

偃字公武。乾道中。知晉陵縣。

題慧聚寺次孟郊張祐韻

散策欲薄暮。疎鐘猶殷牀。風烟函古趣。巖壑生幽香。似首逼象緯。俯視眇川光。向來非突兀。幾成虎豹場。飛閣臨無地。具區平可吞。高巖聳怪石。老木纏雲根。人散魚蝦市。帆歸葭葦村。每來豁塵慮。不妨頻款門。
崑山雜詠

王 寧

寧常州人。乾道中進士。

和樓守浮遠堂留題

久去鄉關始一來。竹輿行樂亦佳哉。還尋童子釣游處。又趁史君旌騎迴。風物于人隨意好。江山如畫得天開。向來紀勝歸名筆。喜爲重鑿置石崖。
咸淳毗陵志

彭 正 建

正建。乾道中。以詩名。

絕句

天與蓮峯作逸民。舊時相識幾人存。家書千里懶開眼。僦屋兩閒長閉門。
萬姓統譜